

## Maracopa Jesocristo tahimari dsodo inajaro Marcos

Maracopa jodiodeni, odsa panani Jerosarecca madija. Pohuapa Jesocca dodosse jararaha Jesocca dodosse Pedro huatimade tojajari. Pedrodsa ccaridsadsa Jesocca ima tohuattajari quinahi nade. Dsotodepa Pablo, Bernabedenidsa Jeso tahimari maride ccaridsajari.

Maraco dsodo inajaropi: Jesopa madija bedissa naha tossonaraha pohuapa Dio Bedi. Najaro ima madija mittamanahijine dsodo inajaro. Jodio quejena-jarajarideni Jeso tahimari mittamanahijine pohuadenidsa dsodo inajaro.

*Huano Baotistapa dsama huamonihuaji madija mari ican-  
abaquijari*

*Mateo 3.1-12; Roca 3.1-9; Huano 1.19-28*

<sup>1</sup> Ajijaro ima bicanipi Dio Bedi Jesocristo tahimari icassiejeranijinecca. Pohua tahimari madija huapimadsa tojaridsanijine ajima najaro: <sup>2</sup> Maittaccadsama Dio Pohua Bedidsa huati tapojarissa najaro Pohua Atti cacomerabote Isahia dsodo inajaro. Dio Attipa:

—Tahide titahimari tohuaccade madija ojaria titedsejema dosse onapohuitohui.

Nahi mittamanadsa madija bodidenipa titohui najoramanapohuijine, onajaro —napohui nade Dio.

<sup>3</sup> —Najarina dsama huamoni ssono caji, siba caji tanihuaji madidsapa

atti mohui taha madija huahua huahua ihinajonabaquui nahitohui.

Pohua attipa: “¡Ia Medsede ccajonabote nahi! ¡Tinajoramanaji!

¡Pohua tedsejema jahui tijinedeni tobicapoji!  
 Najaroa aji tibodideni pohuatohui tinajoramanaji”  
 nanaja nahitohui dsama huamonihuaaji madijaripa  
 –napohui nade Dio.

<sup>4</sup> Najaria aja madija oni Huanopa dsama huamoni ssono caji, siba caji tanihuaaji madija maride tojajari-paja. Pohuadsa: Baotista, quiquinanajari. (Ettidsapi: Totopade, inajaro.) Pohua attipa: –¡Ticcadeni imasiri tineboridsamanaji! –nanaridsa najari. –Tibodideni ajima tiquinaji: “Occa imasiri onebona. Jidapapi Diotohuira odsanapona” tiquinaji. Nadsana totopa ticajirid-samanaji. Nema tiquinadsapi Dio ticcadeni imasiridsa: “Epeje, ohuati ajimani” nahijine –nahi nade Huano.

<sup>5</sup> Madija huapima Huano atti mittamanahijine jahijonana canajaridenipa odsa panani Jerosarecca, Jodeacca dsamadsa madiridsamanajarideni huapima bacco bacco najonamanajari. Poccadeni imasiri Diodsa ecomeramanadsapi Huanopa hueni Jordaodsa topa topa ihidsanabaqqi najari.

<sup>6</sup> Nadsama Huanopa dsama huamonihuaaji madidsapa pocca eteropi camello cone ba nani ssequi nadsa huedsajari. Pocca ssoquepi bani etero. Pohua taparipa sese, dsamacca jidsi oquine najari.

<sup>7</sup> Huano mari icanabaqqidsa ajijaro ima huati tajari: –Madija dacorajaripa ccajonabote nahi. Ohuapi tahide mari mari onaporaha aja dsotodecca mamaride ccajonajarina deni tojajari. Ohuapi ajimani ojani. Pina pocca medsessa onanijinepi opajira-jerani. Pohua amoricca sadaria diccade naqui opajira-jerani. <sup>8</sup> Ohuapi passodsa tiadeni topa odsanabaqqijaro. Naraha aja ccajonabote najarina Dio Corime tibodidenidsa madihijine tiadenidsa inanaridsahitohui –nahi nade Huano.

*Jeso totopa cajijaricca ima  
Mateo 3.13-17; Roca 3.21-22*

<sup>9</sup> Nadsapa Jeso dsama arobeni onini Carireacca odsa Nasaretidsa madiraha hueni Jordaohuaji qquedsippajari. Bacco dsippadsapa Huano Jeso topa idsanajari. <sup>10</sup> Nadsa Jeso passodsa totehemadsa tocattamacossa nanaja meme tohuaba najaro. Dio Corime ahuato taha pina midsorissa naha Jesohuaji ccaronajari. <sup>11</sup> Bacco naronadsapa memehuari atti mittaronajari: —Tiapi occa ejedeni. Tiadsa ohuati huana tajaro. Ticca ima bica tajarojine ohuatidsejaro —nahi nade Dio.

*Jeso imasiri inananijine Satana nattome inaraha jehe najarajari*

*Mateo 4.1-11; Roca 4.1-13*

<sup>12</sup> Huano Jeso topa idsanaha jicadsapa Dio Corime Jeso iaquemorajari, dsama huamoni ssono caji, siba caji tanihuaji madihijine. <sup>13</sup> Jeso madihi inoridsapa bani huadi tahicca caji tajari. Nahidsa Jeso huada 40 naha madidsana imasiri totonanade Satanapa Jeso nattome inajari. Pohuapa Jeso imasiri inananijine dissera taraha Jesopa Satana attidsa jehe najarajari. Nadsapa Diocca dodosse tabaqqi memehujicca Jeso acco icamamanajari.

*Jesopa Carireahuaji maride tojapojari*

*Mateo 4.12-17; Roca 4.14-15*

<sup>14</sup> Naraha Huano Baotista toponi cocorodsa coro idsi-mamanahi nattipa Jeso dsama arobeni Carireahuaji toc-canijari. Nahihuaji Diocca ima bicani icassiejeranijinecca mari icanabaqqi-ridsajari. <sup>15</sup> Pohua attipa: —Jidapapi Diocca cacahuehe iadsa bacco najonabote nani. Pina Dio huati tapohuissa najaro. Ticcadeni ima Diodsa tecomeramanadsa ticcadeni imasiri tinebomanaji. Diotohuira tidsanapomanaji. Diocca ima bicani ticassiejeranijineccadsara jehe tiquinanissa taji —nahi nade Jeso.

*Jesopa aba cocorodedeni 4 quinaha huahua inabaquijari*  
*Mateo 4.18-22*

<sup>16</sup> Jeso Carireacca coridsa inidi toccabacossadsa Ssino, pohua ohuaha Adiri tedseje qqui inabaquijari. Pohuadenipa aba cocorodedeni. Aba corode toquejenaraha Jeso bacco najonajari. <sup>17</sup> Pohuadenidsa huati tajari: — Jina, ohuadsa ticadaridsaji, ohuatimade tiquejenadsapi tiadeni onahattabaquiniijine. Tahidepi abadsa tidsepedeni ijimanaporaha jidapapi madija ohuadsa toquejenahijinena tidsepedeni ijimananitohui, onajaro — najari Jeso. <sup>18</sup> Najaro ima mittamananaja poccadeni tajapa icanebo-manadsa Jesodsa tohuedajari.

<sup>19</sup> Nadsapa denima jai tojabacossanaja Jesopa Sebedeo bedideni Satiaco, pohua imecote Huano tedseje qqui inabaquijari. Poccadeni tajapa ssequinimade canoadsa jassi dsajari. <sup>20</sup> Nadsapa Satiaco Huano tedseje Jeso huahua inabaquijari. Najarideni naco amadsati poccadeni abi Sebedeo, pocca tatarabaidssadedeni tedseje canoadsa jassi dsadsa inebobaquimanajari. Nadsapa Satiaco, Huano tedseje Jesodsa tohuedajari.

*Satanacca dodosse tocorime madija bodidsa madidsajari*  
*Roca 4.31-37*

<sup>21</sup> Nadsama Jesopa pohua huatimadedeni tedseje Capernaohuaji bacco toquinajari. Nahidsa jassinajacca huadadsa Dio Atti mamarihuaji jai tojedsimadsa Jesopa madija mari icanabaquijari. <sup>22</sup> Nadsa mittamanadsapa: —A, pocca marinaja bica taha —quinahi nade. Jeso pocca marinaja mari icanabaquidsapa pohana nahatojide rajari, atti caji tajaria. Aja jodiogenicca marinaja marideni attissa najarajari. <sup>23</sup> Nadsapa Dio Atti mamarihuaji madija pohua bodidsa Satanacca dodosse tocorime caji-jari naco huittarijari. Jeso qqui tadsapa pohua bodiccajine jadsirema atti atti najari: <sup>24</sup> —¡Nasaretihuajicca Jeso!

¿Nejecotohuira ticcajonajaro? ¿Icca ima tinajicanijine ticcajonajaroqui? Ticca ima nahato onani. Tiapi Diocca Ejedeni Bicabote tijani — nahi nade.

<sup>25</sup> Naraha joma nahijine Jesopa atti dacoradsa huati tajari: —¡Epeje! ¡Didi taji! ¡Najari madijadsa tiqquenaji! —najari. <sup>26</sup> Nadsapa tocorimejine najari madija tohued-imadsapa pitora pitora najari. Nadsapa jadsirema johua johua nadsapa pohua bodicca qquenajari. <sup>27</sup> Nadsapa qqui toquinajaridenia huajo caniredsapa: —A ¿nejecoma najari? —naridsamanahi nade. —Jesocca marinaja pina dsatissa naha. A, atti cajidsa dosse imaha —quinajari. —Tocorime cajijari pohua bodicca Jeso attidsa ibora taha —quinahi nade. <sup>28</sup> Nadsapi Jesocca ima amadsati tojaribaqquijaro. Carireacca dsama pohuadeni inoricca huajirema nahicca madiridsamanajarideni naco pohua tahimari mittaridsamanajari.

*Jesopa Ssino-Pedro massodini inanomijaro*

*Mateo 8.14-15; Roca 4.38-39*

<sup>29</sup> Nadsapa nani jodiidenicca Dio Atti mamarihuaji jahininedsapa Jeso, Satiaco, Huano quinadsa Ssino, Adiridenicca odsahuaji jai tojedsimajari. <sup>30</sup> Nanidsapi Ssino massodini coma tehe, huapini pporcorehe pori canajaro. Naraha nahidsa jai tojedsimadsapa amadsati ponicca dsamacoma tahimarini Jesodsa huati toquinajari. <sup>31</sup> Nadsapa Jeso ponidsa tohuajiressidsa dsapani equidi, joca imadsapi huapini tonahuihui najaro. Tonomidsapi pohuadeni inajipabaqquijari.

*Jesopa comaquiri najarideni inanomi-ridsabaqquijari*

*Mateo 8.16-17; Roca 4.40-41*

<sup>32</sup> Nadsapa maji tonahuidsa madija comaquiri najarideni, aja madija bodidenidsa Satanacca dodosse tocorime cajimanajarideni naco eccajonabaqquijari

nade. <sup>33</sup> Nadsapa nahicca madija huapima madiridsamanajarideni Ssino, Adiridenicca odsacca noccobijidsa queriqquimanajari. <sup>34</sup> Naraha Jesopa comaqquiri najarideni huapima comani onihi onihi cajiridsamanaraha inanomibaqquijari. Tocarime huapi taha naco dosse ininebaqquijari. Pohuadenipa Jesodsa nahatoqqiri naraha Jeso pohua tahimari ecomeramananjine jipera tadsapa didi inanabaqquijari.

*Jesopa Dio Atti mamari caji taridsajaruhuaji mari icanabaqqui-ridsajaricca ima*

*Mateo 4.23; Roca 4.42-44*

<sup>35</sup> Nadsapa ssiajaricossadsa Jeso totehema, odsa pananidsa toqquenadsapa madija madide nohuerahihuaji toccajari, Diodsa huati tahijine. <sup>36</sup> Dsotodena Ssino-Pedro pohua tessedeni tedseje Jesotohui qqui naridsamanajari. <sup>37</sup> Bacco quinadsapa: —Huapima tia qquide jahijonapomapaja —quinahi nade. <sup>38</sup> Naraha pohuadenidsa huati tajari: —Jina, odsa onihihuajina jaijana. Odsa onihicca, odsa onihicca mari ocanabaqqui-ridsahijine occaronajarode —nahi nade Jeso. <sup>39</sup> Nadsapa dsama Carireahuaji ccaridsa ccaridsa naridsajari. Nani Isaraeri potemahi jodiodenicca Dio Atti mamari onihi onihi naridsanihuajicca mari icanabaqqui-ridsajari. Madija bodicca tocorime qqenaridsahijine naco dosse dosse ihinineridsa najari nade.

*Huapi jadsimarojari Jeso inanomijari*

*Mateo 8.2-4; Roca 5.12-16*

<sup>40</sup> Nadsapa madija dsamacoma onini leprajine huapi jadsimarohi Jesodsa ccasonajari. Pohua bodipa: —Jesopa deni tojahi, ohuapi ajimani ojani —nadsa Jeso baccuhuaji pohua pitodsa huitta nadsa Jesodsa huati tajari: —Ohua Medsede, ohuapi bica onejeraraha tia jipa tinadsapi ohua

tinanabicaniijine nahato tinani —najari. <sup>41</sup> Nadsapa Jeso pohua bodidsa: —Tohuati nahana tahi —nadsa pohua dsepedsa bara inadsa: —Jehe, jipa onani. Tibicaji —najari. <sup>42</sup> Nanaja amadsati pohua huapicca tomossissi nadsapa tobicajari. <sup>43</sup> Nadsapa Jeso pohua dosse inajari. Pohua tobicahicca ima madija ohuahadenidsa huati naridsa-jarahijine naco pohnadsa huati tajari. <sup>44</sup> Jeso attipa: —Aji tibicanicca ima madijadenidsa huati taridsa tejerana —najari. —Naraha Diodsa dada toqqumahuajina ticcaji, onajaro. Nanidsa tiqquedsimadsapi dada toqqumade ojariadsara tepi tobicani tia nohue tinaji. Nadsapi Diodsa ticca ima bica tejeranicca toppineradsapi ticca daniji Diodsa tojanijine ohuaha ohuaha naha pina edede, ppiriri, oqui najari da da tidsimana. Pina Moisesicca marina-jadsa iboraqquri inajarossa tinanaji, onajaro. Nadsapi huapimadsa ticca ima toppinerani ahuate tadsapi: “Pajissa tibicajaro” quinahijine, onajaro —nahi nade Jeso. <sup>45</sup> Naraha aja tobicajaripa toccajari, Jeso pohua inanabica-ahi tahimari huati naridsajari. Najarojine Jeso pocca nomietohui madija disseraqquri nadsapa odsa panani onihi, onihidsa totoqquedsima najarajari Jeso, pohua qqui toquinahi noppine. Nama nadsapa madija madide nohuerahihuajina ccaridsa ccaridsa najari. Naraha madija huapimapa nama naha pohuatohui quinadsapa jajahi toja najari pocca nomietohui.

## 2

### *Jesopa madija ssomi tojahi inabiquemanijari*

*Mateo 9.1-8; Roca 5.17-26*

<sup>1</sup> Nahidsa Jesopa madi madi nanaja odsa panani Capernaohuaji toccanipomadsapa bacco tanijari. Nadsapa madija: —Jeso odsadsa bacco nanihi —quinahi ima mittaridsamanajari. <sup>2</sup> Nadsapa pohuatohui

queriquimanadsa poccadeni odsa boronima, odsa bodima ijrirdsa najari. Nadsapa Jeso Dio Atti mari icanabaquijari. <sup>3</sup> Nadsapa madija ide tone biqueradsa isso ssomi tojahipa pohua taborodsa dsojo icanajonamanajari. Pohua tesse ahuaji pama, ahuaji pama najonamanahi nade. <sup>4</sup> Naraha madija siba tadsapa Jeso bacco quinahijine pajiramana-jaradsa odsa tetepihujina iaccamaromanajari. Jeso huedsahi tetepidsa odsa icatabojidsamanajaro. Nahidsana madija ssomi tojahi pohua taborodsa poridsa odsa bodihuaji tappa icanaronamanajari. <sup>5</sup> Jeso pohuatohui dissessera tahi qqui tadsapa pohua bodidsa nahato tajari: —Pajissa, Jesopa madija inanomihijine nahato tahi —quinahi Jeso pohuadsa ahuate tadsapi coma tajaridsa huati tajari: —Otesse, aji imasiri tinanajaro huapimapi onanamossini. Jidapapi ticca ima Diodsa tobicani —nahi nade Jeso.

<sup>6</sup> Naraha nahidsa jodiodenicca marinaja maridedeni naco jassi tariridsajari. Pohuadeni bodipa: <sup>7</sup> —Apaja, Jesopa: “Imasiri onanamossina” naha. Pohua attipa: “Ohuapi pina Dio ojani” nanaja najarissa naha. ¡Jesocca imapi bica tejerani! ¡Pina Dio itamassojarissa nahi! Naraha Dio Pohuana ojarijari imasiri inanamossinijine —quinahi nade jodiodenicca marinaja maridedeni. <sup>8</sup> Nama quinaraha Jesopa pohuadeni bodidenicca ima nahato tadsapa pohuadenidsa huati tajari: —¿Nejecotohui tibodidenidsa nema tiquinajaro? —najari. <sup>9</sup> —Jari, tibodideni huatoma-manaji ¿nejecoma najaro imana tiadenidsa denima najora tani? Aja madija coma tajaricca imasiri onanamossini ¿najora taqui? Coma tajari onanabichina ¿denima najora tajarorane? <sup>10</sup> Aji ohua Madija Bedi oजारopi tiadenidsa occa ima ahuate onanana. Madijacca imasiri onanamossinijine Diocca dacorehe ocajini. Aji namidsa naqui ohuatti ocajini nahatoquiri



tiquinanijinepi coma tajaridsa huati onana —najari Jeso.  
<sup>11</sup> Nadsapa madija ssomi tojahidsa huati tajari: —Tiadsa huati onadsa: ¡Titehemaji! ¡Titaboro tididsa ticca odsahuaji ticcaniji! —nahi nade Jeso.

<sup>12</sup> Nadsapa totehema, madija huapima cattomama canaraha amadsati pohua taboro idi nadsa pocca odsahuaji toccanijari. Nadsapa madija huapima cappinamanaraha huatidsemanadsapa: —A, ¡Diojine bica tani! —quinajari. —Nema nani qqui qqui inejeraccade —quinajari.

*Jesopa Rebidsa huahua najaricca ima*

*Mateo 9.9-13; Roca 5.27-32*

<sup>13</sup> Jeso coma tajari inabiquemanihi nattipa coridsa poni huapihuaji toqquedsippapomajari. Madija sibema pohuadsa queriqquimanadsapa mari icanabaqqujari.  
<sup>14</sup> Nahidsa Jeso denima toccadsapa madija oni Rebi qqui inajari. Najaripa Arapeo bedi. Puhuapa romanodenicca taminecca dosseniji dsiniro ihinaccamana nanihujicca odsa bedeni bodidsa huittidsajari. Nadsapa Jeso pohuadsa huati tajari: —Jina, ohuadsa ticcaji —nadsa Jesodsa toccajari.

<sup>15</sup> Nahi dsotodepa Rebi tadsarihuaji Jeso tedseje jipacquimanahijine madija huapi taha huahuanaridsa jassi nahuajanijari. Nahidsapa romanodenicca taminecca dosseniji dsiniro nanaccadedeni, jodiodenicca marinaja ecahuamana-jerajarodeni naco Jeso pohua huatimadedenidsama jassi nahuajanijari. Najarideni Jesodsa jahirid-sajaripa huapi tahi. <sup>16</sup> Naraha jodiodenicca marinaja maridedeni, marinaja pariseodsa jehe quinajaridenipa madija bicaququiri najarajarideni Jeso tedseje jipamanahi qqui toquinajari. Najaro imadsa jiperaququiri nadsapa Jeso huatimadedenidsa atti atti quinajari: —A ¿nejecotohui tia maridepa romanodenicca taminecca dosseniji dsiniro nanaccadedeni tedseje, imasiri cajimanajarideni tedseje

jipajari? —quinajari nade. (Aja madija nama najarideni tedsejepa jipade oppina tani quiquinanajari.)

<sup>17</sup> Naraha Jeso pohuadeni attideni mittadsa manaco Jeso huati tajari: —Nomiqquri najaridenipa toponi totonanomide tohuini quina-jararaha comaqquiri najaridenina toponi totonanomide tohuini quiquinanajari. Ohuapi pina toponi totonanomidessa onajaro. Madijadenicca ima Diodsa tobicanijine pohuadeni accode occajonajarode. Naraha madijapa: “Iapi bicaqquri inani” quiquinanajari-denicca ima onanabicanijine occajona-jerajaro. Imasiri totonanadedenicca ima onanabicanijinena occajonajaro —nahi nade Jeso.

*Jesodsa jipehe nebocossanicca ima huati toquinajari*

*Mateo 9.14-17; Roca 5.33-39*

<sup>18</sup> Huano Baotistacca mamari tabaqqi jipehe nebocossamana, jodiodeni marinaja pariseodsa jehe quinarideni naco jipehe nebocossamana najari, Diodsara huati huati dsanapomanahijine. Nadsapa madija Jeso-huaji bacco najonamanadsapa pohuadsa huati toquinajari: —Huano Baotista pocca mamari tabaqqi tedseje jipehe nebocossamanajari. Pariseodenicca mamari tabaqqi naco jipehe nebocossamanaraha ¿nejecotohuitticca mamari tabaqqia jipehe nebocossamanaha najarahi? —quinahi nade.

<sup>19</sup> Nadsapa Jeso pohuadenidsa huati tajari: —Dsabissopa amoneje cajibote najari pocca ejete tojadsapi ¿pohuadsa queriqquimanajarideni jipehe nebocossamana taco? Nebocossamana-jarahi —nahi nade. —Dsabisso cajibote najari tedseje huatidsemanadsapa jipehe nebocossamana-jarajari.

<sup>20</sup> Naraha nidsa huada onihiccadsa dsabisso cajibote najari iaccamanadsapa pohua tessedenipa jipehe nebocossamanahitohui —nahi nade Jeso. (Aja pohua

atti nama najaripa pohuapa pina dsabisso cajibote najari. Pohua huatimadedeni jipehe nenebocossamana najarajari, najari.)

<sup>21</sup> —Ima onihi naqui ajima najaro: Etero ssessequide-denipi etero jadanidsapi etero dsati ihibedsacossamana nejerajaro. Etero dsati etero jadanidsa podsacossadsa dsotode ssahua nadsapi joca naqqi tani. Nadsapi etero jadani sseo tapomadsapi denima totabaccora tani —nahi nade. (Aja pohua atti nama najaripa pocca marinaja pina jodiodenicca marinajassa nejerani. Jeso pocca marinajapi dsati.)

<sup>22</sup> —Ima onihi naqui ajima najaro: Uva ppejene nahatodsatipa bani etero ssequi nahi jadahidsa sso sso ihid-samana najarajari. Uva ppejene nahatodsati bani etero jadahidsa sso todsadsa ssicatadsapa jocaquera tajarijine sseo tahi caji tahi. Sseo tadsapa uva ppejene sso taha jica tahi, dsamine naco totabaccoradsapa coro quina tahi. Nadsama uva ppejene dsatipa bani etero ssequi nahi dsatidsara sso sso totodsa najari —nahi nade Jeso. (Aja pohua atti nama najaripa madija bodi dsati tojadsana Jesocca marinaja dsati ecahuanijine pajirahi, najari.)

*Jassinajacca huadadsa Jeso huatimadedenipa aroso jidsadsa trigo bono pore dsanapomanajari*

*Mateo 12.1-8; Roca 6.1-5*

<sup>23</sup> Nadsapa dsotode naco jassinajacca huadadsa Jeso pohua huatimadedeni tedseje huidsaja nocconi motta jai tojeqquimajari. Jai tojeqquimadsapa aroso jidsadsa trigo bono pore ippimanadsa apa dsanapomanajari. <sup>24</sup> Naraha jodiodeni marinaja pariseodsa jehe quinajarideni qqui toquinadsapa pohuadenidsa bica tejeradsa Jesodsa huati toquinajari: —¡Ajana! Tetimadedenipa huidsajacca bono

pore quinadsapa pina jassinajacca huada jerajarodsa dsepedeni ijaminajarissa quinaha. Jassinajacca huadadsapi idsepe ijinijine oppina taraha —quinajari.

<sup>25</sup> Naraha Jeso pohuadenidsa huati tajari: —¿Naraha tiadenipi aji Dio Atti maittaccadsama dsodo naniccadsa Dabicca ima hua hua titiquina naraha tetideni ajimanajarorane? Najaro imapi Dabipa pohua tessedeni tedseje dsamatapa cappiramanadsa pemimanadsapa pan Diodsa da tahicca oppina taraha jipamanajari. <sup>26</sup> Aja maittaccadsama Diodsa dada toqquimadedenicca tamine deni tojjari onipa Abiata madidsa nahihuaji Dabi toqquedsimadsa pan tohui huati tajari. Pan ohuaha nohueradsa Diodsa da tahiccaraha Dabi jipajari, pohua tessedenidsa naco da inabaquidsa jipamanajari. Najari pan Diodsa da tahipa dada toqquima cacahuadedenira jijipamana najariraha Dabideni pemimanadsa jipamanajari oppinera tahi —nahi nade Jeso.

<sup>27</sup> Naraha Jesopa denima pohuadenidsa huati huati dsanapojari: —Dio madija inahatobaqquijaripa jassinajacca huada madija inapajiramananissa tanijine inahatobaqqui-jarajari. Diopa jassinajacca huada tahimarini huati tapojaripa jassinajacca huadapi madijadsa bica tanijinena huati tapojari —nahi nade. <sup>28</sup> —Ohua Madija Bedi ojararona jassinajacca huada jinede ojani. Jassinajacca ima cacahuadepi ohuana paji —nahi nade Jeso.

### 3

*Madija dsepe siricca ima  
Mateo 12.9-14; Roca 6.6-11*

<sup>1</sup> Naraha Dio Atti mamarihuaji Jeso toqquedsimanipomadsapa madija dsepe siri naco nahidsa huittaritari.

<sup>2</sup> Nadsama jodiodeni marinaja pariseodsa jehe

quinajaridenipa Jeso inoccodsamanajari. Jesopa jassinajacca huadadsa madija inanomibaquidsapa pohuadenidsa pina jassinajacca huada jerajarodsa pohua dsepe ijjarissa najari, quinajari. Pohuadeni bodipa: —Jidapana jassinajacca huadadsa ajari dsepe siri inanomidsapa Jesodsa ima inahananijine —quinajari. <sup>3</sup> Naraha Jesopa dsepe siridsa huahua najari: — Titehemadsa ahuaaji ticcajonaji —najari. <sup>4</sup> Nadsapa dsepe siri ccajonadsa Jesopa madija huapimadsa huati tajari: — Jari, Moisesicca marinaja, icca madijacca marinaja naqui nahatoqquri tiquinadsapi ohuatti tecomeramanaji. Jassinajacca huadadsapi ¿nejecoma najaro ima inananina “Bica tani” tiquinajaro? Jassinajacca huadadsa madija inabicaquidsa “Oppina tani” ¿tiquinajaroqui? Madija inajidsobaquidsana “Bica tajaro” ¿tiquinajarorane? —najari. —Jassinajacca huadadsa naco ijine madija tossiajadsa ¿oppina taqui? “Paja dsoqquerina” ¿tiquinajarorane? —najari. Naraha pohuadeni cacomamanajari. Nahatoqquri naraha cappinamanadsa joma quinajari. <sup>5</sup> Nadsapa Jeso madija huapima jassi nahuajanijari icahadibaquidsa noccodeni icattabaqqi najari. Nadsapa pohua bodi ojijari, huaribodeni sibaqquri nadsa. Nadsapa dsepe siridsa: —Jari, tidsepe ohuahuaaji da ticanajonaji —nahi nade. Nadsa pohua dsepe pohuahuaaji da icanadsapi tocanomijaro. <sup>6</sup> Naraha pariseodeni jai tojenadsapa tamine Herodecca madija tedseje queriquimanajari. Nahidsa ima idimamanajaro, Jeso dsoqquehijine.

*Madija huapi taha Jesotohui jahimissajari*  
*Mateo 12.15-16; Roca 6.17-19*

<sup>7</sup> Nadsapa Jeso pohua huatimadenima coridsahuaji jai tojedsippajari. Aja dsama arobeni Carireahuajicca

madija naco huapi taha Jesodsa jahimissajari. <sup>8</sup> Madija ohuahadeni naco Jesocca ima mittamanadsa pohua canahatoriri canahi qquide tohuini quinadsa Jesotohui jahimissassa canajari. Madija huapi taha jahijonana canajari. Dsama arobeni Jodeahuajicca, odsa panani Jerosarehuajicca, dsama arobeni Idomeahuajicca, hueni Jordao jippehuajicca, odsa panani Tirohuajicca, odsa panani Sidohuajicca madija naco jahijonana canajari. <sup>9</sup> Nadsapa madija si tocajajari canadsapa Jeso pohua huatimadenidsa huati tajari: —Canoa qqui ticanamanaji. Nidsa nanidsa oqquedsanijine. Madija huapi taha jahijonahi ia mere inanamanarana —nahi nade. <sup>10</sup> Aja comaquiri najari inanomibaqqidsapa ohuaha tonomi, ohuaha tonomi naridsamanajirijine pohuadsa jahijonedsati naco Jeso bara quinahijine pohuahuaaji jo todsimahi najari.

<sup>11</sup> Aja madija bodidenicca tocorime Jeso qqui toquinadsapa Jeso baccohuaji pohuadeni pitodsa jassi tadsa attideni dacoradsa johua johua quinajari: —¡Tiapi Dio Bedi tijani! —quinahi nade Jesodsa. <sup>12</sup> Naraha pohua tahimari ecomamananijine Jeso atti dacoradsa huati tajari: —¡Najaro otahimari huati tiquina tejeraji! —nahi nade.

*Jeso pocca dodosse tabaqqui 12 quinajari icattejidsabaqquijari*

*Mateo 10.1-4; Roca 6.12-16*

<sup>13</sup> Jesopa coridsahuaji madija mari icanabaqquia jicadsapa ssonohuaji toqqemorajari. Nadsapa Jeso pohua jipa tahicca madijatohui huahua inajonabaqqidsapa pohuadsa queriquimanajari. <sup>14</sup> Nadsapa 12 quinahana icattejidsabaqquijari, pohua huatimade toquejenahijine. Najaridenipa Jeso dosse inabaqquiridsadsa pohua tahimari maride jahiridsahijine. Nadsapa Jeso pohuadeni oni icanacanibaqquijari: —Occa dodosse tabaqqui —najari. <sup>15</sup> Pocca dacorehe pohuadenidsa inanaridsajaroa madija

bodidenicca tocorimedeni dosse dosse ihininebaqqui nahijine pohuadeni inapajirabaqquijari. <sup>16</sup> Nadsama 12 quinajarideni icattejidsabaqquijari onidenipa ajama quinajari: Tahidepa Ssino. Pohua oni Jesojine icanacanisatipa: Pedro, najari. <sup>17</sup> Madija ohuaha onipa Satiaco. Pohua ohuahapa Huano. Pohuadeni pamahapa Sebedeo bedi. Najarideni pamahapa Jesojine onideni icanacanisatipa: Boanereque, najari. (Ettidsapi pina: ttottorodecca madija, najari.) <sup>18</sup> Madija ohuahadeni onideni naco Adiri, Feripe, Batorome, Mateo, Tomas quinajari. Madija ohuaha onipa Satiaco. Satiacopa Arapeo bedi. Madija ohuaha onipa Tadeo (pohua oni ohuahapa Joda). Madija ohuaha onipa Ssino, pohuadsa: romanodenimomohuade, quiquinanajari. <sup>19</sup> Madija ohuaha onipa Joda Iscariote. Najaripa Jeso ccaccorade. Najarideni Jeso icattejidsabaqquijaripa 12 quinaha pohuadsa toquejenajaride.

*Jesocca dacorehe ahuato tajaroraha pohuadsa ima inanamajaro*

*Mateo 12.24-32; Roca 11.14-23; 12.10*

<sup>20</sup> Nadsapa Jeso odsa bacco tanidsapa madija pohuadsa toqueriqquini-manapomajari. Madija pohuadsa disseraqquri nadsapa pocca mamari tabaqqui tedseje dsepedeni ijimanahissa tajari. Nama quinadsapa jipamanahijine ssamo tajari. <sup>21</sup> Naraha Jeso imeni, pohua imecotedeni tedseje ima mittamanajari: —Jeso bodi tossamohui, jipa-jarahi —quinahi mittamanadsa pohua iaccanimanahijine jahijonajari.

<sup>22</sup> Nahidsa naco odsa panani Jerosarehuajicca jodidenicca marinaja maridedeni bacco quinajari. Najarideni attidenia: —Tocorimedenicca tamine Beheosebopa Jeso bodidsa madidsajari. Pocca dacorehe cajijarijinea pocca dodosse tabaqqui dosse ininebaqquijaripaja —quinahinade. Naraha maidsamanajari.

<sup>23</sup> Nadsapa Jeso pohuadenidsa huahua najari. Pohuadeni bodi huatomanahijine ajijaro namidsa imadinicca ima huati huati tajari: —¿Satanapa pohua dosse tonine taco? Nohuerahi —nahi nade. <sup>24</sup> —Dsama huapimacca taminepa madija ecahuabaqquiraha dsotode pocca madija cahadiremanadsa ahuaji atti ahuaji atti quinadsapa pocca cacahuehe inassamomanajaro. Nadsapa pocca madija domo tocca tahi. <sup>25</sup> Najarossa najaro odsa cajariecca madija cahadiredsapa poccadeni ima tossamodsapi tojaribaqqui tahi. <sup>26</sup> Ima najarossa najaroa Satanapa pocca dodosse tabaqqui madija bodidsa madidsamanajarideni dosse ininebaqquidsapa pina pohua pocca madija tedseje cahadirejarissa najari. Nama nadsapa pocca dossehe inassamodsapi sara tabaqquihitohuiraha —najari Jeso.

<sup>27</sup> —Nadsama imasiri totonanade Satanapa dacorehe cajiraha ohuapi deni ojajaro. Pohuapa ajamani pina ajijaro ima tiadenidsa huati onabote najarossa najaro. Nadsama bobotidepa: “Odsacca todsepetaji obotina” najariraha odsa jinede dacorabote odsadsa madidsadsapa botihijine pajira-jarahi. Naraha bobotide denima dacoradsapa odsa jinede dama inadsa jore inaqquidsapa pohua dsepetaji botihijine pajirahi, onajaro. Ima najarossa najaroa aji ohua pina bobotide denima dacorajarissa onajaro. Occa dacorehe deni tojadsapi pina Satana jore onaqquijarissa nadsa pocca dodosse tabaqqui dosse dosse ohoninebaqqui najaripaja —nahi nade Jeso.

<sup>28</sup> Nadsapa Jeso jodiodenicca marinaja maridedenidsa denima huati huati tajari: —Pajissara tiadenidsa huati onajaro: Madija imasiri inanamanaraha nidsa dsotode: “Icca ima inebona” quinadsapa poccadeni imasiri Diodsa ecomeramanadsa Diopa poccadeni imasiri huapima epeje inananitohui. Poccadeni tamassohue huapima



naqui Dio epeje inananitohui. <sup>29</sup> Naraha Dio Corime itamassomanadsa, pohuajine tojajarodsa maidsehe huahua quinadsa naco Diopa pohuadeni atti huati ajama-jarahitohui. Poccadeni imasiri epeje inana-jeranitohui. Poccadeni ima oppina tajaropi pohuadenidsa nema dsanaponitohui —nahi nade Jeso. <sup>30</sup> Aja Jeso atti nama najaria jodiodenicca marinaja maridedeni maidsamanadsa: —Jesopa Satanacca dacorehe cajijarijine canahatoriri canaridsajari —quinadsapa manaco Jesopa pohuadenidsa ima oppina tani huati tajari.

*Jeso imeni, pohua imecotedeni*

*Mateo 12.46-50; Roca 8.19-21*

<sup>31</sup> Nadsama Jeso imeni pohua imecotedeni tedseje Jeso pohuahuaji bacco toquinajari. Amossinihuaji domo huadsa huati toquinajari: —Jesodsa huahua tiquinaji —quinajari. <sup>32</sup> Madija Jesodsa jassi tarijarideni pohuadsa huati toquinajari: —Ticca ami, timecotedeni amossinidsa titohui domo huapaja —quinahi nade.

<sup>33</sup> Naraha Jeso pohua attipa: —Occa amipi ¿nejecojaron paji? Ohuemecotedeni naco ¿nejecojaridenina paja? —nahi nade. <sup>34</sup> Nadsapa pohuadsa jassi tarijarideni icattabaquidsapa pocca madija jararaha: —Ajararidenina pina occa amissa, pina ohuemecotedenissa quinajari. <sup>35</sup> Madijadenipa Dio Pohua jipa tahicca ihinanamana najarodenina pina ohuemecotedenissa quinajari. Amonejedeni naqui Dio Pohua jipa tahicca ihinanamana najarodenina pina occa amissa, pina ohuemecotedenissa quinajaro, onajaro —nahi nade Jeso.

#### 4

*Jesocca marinaja huidsaja ppappadecca ima tadsajani mari icanabaquijari*

*Mateo 13.1-23; Roca 8.4-15*

<sup>1</sup> Jesopa coridsa inididsa maride tojapomajari. Madija ohuaha ohuaha quinaha pohuadsa toqueriqquijari. Madija pohuadsa panahicca tojadsapa Jeso coridsacca canoadsana toqqedsadsapa canoacca huihuittaridsa huittarijari. Nadsama madijapa nahi coridsa inidicca ssiquidsa domo huajari. <sup>2</sup> Nadsapa pohuadenidsa ima huapi tehe mari icanabaquujari. Pocca marinaja ajijaro namidsa imadinicca ima tadsajani mari icanabaquujari.

Jesocca marinajapi ajima najaro: <sup>3</sup> —Titaharibobo canaji. Huidsaja ppappadepa pocca huidsaja huirade toccajari. <sup>4</sup> Nocco huira inaridsajari. Naraha motapa jahuihuaji catojaja najari. Nadsapa ppiriri jahironadsa amadsati saca quinajari. <sup>5</sup> Aja nocco huira naridsajari mota naco siba ccababa tanidsa catojajari. Nanidsapi ssiqui bicani badsira taraha nama naha huassinaja moro tajari. <sup>6</sup> Moro taraha jabo huapihuajira toccabaquujari. Maji ccajonadsapa maji ppoconejine botejari. <sup>7</sup> Nocco mota naco namidsa cotihi caji tahihuaji catojajaria cotihi tedseje paja moro toquinarihi naraha cotihijine ssomi tojajari. Nadsapa bono-jarajari. <sup>8</sup> Nadsapa nocco mota huira naridsajaripa nami bicanidsa catojaridsadsapa mororo canaridsadsa bica taha napijari. Bono cajiridsadsapa ede ojariapa bono 30 naha cajijari. Ede ohuahaccapa bono 60 naha cajijari. Ede ohuahaccana 100 naha cajijari. <sup>9</sup> Nadsama teribodeni ticajimanadsapi ohuatti timittamananissa taji, onajaro —nahi nade Jeso.

*Madija motapa Jesocca marinaja mittamana-jarajari*  
*Mateo 13.10-17; Roca 8.9-10*

<sup>10</sup> Nadsapa madija mota jai tojaniraha madija pamaha madimanajaripa Jesocca dodosse tabaqqui 12 quinajari-deni tedseje Jesodsa huati toquinajari: —Jeso, ajijaro namidsa imadinicca ima tadsajani ia mari ticanabaquujaropi ¿nejecoma najaro ticca marinaja? —quinahi nade.

<sup>11</sup> Naraha Jeso pohuadenidsa huati tajari: —Jehe mait-taccadsama Diocca cacahuehecca ima dsati najorapora-raha madija inahattabaqqi-jaraccade. Jidapanana Diojine pocca cacahuehe tahimarini dsati tiadenidsana ahurato tani. Naraha madija motapa ajijaro namidsa imadinicca ima tadsajani pohuadeni mari ocanabaqqidsapa mittamana-jarajaripaja. <sup>12</sup> Nama nadsapa Dio Atti cacomerabote Isahia dsodo inapjarossa najaro. Isahia attipa:

“Qqui qqui toquinaraha pina qqui toquirahi nahitohui.  
Pohuadeni bodi pina ssamoqqiri najarissa nahitohui.

Diocca doseniji mimittamana naraha pina mittamanerahi nahitohui.

Mittamana-jaradsapa bodideni naco  
cacajiqquimeramana-jaradsapa Dio poccadeni  
imasiri epeje inana-jeranitohui”

napohui nade Isahia atti —nahi nade Jeso.

—*Huidsaja ppappadecca imapi ajima najarona paji* —najari Jeso

*Mateo 13.18-23; Roca 8.11-15*

<sup>13</sup> Nadsapa Jeso huati tajari: —Aji occa marinaja ajijaro namidsa imadinicca ima tadsajani tiadeni mari ocanabaqqidsapi ¿timittamana-jerajaroqui? Timittamana-jeradsapi occa marinaja ¿nejecoma najarodsana timittamananijine? onajaro —najari. <sup>14</sup> —Jidacca occa marinajapi ajima najaro: Huidsaja ppappadepa pina Dio Atti maridessa najari. Noccopa pina Dio Atti madijadsa totoja najarossa najaro. <sup>15</sup> Nocco huira inaridsajari mota jahuihuaji catojaripa pina madija Dio Atti mittamanaraha pohuadeni bodi iboqqiri nadsapa bodidenidsa Dio Atti toqquedsima-jerajarossa najaro. Aja ppiriri nocco saca inaridsajaripa pina maidsehe jinede Satana ccajonadsa

bodideni inassamobaquijarissa najaro. Nadsapa Dio Atti pohuadenidsa nohuerajaro.

<sup>16</sup> —Madija ohuaha bodidenicca imapi pina aji siba ccababa tajarocca imassa najaro. Dio Atti mittamanadsa amadsati huatidsemanajari. <sup>17</sup> Pohuadenipa Diodsa jehe dsanapomanahijineraha Dio Atti pohuadeni bodidsa toja-jerajaropi pina aja siba ccababa tanidsa nocco moro taraha jabo huapihuajira toccabaquijaricca imassa najaro. Nadsama aja maji ppoconejine botejaricca imapi Dio Attidsa jehe quinajarijine pohuadenidsa najidsohue ssonaridsa, ocasserani ahuamanadsapa jehe quidsati attideni: “Epejena, Dio Attipi inebona” quinajari.

<sup>18</sup> —Madija ohuaha bodidenicca imapi pina namidsa cotihi caji tajaricca imassa najaro. Pohuadenipa Dio Atti mittamanaraha <sup>19</sup> pohuadeni dsepedeni ihijimana najaro-tohuira disseraquiri nadsapa Dio Atti tocahatterahissa tajarajari. Dsiniro tohuira quinadsa naco najaro imajine poccadeni jeheniji maidsehe toja tani. Huapima pohuadeni tohuini quinajaricca tohuira bodideni huatomamanadsa naco Dio Atti huatideni ajamamanajari. Nama quinajaridenipa poccadeni jeheniji pina aja nocco moro taraha cotihijine ssomi tojadsapa bono-jarajarissa najaro. Dio Atti mittamanaraha pohuadenijine Dio Atti madija ohuahadenidsa toja-jeranitohui.

<sup>20</sup> —Naraha madija ohuaha bodidenicca imapi pina aji nami bica tajarocca imassa najaro. Dio Atti mittamanadsapa jehe quinahissa tajari. Poccadeni jeheniji napidsapi pina aja nocco nami bicanidsa moro tahissa tadsapa bono cajijari. Ede ojariapa bono 30 naha cajijari. Ede ohuahaccapa bono 60 naha cajijari. Ede ohuahaccana 100 naha cajiridsajari. Aja Diodsa jehe quinahissa tajaripa madija mari icanabaqqui-ridsadsapa

madija ohuaha ohuaha quinaha Diodsa inanabaqqi-manahitohui — nahi nade Jeso.

*Jojororo tahimari*

*Roca 8.16-18*

<sup>21</sup> Jesopa denima huati tajari: —Nadsama jorororo to-quehessidsa ssapotodsa boco icanahijine ¿bica taco? Bica tajarahi. Aja jorororo toquehessidsapa huahuada dopani-huaji tocanajimahijine jarahi. Jorororo toquehessidsapa aja pohua cacahittari nahidsana cacahittari najari, nahi madija huapima ssiajani cajimanahijine. <sup>22</sup> Nadsama jidapana ima ahuatora tanicca caji taraha nidsa dsotodepi ahuatoto tanitohui. Aji jidapana occa marinaja mota ahuatora tadsa timittamana-jeraraha nidsa dsotode tiadenidsa ahuatoto tadsana timittamananitohui, onajaro. <sup>23</sup> Nadsapi teribodeni ticajimanadsapi ohuatti timittamananissa taji, onajaro — nahi nade Jeso.

<sup>24</sup> Nadsapa huati tapomajari: —Najaro ohuatti tibodidendi huatonissa tadsa tecahuamanaji. Naraha timittamananissa tejeradsapi ticahattera-jeranitohui. Timittamananissa tadsapi ticahattereje dsanaponi nanitohui. <sup>25</sup> Aji tiadeni ohuatti tecahuamanadsapi denima ticahatteranitohui. Naraha occa marinaja timittamanaraha ohuatti tecahuamana-jeradsapi occa marinaja odininitohui, onajaro. Nadsapi tiadeni tiadenira ticamaidsanimanadsa naqui: “Dio Atti ocajini, nahato onani” tiquinaraha najaro naqui odininitohui. Paji, nemamana tejeraji, onajaro — nahi nade Jeso.

*Diocca cacahuehepi pina nocco moro tajarissa najaro*

<sup>26</sup> Jesopa ima onihui huati tajari: —Jehe, Diocca cacahuehe tojaridsajaropi pina ajijaro imassa najaro. Madijapa dsamatapa nocco huiru inaridsajari. <sup>27</sup> Dsomesapa huahuada najari, ssiaja nocco tojadsapa onihihuaji dsepe

ihiji najari. Naraha dsamatapa noccopa pohua ehuerahi moro moro tajari. Madijapa dsamatapa nocco moro inanahijine ssamo taraha Diona nahato tajari. Diojine moro moro tajari. <sup>28</sup> Jehe, nami bica tadsa tahidepa ede napijari. Dsotodepa mohue toccajari. Dsotodepa bono cajijari. <sup>29</sup> Nadsapa bono jadadsa jinede attipa: “Bono jadahi pore onana” nadsa porede toccajari. Bono pore inajari, jicadsapa pocca odsahuaji eccanijari. Jehe, Diocca cacahuehepi pina najaro imassa najaro —nahi nade Jeso.

*Jesopa mostaza noccocca ima tadsajani mari icanabaquijari*

*Mateo 13.31-32; Roca 13.18-19*

<sup>30</sup> Nadsama Jeso huati tapomajari: —Tibodideni huatomanaji. ¿Nejecoma najarona paji Diocca cacahuehe? Aji Diocca cacahuehe tahimarini timittamananijinepi ajijaro namidsa imadinicca ima onihidsa tiadeni mari ocanabaquina —nahi nade Jeso. <sup>31</sup> —Diocca cacahuehepi pina mostaza noccossa najaro. Mostaza noccopa potera tajari. Ppa nahi nocco ohuaha naco potera tahi caji taraha mostaza noccopa denima potera tajari. <sup>32</sup> Jehe, mostaza noccopa potera taraha ppa idsadsa napidsapa huidsajacca ppa nahidsa pohuana deni tojjari. Motaradsapa pohua ininedsa naco ppiriri pohuadeni tadsari eppe nahuinedsa bina tarimana tahi. Jehe, Diocca cacahuehecca ima mari ocanabaquijaripa pina najaro imassa najaro. Tahidepi madija pamahadsa tojapojaru, dsotodena madija huapimadsa tojaridsadsapi Diocca cacahuehedsa madija tohuapihitohui —nahi nade Jeso.

<sup>33</sup> Jesopa pohua tahimari ajijaro namidsa imadinicca ima onihi onihi najaro tadsajani mari mari ihicanabaquijari. Madija huapimadsa huati tadsapa pohuadeni mittamanahijine pajiraniccara mari icanabaquijari. <sup>34</sup> Pohuadenidsa huati tadsapa ajijaro

namidsa imadinicca imadsara mari mari ihicanabaqqui najari. Naraha dsotode pocca mamari tabaqquidsana pocca marinaja inahattabaqquijari.

*Jesopa jojode inatappa ssodadani inatappa nanicca ima  
Mateo 8.18, 23-27; Roca 8.22-25*

<sup>35</sup> Najaro ssiajadsa maji tonahuidsas Jesopa pohua huatimadedenidsa huati tajari: —Jina, coridsa jippehuaji jaijana —nahi nade. <sup>36</sup> Nadsapa pohuadsa queriquimanagerideni inebobaqquijari. Jesopa najaro canoadsa huitaridsa maride tojaraha maride jicadsa paja iaccamanarihi najari. Madija ohuahadeni naco canoa onihidsa tohuaccamissamanajari. <sup>37</sup> Jai tojadsapa jojode dacorehema ccajona, passo dacorehema ccajona nadsapi coridsa ssoda ssoda najarojine canoadsa passo ssonidsa ssonidsa najaro.

<sup>38</sup> Naraha Jesopa canoa dsotonihuaji pohua tati poponima ibemadsa tohuittamissadsa huadajonajari. Nadsapa Jeso pohuadsa huahua quinajari: —¡La Maride nocco tijajil! ¡Je icanabote nani! ¿Nema nehe poni ijicanijinequi? —quinajari. <sup>39</sup> Nanaja Jeso nocco tojadsa toتهمadsa jodedsa passodsas huati tajari: —¡Epeje taji! ¡Mohua tejerajil! —nahi nade. Naneje jojode, passo ssoda ssoda najaro naqui joma najaro. Joma nadsapi passo podsippanissa tajaro. <sup>40</sup> Nadsapa pocca mamari tabaqquidsas huati tajari: —¿Nejecotohui ticappinamanajaro? Tiadenipi ohuadsa: “Jehe, Jesopa ia tohuacahua-baqquihijine pajirahi” ¿tiquinejerajarorane? —najari Jeso.

<sup>41</sup> Naraha pohuadenipa cappinamanajari. Bodideni jabojo quinadsa pohuadenira imahaha canajari: —Aja ia Maridepa ¿nejeco madija? Pohuapa jojode, passo ssodadanima quejema naraha jodedsa: “Epeje taji” nadsa jojode joma naha —quinajari.

## 5

*Jerasahuajicca madija bodidsa Satanacca dodosse tocorime madidsajari*

*Mateo 8.28-34; Roca 8.26-39*

<sup>1</sup> Aja coridsa jippehuaji bacco toquinajaricca dsama oninipi Jerasa. <sup>2</sup> Nahidsana Jesopa toqqemoraraha madija bodidsa Satanacca dodosse tocorime madidsajari tonoccobirihuaji qqenadsa Jesodsa bacco dsippajari. <sup>3-4</sup> Puhuapa tonoccobiri caji tanihuaji mamadi najari. Nadsapa nahi Jerasahuajicca madijapa biji jore quinaraha joca tajojo, joca tajojo najari. Isso naco jore quinaraha ttai tajojo, ttai tajojo najari. Cadenadsa naco jore quinaraha pohuajine tajoppi tajoppi najaro. Jore quinapomadsa naco nama dsanapodsapa pohuaha deni tojadsanapojari. Jore quinadsa ecahuanahijineraha jojorededeni ajamani toquejenadsapa paja inebomanarihi najari. <sup>5</sup> Puhuapa ssiaja ccaridsa, dsome ccaridsa nanaridsa najari. Johua johua nanaridsa najari. Ssonohuaji ccaridsa, tonoccobirihuaji ccaridsa nadsapa sibadsa pohua ime ca jeo, ca jeo tonanamarojari. <sup>6</sup> Nanaja Jeso huaji tanidsa qquemorahi qqui tadsapa joppa najonajari, Jeso baccokuva pohua pitodsa huitta najari. <sup>7-8</sup> Naraha Jesopa amadsati pohua bodiccadsa huati tajari: —¡Tocorime, najari madija tinebojo! —najari. Nadsapa tocorime jadsirema huati tajari: —Jeso ¿nejecotohuira ticcajonaroneje? ¿Ohua najidsode ticcajonaroqui? Tiapi Dio deni tojajaricca Ejedeni tijani. ¡Dio onima ohua tinajidso tejeraji, onaha! —najari. <sup>9</sup> Naraha Jesopa tocorimedsa huati tapomajari: —¿Tia onipi nejeco? —najari. —Ohua onipi Siba tani, tocorime huapi inani —nahi nade.

<sup>10</sup> Nadsapa madija bodicca tocorimedenia Jesodsa huatide disseraqquri najari: —¡Ajijaro dsama huaji tanihuaji ia dosse tinabaqqi tejeraji, inaha! —quinajari.



<sup>11</sup> Naraha nahi ssono huajira tanidsa poroco huapi taha jiparidsamanajari. <sup>12</sup> Nadsapa tocorimedeni Jesodsa huati toquinapomajari: —Poroco huapimadsana ia dosse tid-simabaquiji. Nanidsana iquejenana —quinajari.

<sup>13</sup> Nadsapa Jeso: —¡Jehe, porocodsana tiquejenana! —najari. Nadsapa najari madija bodicca tocorime jahininedsapa porocodsana jai tojedsimaridsajari. Nanaja porocopa coridsa inidi sseberanihuaji domo toqquedsippadsa diri-ri-ri todsippadsapa cojo-jo-jo quinajari, toca-tojedsippajari. Poroco huapimapa 2 mil quinajari. Coridsadsa je tocaniredsapa cacotedsanajari.

<sup>14</sup> Nadsapa poroco cacahuadedenipa ahuajicca odsa pananihuaji ima joppa tocanajari, ohuahapa huidsajahuaji ima joppa tocanajari. Nama naridsamanajari. Ima inaridsamanadsapi cattade jahijonana canajari, madija huapima. <sup>15</sup> Nadsapa qquide jahijonadsapa Jeso huahihuaji bacco najonamanajari. Aja madija tocorimedeni cajipojaripa tonomihira qqui toquinajari. Nahidsa huitta canajari. Etero huedsapomajari, bodi huatohue naco cajipomajari. Nadsapa madija huapima cappinamanajari. <sup>16</sup> Qqui toquinapojaridenia aja madija bodicca tocorimedeni jahininejari tahimari huati, poroco tahimari huati toquinajari. <sup>17</sup> Nadsapa poccadeni dsamadsa Jeso tocanihijine dossede dissassera tajari: —¡Ticcaniji, aji icca dsamadsapi timadi tejeraji! —quinajari.

<sup>18</sup> Nadsapa Jeso toqquedsippanidsapa canoadsa toqquedsanijari. Nadsapa madija tocorime cajiporaha tonomijaripa Jesodsa huahua najari: —¡Ohua naqui tiadsa occana! —najari. <sup>19</sup> Naraha Jeso attipa: —Poni, ticcaniji. Ticca odsahuaji ticca madijadsa tijaniji. Ticca madija huati tinabaquina: “Onomijaropi Djojine. Diopa ohuadsa huati huana tajari” tinanina —nahi nade Jeso.

<sup>20</sup> Nadsapa toccanidsa pocca ima huati naridsajari. Dsama arobeni Decaporicca odsa huapimadsa pohua tonomihicca ima, Jeso pohua inanomihicca ima huati taridsajari. Nadsapa huapima mittamanadsapa: —A, Diojine bica taha —quinahi nade.

*Jairo bedeni tonominicca ima, Amoneje amaisoranaja coma taraha tonominicca ima*

*Mateo 9.18-26; Roca 8.40-56*

<sup>21</sup> Jesopa pohua huatimadedeni tedseje canoadsa jippe-huaji tohuaccanimanajari. Bacco tanimanadsapa madija Jeso qquide jahidsippappa canajari. Jesopa coridsa inididsa huajari. <sup>22</sup> Nanaja jodiodenicca Dio Atti mamarihuajicca tamine ojaría naco ccajonajari. Pohua onipa Jairo. Jesodsa bacco najonadsapa pohua bodipa: —Jesopa deni tojahi, ohuapi ajimani ojani —nadsa Jeso baccohuaji pohua pitodsa huitta nadsa tocattedsa najari. <sup>23</sup> Nadsapa Jesodsa huati tajari: —Occa ejedeni amoneje bedeni tomijirani. Jina, occa odsahuaji icadaccana. Tidsepedsa poni bara tadsa tonomidsa madipomanijine —nahi nade Jairo. <sup>24</sup> Nadsapa Jeso Jairo tedseje jahui tohuedanijari. Naraha madija huapima Jesodsa cahuaja dsanapojarijine Jeso queberibote dsanapojari.

<sup>25</sup> Madija huapima jai tojahidsa naqui amoneje coma tajaro tohuanajaro. Ponipi dsamacoma onini amaisoranaja cajijaro. Poni coma tanicca huajanopa 12 naraha ama jicaquera tanicca totonahana dsanapojaro.

<sup>26</sup> Coma tadsa toponi totonanomidedenihuaji ponima tocca naraha tonomi-jerajaro. Denima coma dsanapojaro. Toponi totonanomidedenidsa poni manaconi cajicaridsajaro. <sup>27-28</sup> Naraha Jeso tahimari madija huati huati toquinahi mittajaro. Nema najaroa aji Jesotohui toccajaropaji. Poni bodinipi: —Pocca eterora bara onadsapi onominitohui —najaro. Madija si tocajajari canajonaraha

amoneje coma tajaropi Jeso nattihuaji toccamissadsa tohuajiressissi nadsa pocca etero bara inajaro. <sup>29</sup> Naneje amadsati amani amossi najaro. Nadsapi poni doroni comani tomossini nahato tajaro.

<sup>30</sup> Nadsapa Jeso pohua bodi nahato tajari, pocca dacorehejine madija inanomijaro. Nanaja amadsati Jeso pohua nattihuaji piti nahuajanidsa huati tajari: —¿Nejecojari occa etero bara inajaroneje? —najari. <sup>31</sup> Naraha pohua huatimadedeni attidenia: —Madija si tocajajari canajonajaripa. Naraha tiapi: “¿Nejecojarina ohua bara najari?” tajaro —quinahi nade. <sup>32</sup> Naraha Jeso pohua bara najari tohui ahuaji qqui, ahuaji qqui naridsajari. <sup>33</sup> Nadsapi amoneje cappinehe ccajonadsa tacca-cca canajonajaro. Jeso baccohuaji poni pitonidsa huitta nadsa poni camerajaro: —Ojinepa —najaro. Nadsapi poni amaisoranaja cajijaro Jeso pocca etero bara inadsa amadsati tomossijarocca ima huati tajaro. <sup>34</sup> Nadsapa Jeso ponidsa huati tajari: —Jehe asi, ohuadsa tibodi: “Jehe, Jeso ohua tonanomihijine pajirahi” tadsapi najarohne ticca dsamacomapi toccapa. Ticcanidsapi ticappina tejerana. Najaro comanidsa quidsa tapoma-jeranitohui —najari.

<sup>35</sup> Nahidsa Jeso huati huati taraha, jodiodenicca Dio Atti mamarihuajicca tamine pocca odsacca madija bacco najonamanadsa ejedeni imehidsa huati toquinajari: —Jairo, ticca ejedeni dsoqqueni. Jidapapa ia Maride ccajonajarana. Dsoqqueni. Epejeni, poni —quinajari. <sup>36</sup> Nama quinaraha Jesopa Jairodsa: —Tibodipi ticappina tejerana. Pina “Jehe, poni tonominijine” tana —nahi nade Jeso atti. <sup>37</sup> Jeso pohua natti jai tojamissajarideni pohuadsa jai toja-jarahijine Jeso eccocobaquijari. Naraha pohuadsa jai tojahijinepa Pedro, Satiaco, Huano quinajari. Aja Huanopa Satiaco ohuaha. Pohuadenira jina inabaquijari.

<sup>38</sup> Nadsapa Jairocca odsahuaji jai toja, bacco toquinajari. Bacco toquinadsa pina mohua mohua camajarissa najari Jeso qqui tajari. —Ejedeni dsoqqueni —quinadsa jadsirema oji oji camajari, johua johua camajari. <sup>39</sup> Odsadsa toqquedsimadsapa Jeso huati tajari pohuadenidsa: —¿Nejecotohui ticcadeni ojie dacorajaro? ¿Nejecotohui johua johua ticamajaro? Ejedenipi dsoqqe-gerani. Huadani —nahi nade Jeso. <sup>40</sup> Naraha pohuadenipa Jeso atti jaja icanamanajari.

Naraha Jesopa madija huapima dosse ininebaqquijari amossinihuaji. Nadsapa Jeso, pohua huatimadedeni, ejedeni imehi, imeni quinadsa ejedeni huatiajaro porinihuaji jai tojedsimajari. <sup>41</sup> Nadsapa Jesoa ejedeni dsapani equididsa pohua attidsa huati tajari: —Taritta ccomi —najari. (Najaro ettidsapi: —Ejedeni, titehemaji —najari.) <sup>42</sup> Naneje ejedenipi amadsati camittemanidsapi totehemajaro. Nadsapi ccaridsajaro. Huajanorini 12 najari. Najaro ejedeni ccaridsadsapi madija huapima jabojo quinaraha huatidsemanajari: —A, apaja bica tahi —quinajari. <sup>43</sup> Nadsapa Jeso atti pohuadenidsa: —Ajijaro imapi huati taridsamana tejerana. Poni —najari. Nadsapa Jeso attia: —Ticcadeni ejedeni tinajipamanaji —nahi nade Jeso.

## 6

*Jesopa Nasaretihuaji toccanidsa mari icanabaqquijari*  
*Mateo 13.53-58; Roca 4.16-30*

<sup>1</sup> Nadsapa Jeso pohua madihidsa nebo pohua napihihuajina toccanijari. Pohua huatimadedenima jai tojanijari. <sup>2</sup> Odsa panani Nasreti bacco tanidsapa jassinajacca huadadsa Dio Atti mamarihuaji toqquedsimadsa mari icanabaqquijari. Nadsapa nahicca jassi tarijarideni mittamanadsapa huajo caniredsapa: —A ¿nejecohuaji

tohuattajaritta? —quinajari. —¿Nejecojaricca nahatohue Jesodsa tojajarotte? ¿Nejecoma nadsa madija ihinanomi najari? Pohuapa canahatoriri canahi qqui qqui ihinanajaraccade —quinajari. <sup>3</sup> —¿Naraha ajararipa ahua cocobade jaraco? ¡Ahua cocobadedija, Maria bedia! Pohua imecotedeni naco: Satiaco, Dsodse, Joda, Ssino quinaripajade. ¿Pohua caripenedeni naqui aji imadinidsa madimana-jeraqui? Madimanani —quinahi nade. Nadsapa pohua atti mittade tojiperamanajari. <sup>4</sup> Nadsapa Jeso attia: —Ohuadsa pajissa tiquinejeradsapi pina Dio Atti cacomeraquuri najarideni tahimarissa tinanamana-jaro: Madija huapimapa aja Dio Atti cacomerabotedsa: “Pajissa Diocca dossenijia” quiquinanaraha aja pohua dsamariccapa nama quina-jarahi. Pohua imecotedeni, pocca odsacca naco pohua attidsa jiperaquuri naha nama najonamanajari —nahi nade. <sup>5</sup> Nadsapa nahihuaajicca madija Jesodsa pajissa quina-jaradsapa pohua canahatohuajapohui canahicca huapi tejerani. Madija pamahara bara inabaquidsapa inanomibaquijari nade. <sup>6a</sup> Nadsapa pocca odsahuajicca madija jehe quina-jaradsapa Jesopa pohuadenitohui pohua bodi huato-dsanapojari.

*Jesopa pocca dodosse tabaqqui 12 quinaha madija maride dosse inaridsabaquijari*

*Mateo 10.1-15; Roca 9.1-6*

<sup>6b</sup> Nadsapa odsa onihihuaji odsa onihihuaji Jesopa mari mari naridsa najari. <sup>7</sup> Nadsapa pocca dodosse tabaqqui 12 quinajari huahua inabaquidsa dosse inabaquidridsajari. Ahuajicca jahui topama, ahuaajicca jahui topama, ahuaajicca jahui topama quinahijine dosse inabaquijari. Jesopa pocca nahatohue pohuadenidsa inanaridsajaro. Madija bodidenicca tocorime naco dosse inineridsabaquihijine pohuadeni inapajirabaquijari. <sup>8</sup> Nadsapa

benehidsa jai tojadsa pohua attissa inanamananijine Jeso pohuadani mari icanabaquijari. Pohua attipa: —Jehe ticadani benehidsapi tidsepedenitaji dsojo tiquina tejeraji. Tidsepedenidsapi tiadani totocahuejidsara dsojo dsojo tiquineri naji. Dsamatapa naco tiaccamana tajarajo. Saco naqui tiaccamana tejeraji. Dsiniro naqui tiaccamana tejeraji. <sup>9</sup> Temoridenicca sadaria naco aja tedsamanajarira ohojariri najo. Ticcadeni etero naqui pamehepi tiaccamana tejeraji, aji tedsamanajarora ohojariri tinamananaji, onajaro —nahi nade Jeso.

<sup>10</sup> —Nadsama odsa panani onihi bacco tiquinadsapi aji ticadedsimapojarocca odsadsara timadimanaccana. Denima ticada-jeraccadsa najaro odsadsara timadimanaccana. <sup>11</sup> Naraha odsa pananihuaji bacco tiquinadsa madija: “Ajidsapi timadimanaji” quina-jaradsapa, aja ticcadani marinaja mittade jiperaquiri nadsa naco najaro odsadsa ticadequimani bica tani. Madija nama quinahicca odsa tinebomanadsapi temoridenicca sadariadsa ssiqui ma tajaro catojanijine pporo pporo tiquinana. Nahi poccadeni ibohue bodidani huatoma-manahijine, onajaro —nahi nade Jeso.

<sup>12</sup> Nadsapa pocca dodosse tabaqqi jai tojajari. Madija bodidani cacajiquimera-manahijine mari icanabaquidriksamanajari. Pohuadani attipa: —Imasiri tinebomanaji. Diodsara tiquejenaji —quinahi nade. <sup>13</sup> Madija bodidenicca tocorime ohuaha ohuaha naridsajaridani naco dosse dosse ihimaridsamana najari. Madija comaquiri najaridani naco ihinanomi-ridsabaquimana najari. Oqui badsira taha tatidenidsa sso sso ihinariridsamana nadsa Diodsa huati huati totoquina nadsapa Djojine totocanomireridsa najari.

*Huano Baotista dsoqquehicca ima  
Mateo 14.1-12; Roca 9.7-9*

<sup>14</sup> Nadsama dsama arobeni Carireahuajicca tamine Herodepa Jesocca ima huati toquinahi mittajari. Jeso canahatori canaridsahicca ima naqui tojaribaquije najaro. Nadsapa Herode attia: —Jesopa Huano Baotista dsoqqueraha nahatonijari. Najaro nahatonihejine canahatori canahi —nahi nade. <sup>15</sup> Naraha madija ohuaha attidenipa: —Jesopa maittaccadsamacca Dio Atti cacomerabote madipojari Eria ccanipomajari itidija —quinahi nade. Madija ohuaha attideni naco: —Aja Jesopa pina maittaccadsamacca Dio Atti cacomeraquuri najaridenissa najari —quinahi nade. <sup>16</sup> Naraha tamine Herodepa madija nama quinahi mittaraha pohua attia: —Jesopa Huano. Nahato onani. Soldado ocadossebaquidsa Huano matto ca ijidsamanaraha nahatonijari —nahi nade.

<sup>17-18</sup> Nadsama Herode atti nama nadsa tahide pohujine Huano Baotista inanadsoqqe-manapojari. Najaro imapi ajima najaro: Tahidepa tamine Herode pohua imecote Feripecca amoneje Herodia icajidsa ima tojajaro. Huanopa poccadeni ima mittadsa Herodedsa huati tajari: —Diocca dossenijidsapi timecotecca amoneje tidijidsadsapi bica tejerani —nanaja najari Huano. Najaro ima Herodia mittadsapi Huanodsa huadijaro. Ponicca maquidsa dosse dosse nadsa tamine Herodepa pocca dodosse tabaqui idossebaquidsa Huano dama quinadsa toponi cocoro todsimadsa coro idsimamanajari. <sup>19</sup> Herodiapi Huanodsa jipera tadsapi pohua inanadsoqqe-manahijine tohuini nadsa maquidsa huati taraha poni attinidsa jehe najaraccai. <sup>20</sup> Herode cappinadsa: —Huanopa bica tahi. Diocca dosseniji —nanaja nadsapa ecahuahissa tajari. Nadsapa Huanocca marinaja mittadsapa pohuadsa bica taraha ibo tadsapa: —¿Nejecoma onapadseje? —najari. Naraha nama naha Huanocca marinaja mittahijine pohuatohui

huahua huahua dsanapojari.

<sup>21</sup> Naraha huada onihidsa tamine Herode pohua tossonahicca huada bacco tadsa ejete inanajaro. Nadsapa jipacquimanahijine huahua inabaquijari, tamededeni, soldado dossededeni, Carireahuajicca ime jocohuideni, pohuadsa jipacquimanahijine. Nadsapi Herodia najorajaro ponicca ima. <sup>22</sup> Herodia bedenipi dsobi nanijine toqquedsimajaro. Nadsapa tamine Herode, pohua tessedeni tedseje ponicca dsobinaja bica tani qqui toquinadsa, ponijine huatidsemanadsapa dsohuatodsa tamine Herode attia: —Jari jata, ticca huatinaja ohuadsa huati tinaji. Nadsapi ticca huatinaja da onanitohui —najari. <sup>23</sup> —iPajissa! Dio nahato tahi. Tia ocamaidsa-jerajaro. Occa dsama arobenitohui huati tinadsa naqui tiadsa da onanitohui —nahi nade tamine Herode atti. <sup>24</sup> Najaro ima mittadsa dsohuato toqquenadsapi imenidsa huati tajaro: —Ami ¿nejecora huati onanijine? —najaro. Nadsapi imeni attinia: —Jari jata, Huano Baotista tatitohui huati tinaji —nani nade. <sup>25</sup> Nadsapi taminehuaji huassinaja toqquedsimanidsa ponicca huatinaja huati tajaro: —Jidapanana Huano Baotista tati parato imehidsa huittidsadsa ohuadsa da ticanajo —nani nade. <sup>26</sup> Nadsapa Herode pohua bodi Huano dsoqquehijine jipera taraha pohua atti tahide: —Dio nahato tahi. Tia ocamaidsa-jerajaro —nanaja napodsa aja pohua tessedeni: —Pajissehe huati tajari —quinahijine tohuini nadsa: —Ohuattissa onananitohui —nahi nade. Nadsapa poni attinidsa jehe najari. <sup>27</sup> Nadsapa pocca dodosse dosse inajari, Huano matto ca ijidsadsa tati dsojo icadsimaninijine. Nadsapa pocca dodosse toponi cocorohuaji toccajari, Huano matto ca ijidsajari. <sup>28</sup> Tati paratodsa ettidsadsa dsojo icadsimanidsapa dsohuatodsa da icanajari. Ponina imenidsa da icaniquimajari. <sup>29</sup> Dsotode Huano pohua huatimadedeni ima mittamanadsapa as-



siretohui jahijonajari. Ppa idsamanahijine dsojo ininemanadsapa siba odinidsa ibedsamanajari.

*Jeso madija 5 mil quinajarideni inajipabaquijari*  
*Mateo 14.13-23; Roca 9.10-17; Huano 6.1-15*

<sup>30</sup> Nadsama Jeso pocca dodosse tabaqqi dosse inabaquipojarideni jahiniquijari. Jesodsa poccadeni benehicca ima huati nanimanajari: —Ima bicani dsati mari icanabaqqi-ridsadija. Ticca deni tojehe iadsa tinanajarojine madija coma tajari naco inanomibaqqi-ridsadija —quinahi nade. <sup>31</sup> Nahidsa pohuadeni madimanahihuaji madija Jeso tohui quinadsa jahijonana canajari. Madija caji tadsa Jeso, pohua huatimadedeni tedseje dsepedeni ijimanahissa tadsapa jipamanahijine pajiramana-jarahi. Nadsapa: —Jina, madija madide nohuerahihuaji jaijana. Nanidsana jassi inaccana —nahi nade Jeso.

<sup>32</sup> Nama nadsapa Jeso pocca dodosse tabaqqi tedsejedeni todidi tanihuaji jassi quinahijine canoadsa tohuaccamanajari. <sup>33</sup> Naraha madija Jeso toccahi qqui toquinadsapa: —A, Jeso pajamarahihuaji toccahijine —quinajari. Nadsapa madija odsa onihi onihi naridsanicca jai tojabacossadsa Jeso tedsejema bacco toquinapojari. Naraha dsotode Jesopa pohua huatimadedeni tedseje canoadsa bacco najonamanajari. <sup>34</sup> Huana tocanamanadsa Jeso toqquemoradsapa madija domo hueri nahi qqui inabaquijari. Pohuadenipa pina edede pohuadeni cacahuade jiraha pohuama mamadiri naridsamanajarissa quinajari. Nadsapa Jeso pohua bodidsa: —A, tohuati nahanaqquri nahi —nadsa pohuadenitohui huati cahanari canajari. Nadsapa pocca ima onihi onihi nehe pohuadeni mari icanabaquijari.

<sup>35</sup> Maji toccadsa pohua huatimadedenipa Jeso pohuadsa huati toquinajari: —Jaho, maji toccahi —quinajari. —Ahuajipa madija madide nohuerahi —quinahi nade. <sup>36</sup>—Madija dosse tinanibaquijo. Ahuajipa dsamatapa mitta quinahijine nohuerahi —quinajari. —Aji, odsa huajira tanicca dsamatapa mittade jai tojanina —quinahi nade.

<sup>37</sup> Naraha Jeso attia: —Tiadeni tinajipabaquimanajo —najari. Naraha pohuadeni attipa: —Taparideni mittade jaijanijinepi dsiniro huemani pina 200 denario icajidsana pajiraraha ¿iana pohuadeni taparideni mittade jaijanijinerane? —quinahi nade. <sup>38</sup> Nadsapa pohuadenidsa huati tajari: —¿Nejecoma naha pan ticajimanani? ¿Qui taridsamanajo! —nahi nade Jeso. Pan, aba qqui toquinadsapa pohuadsa huati nanimanajari: —Pan 5, aba pama napaja —quinahi nade.

<sup>39</sup> Nadsapa Jeso madija huapimadsa huati tajari: —Nani dsero napidsati caji tanidsa tiadenira jassi jassi tineri naridsaji —najari. <sup>40</sup> Nadsapa madija 100 quinaha queriqquidsa jassi tajari. Madija 50 quinaha queriqquidsa jassi tajari. Ohuahadeni naco totoqueriqquiri naridsadsa jassi taridsajari. Huapima nama naridsamanajari. <sup>41</sup> Nadsapa Jeso pohua dsepedsa pan inacca, aba idsaba nadsapa memehuaji qqui tamacossadsa Diodsa huati tajari: —Jehe, epejeni. Ticca daniji iadsa bica tahi —najari. Nadsapa Jeso canahatori canajarijine pan, aba najari tohuapidsa icanabobiridsadsapa pohua huatimadedenidsa da inabaquijari. Nadsapa pohuadenina madija jassi jassi teri najaridenidsa da inabaquiridsamanajari. <sup>42</sup> Nadsapa jipamanadsapa accararidsamanajari. <sup>43</sup> Jipamanahissa taraha mota tojajari. Pan bobi, aba ime mota inaccaniridsa-manadsapa quiqui 12 naha ijiridsajari. <sup>44</sup> Nadsama pan jipamanajaridenipa

maqquideje 5 mil quinajari.

*Jeso passo tetepi ccajonajaricca ima*  
*Mateo 14.22-33; Huano 6.16-21*

<sup>45</sup> Nadsapa canahatori canahicca pan jipamanahi nat-tipa Jeso pohua huatimadedeni coridsa jippehuaji dosse inabaquipojari: —Jari, canoadsa jai tijedsadsapi tahide odsa panani Besaidahuaji jai tijapoji, onajaro —nahi nade. Naraha Jeso pohuapa ibocajari. Nadsapa madija huapimadsa naco huati tajari: —Epejeni, jai tijanina —nahi nade Jeso. <sup>46</sup> Nadsa jai tojanidsapa Jesopa ssonohuaji denima toqqemorajari, imehi Diodsa huati tahijine. <sup>47</sup> Jeso pohua motta nahi ssonohuaji Diodsa huatide tojadsa cad-somejari. Naraha pohua huatimadedenipa coridsa nocconi ori toquinahi paja naccaraha. <sup>48</sup> Nahidsa Jeso qqui icanamissabaquijari. Ori ori quinaraha jojodejine canoa quehenacossajaro. Ssijaricossadsa Jeso toqqedsippanidsapa passo tetepi toccamissajari. Pina ssiqui toccajarissa najari. Pohuadeni natti toccamissajari, pohuadeni inori tossoniquimahitohuiraha. <sup>49</sup> Pohuadeni inorihuaji qqui toquinanaja passo tetepi ccajonahi qqui toquinadsapa johua johua quinajari: —¡Tocorime itidija! —quinajari. <sup>50</sup> Pohua huatimadedeni huapima qqui toquinadsapa jabojo quinajari. Nadsapa Jeso: —¡Ticappinamana tejeraji, ohuapi ohua! —nahi nade. <sup>51</sup> Nadsapa canoadsa toqqedsanidsapa jojode totappajaro. Naraha jabojo-mana najarijine cappinamanahi paja naccajari. <sup>52</sup> Jeso huatimadedenipa Jeso pocca nahatohue aja pan da inabaquidsa inapajira-ridsabaquihi qqui toquinaporaha bodideni ssamoqquri najari. Pohuadeni bodi Jeso tahi-mari mittamanahijine pajiramanahissa tajarajari. Bodi-denidsa ahuatora tajaro.

*Jenesarehuaji Jesopa comaquiri najari inanomiridsa-baqqijari*

*Mateo 14.34-36*

<sup>53</sup> Nadsapa Jeso pohua huatimadedeni tedseje coridsa jippehuaji tohuaqqejidsamanajari. Dsama onini Jenesare bacco toquinajari. Huana tocanamanadsapa canoa ssoque icadsanamanadsa jai tojemorajari. <sup>54</sup> Nadsapa jai tojemoradsa nahihuaji madimanajarideni Jeso qqui toquinajari. <sup>55</sup> Nadsapa madija comaquiri najaridenitohui domodeni toccaniridsajari. Jeso ccaridsahihuaji comaquiri najari taborodenima ihiaccamissa-baqquimana najari. <sup>56</sup> Jesopa odsa onihihuaji toccadsa, dsotode odsa capamanihuaji toccadsa, odsa pananihuaji toccadsa naco madija pahuatohui bacco bacco nanajonamana najari. Huapima comaquiri najari inanomibaqquihijine pohuadsa eheccajona-baqquimana najari. Pohua tedsejema jahuidsa, boronidsa naco ehequibaridsamana najari. Jesodsa huahua huahua quinajari: —Jeso ohua tinanomiji! ¡Ticca etero iponira bara onanijine ahuaji ticcajonaji! —quiquinanajari. Nadsapa pocca etero iponi bara quinarideni huapimapa tocanomireridsahissa tajari.

## 7

*Jodiodenicca marinajajine Diocca dosseniji huahuattajo tojajaro*

*Mateo 15.1-9*

<sup>1</sup> Nadsapa huada onihidsa odsa panani Jerosarehuajicca jodiodeni marinaja pariseodsa jehe quinajarideni, jodiodenicca marinaja maridedeni tedseje Jesodsa bacco najonamanajari. <sup>2</sup> Najari pahuadenina Jesocca mamari tabaqqi pahuadeni dsepe ssahuarahi jipamanahi qqui toquinajari. Najaropi pahuadenidsa bica tejerani. Pina

imasiri inanamanajarossa najaro, quiquinanajari. Aja jodiodeni poccadeni ididenicca marinajadsa iboqquiri nadsapa oppina tani quiquinanajari. <sup>3</sup>Jodiodeni huapima, pariseodeni naco poccadeni ididenicca marinaja huapi tehe ecahuajonamanajaro. Najaro marinaja motapi jipamanabote nadsapa pohuadeni dsepe ssahua ssahua quiquinanapo najari. Najaropi obani noppineni jerani. Madija ohuaha aja jodio quejena-jarajarideni tedseje quemamanajari noppine. <sup>4</sup>Jodiodenipa dadahuaji jahinidsa naco tahide pohuadeni dsepea ssahua quinapodsana jipipamana najari. Poccadeni jijipajinecca huapima pina parato, queneco, panera naqui ssahua ssahua quiquinanajari. Diocca dossenijipi nema nejeraraha jodiodeni poccadeni marinaja huapi tehe Dio Attidsa inaharimanajaro.

<sup>5</sup>Nadsapa pariseodeni, jodiodenicca marinaja maridenedeni tedseje Jesocca mamari tabaqqi pohuadeni dsepe ssahuarahi jipamanahi qqi toquinadsapa Jesodsa huati toquinajari: —¿Nejecotohui ticca mamari tabaqqipa jodio quejenaraha icca ididenicca marinaja ecahuamanajerajaro? Ajana, pohuadeni dsepe ssahuarahi jipamanadsapa Diodsa bica tejerani, iadsa naqui oppina tani, ihinanajaro —quinahi nade.

<sup>6</sup>Nadsapa Jeso pohuadenidsa huati tajari: —A, tiadeni naqui Diocca dosseniji nahatoqquiri tiquinaraha tecahuamananissa tejerajaro. Tiadenipi maidsehe ticajimanani. Maittaccadsama Djojine Pohua Atti cacomerabote Isahiapa ticcadeni imassa nehe dsodo inapojaro. Jidapanana najarossa najarodsa timadimanajaro. Ajana, maittaccadsama Djojine Isahiapa:

“Ajajarideni madijapa ohuadsa: ‘Dio, tiapi bica tinani’ quiquinanaraha pohuadeni bodidenidsa otohui quina-jarahi.

<sup>7</sup> Pohuama ohuadsa jiri jiri quiquinanajari. Pohuadeni maride naco: ‘Dio Atti mari mari inajaro’ quiquinanaraha madijacca marinajara mari mari nanaridsamana najari”

napohui nade Dio.

<sup>8</sup> Ajina, madijacca marinajana tiadenidsa denima bica tadsapi Diocca dossenijipi tinebomanajaro —nahi nade Jeso.

<sup>9</sup> Jeso denima huati tapomajari pohuadenidsa: — Ticcadeni madijacca marinajadsa disseraqquri tiquinadsapi Diocca dosseniji ponima tinanamanajaro. <sup>10</sup> Pina ajjaro imassa najaro Diocca dosseniji Moisesi huati iqqumajaro:

“Ticcadeni abidsa, ticcadeni amidsa tetideni huanaqquri nana. Pohuadenitohui tetideni huanaqquri nadsa attidenidsa iboraqquri tiquinana” napohui nade.

Pohua atti naqui: “Madijapa imehidsa, imenidsa imasiri inanadsapi manaco najaripa dsoqquehitohui”

napohui nade Dio Atti, Moisesijine dsodo nanidsa.

<sup>11</sup> Naraha tiadenidsapi ima ajima najarona bica tajaro: “Madija imehidsa, imenidsa pohua attipa: ‘Jaho, tiadeni acco ocamabaqquinijineraha ocajjaro huapimapa Diodsa da onahijine onapodsapi tiadeni acco ocamabaqquinijine opajira-jerani’ quina tahi.” <sup>12</sup> Nadsa tettidenipi:

“Jehe, madija nama nadsapa epeje, poni, pocca abidsa, pocca amidsa da inejerana” tiquinaraha. <sup>13</sup> Ticcadeni madijacca marinaja tipotemanidenidsa mari mari tatajonamana najarodsana: “Bica tani” titiquina nadsapi tijinedeni Diocca dosseniji pajissacca huahuattajo tojajaro. Ticcadeni madijacca ima najarossa najaro caji tani —nahi nade Jeso.

*Tabaccorehe madija bodidsa ahuatomadsapi imasiri toja tani*

*Mateo 15.10-20*

<sup>14</sup> Dsotodepa Jeso madija pohuahuaaji jahijonahijine tohuideni huahua napomajari. Pohuahuaaji bacco najonamanadsa Jesopa: —Jari, huapima ohuatti titaharibobo canaji, timittamananissa tanijine. <sup>15</sup> Tiadenidsapi jijipa oppina tahicca caji tahi. Madija nama nahicca jipadsapa tettidenipi: “Diodsa bica tejerani, Moisesicca marinajadsa naqui oppina tani” titiquina najaro. Naraha ohuattipi ajima najaro: Huapima itaparipa dappi inadsa ibodidsa tojadsapa imasiri toja-jerani. Naraha ebenodsa huati huati ihinanajarojinena madijadsa imasiri ihinanamana najaro. [ <sup>16</sup> Nadsama teribodeni ticajimanadsapi ohuatti timittamananissa taji, onajaro —nahi nade Jeso. ]

<sup>17</sup> Nadsapa Jeso madija inebobaquidsapa odsadsa toqquedsimajari. Nahidsa pohua huatimadedeni pohuadsa huati toquinajari: —Ia Maride ¿ticca marinaja nejecoma najaro? —quinahi nade. <sup>18</sup> Nadsapa Jeso attia: —¿Tiadeni naqui ohuatti timittamana-jerajaroqui? Nema nadsapi timittamananissa tanijine tiadeni mari ocanabaquipo-mana. Aja itapari huapima dappi inadsapa ibodidsa imasiri toja-jerani. <sup>19</sup> Itaparipa ibodi huahuato nanihuaji toqquedsima-jarahi. Itaparipa idsonedsana totoqquedsima najari. Dsotode miji inadsapa toqquequimajari —nahi nade Jeso. (Pohua atti nama nadsapa itapari huapima oppinera tahi, najari.)

<sup>20</sup> Jesopa denima huati tajari: —Naraha madija pohua ajaridsa qquenajaropi pohua bodi huatodsa pohua ebenojine huati huati tajarijinena imasiri totoja najaro. <sup>21</sup> Ajina, tabaccorehe huapimapi madija pohua bodidsa ahuatomadsa pohua todossenidsapa imasiri inanajaro.

Najaropi pina madija imasiritohui pohua bodi huatojari, maquideje tabiraraha amoneje ajade tohuini najari, amoneje tabiraraha maquideje najade tohuini najaro, botie tohuini najari, madija inanadsoqquehijine tohuini najari. Najaro ima madija pohua bodidsa ahuatomsapi imasiri toja tani. <sup>22</sup> Tabaccorehe onihi naqui pina madija amoneje cajiraha amoneje onihi ajade tohuini najari, amoneje maqui cajiraha maquideje ohuaha najade tohuini najaro, madija ohuaha cajjaricca tohuini najari, ima tabaccora tajaro inananihijine tohuini najari, madija icamaidsabaqquihijine tohuini najari. Najaro ima madija pohua bodidsa ahuatomsapi imasiri toja tani. Tabaccorehe onihi naqui pina pohua cacahuade jipera tadsa huapima ponima tohuini najari, madija deni tojehe acconi bodi huadi tajari, madija tatamasso nahijine tohuini najari, pohua bodi “Ohuana bica onajaro, deni ojani” najari, madide ssamo tadsa maidsehecca imadsa pajissa najari. Najaro ima madija pohua bodidsa ahuatomsapi imasiri toja tani. <sup>23</sup> Najaro tabaccorehe huapima madija pohua bodidsa ahuatomsa pohua bodi totabaccorajari. Najarojinena madija imasiri ihinanamana najaro —nahi nade Jeso.

*Jodio madija jeraraha Jesodsa pajissa najaro*

*Mateo 15.21-28*

<sup>24</sup> Nadsapa nahihuaji mari icanabaquua jicadsapa Jeso toccajari. Odsa panani onini Tirocca dsamahuaji toccajari. Nahihuajicca odsadsa bacco tadsapa mohuaradsa Jeso toqquedsimajari. —Bacco onani madija motadeni ssamoqquri nana —najari. Naraha pohua bacco nahi ima tojaridsajaro. <sup>25</sup> Naneje amoneje —Jeso ajadsa bacco nahi —quinahi ima mittadsapi pohuatohui toqquedsimajaro. Poni bedeni tocorime cajijaro. Imeni bodinipi: —Ajarina occa ejedeni inanomihijine pajirahi —nadsapi



Jeso pohua baccohuaji poni pitonidsa huittajaro. <sup>26</sup> Poni attinipi: —Jeso, occa ejedenidsa tocorime madidsahi. Dosse tininejo, tonominijine, onajaro —nani nade imeni. Naraha najaro amonejepi jodio jerani. Ponipi dsama Siria arobeni Penisiahujicca madija. <sup>27</sup> Nadsapa Jeso ponidsa huati tajari: —Madija ohuaha jodio quejenajarajari acco ocamabaquipohuijinepa bica tejerani. Najaro imapi pina madija pocca ejedenidenidsa dsamatapa da inaraha idinidsa pocca ettedsana da inajarissa najaro. Ejedenidenipa tahide jipamanapona, onajaro. Aja Diocca madija jodiodenina acco ocamabaquipohuijine bica tani —nahi nade Jeso. <sup>28</sup> Nadsapi pohuadsa huati tajaro: —Pajissa ohua Medsede, naraha jijipacca huahuanari dopanidsa ejedenicca dsamatapa tabottodsa ette naco jipajari. Jodio ojajeraraha ohuadsa ticca acco camehe badsira tehe tinanaji, onajaro —nani nade Jesodsa. <sup>29</sup> Nadsapa: —Jehe, tetti nema nadsapi bica tani. Ticcanina. Ticca ejedeni bodinicca tocorimepa toqqenahi —nahi nade Jeso.

<sup>30</sup> Nadsapi toccanijaro. Ponicca odsa bacco tanidsa toqqedsimanidsapi poni bedeni tonominira qqui tajaro. Nadsapi mohuaradsa pori canajaro. Tocorimepa toqqenajari. Nohuerajari.

*Madija huaribo didibote, huati tahijine naco ebena ssamo tajari Jesojine tobicajari*

<sup>31</sup> Jesopa odsa panani Tirodsa joppemajari, odsa panani Sidohuaji toccahijine. Nahi Sidodsa tossohiquima, ccahuajanidsapa dsama arobeni onini Decaporidsa ccaridsajari. Dsotodepa Carireacca coridsahuaji bacco tanijari.

<sup>32</sup> Nahi Carireadsana Jesodsa madija huaribo didibote

eccajonamanajari. Huati tahijine naco ebene ssamo tajari. Ccaccajonadedeni attidenia: —Jeso, itesse tinan-abicahijine tidsepedsa pohua bara tajo —quinahi nade. <sup>33</sup> Nadsapa Jeso aja huaribo didibote madija sibema domo huahidsapa iacca-cca nadsa pohua dsepedsa huaribo odini ororo icanajaro. Pohua ebene naqui pohua dsepedsa ppito nadsa ebene bara inajari. <sup>34</sup> Nadsama Jeso memehuai qqui tamacossanaja pohua ssa tocanacossadsa pohua attidsa huati tajari: —¡Eppatta! —najari. (Najaro ettidsapi: —¡Teribo ssire-re naji! —najari.) <sup>35</sup> Naneje pohua huaribo ssire-re najari. Pohua ebene naqui tobicajaro. Nadsapa huati tahi tobicajari. <sup>36</sup> Nadsapa pahuadsa, pohua tessedenidsa naco Jeso huati tajari: —Ajjaro imapi tecomamanana —najari. Naraha amadsati pohua tahimari ecomeraridsa-manajaro. Jeso attipa: —Tecomamanaji, onapa —napomaraha joma quina-jarajari. <sup>37</sup> Aja, huapima jabojo quinaraha huatidsemanadsa attidenipa: —A, ima deni tojanijinecca qqui inani —quinajari. —Jesocca nahatohuepi huapima bica tani. Ajana, huaribo didi taraha pohuajine huaribo tobicadsapa tohuatti mit-tajari. Atti cappiraraha pohuajine atti cajijari —quinahi nade.

## 8

### *Jeso madija 4 mil quinajarideni inajipabaquijari* *Mateo 15.32-39*

<sup>1</sup> Nadsapi huada onihidsa naqui madija huapima Jesosda queriquipomajari. Madija huapi taraha jipamanahijine dsamatapa jicajari. Najaria aja Jeso pohua huatimadedeni huahua inabaquidsa pohuadenidsa huati tajari: <sup>2</sup> —Madijadsa ohuati cahanariri canani. Huada 3 nehe ohuadsa jahiridsadsapa pohuadeni tapari jicajari. <sup>3</sup> Naraha jipamanahijine poccadeni odsahuaji dosse

onanibaqquidsapa pemi huatiacossaja camarana. Motadenipa dsamarideni huaji tani —nahi nade Jeso.

<sup>4</sup> Naraha Jeso huatimadedeni attidenia: —Naraha iapi madija madide nohuerahihuaaji iqueriqquidsapi ¿nejecoma inadsa madija inajipabaqquihijine? —quinahi nade.

<sup>5</sup> Nadsapa pohuadenidsa huati tajari: —¿Nejecoma naha pan ticajimanani? —nahi nade. Naraha: —Pan 7 naha icajini —quinahi nade.

<sup>6</sup> Nadsapa Jeso madijadsa: —Huapima jassi tinaridsaji —nahi nade. Nadsapa Jeso pan 7 naha pohua dsepedsa inaccadsa Diodsa huati tajari: —Jehe Abi Dio, epejeni, ticca daniji iadsa bica tahi —nadsapa pan icanabobiridsajari. Icanabobiridsadsapa pohua huatimadedenidsa da inabaqquijari. Pohuadenina madija huapimadsa da inabaqqui-ridsamajari. <sup>7</sup> Aba bedi naco pamaha cajimanajari. Najari naco idsaba nadsa Jeso Diodsa huati tapomajari: —Jehe Abi Dio, epejeni, ticca daniji iadsa bica tahi —nadsapa idossebaqquijari: —Aba naco da tinabaqquimanajo —nahi nade. <sup>8</sup> Nadsapa Jeso canahatori canajarijine pan, aba najari tohuapidsa madija huapima jipamanadsapa accararidsa-manajari. Jipamanahissa taraha mota tojajari. Pan bobi, aba ime mota inaccaniridsa-manadsapa quiqui 7 naha ijiridsajari nade. <sup>9</sup> Nadsa madija jipamanajaridenipa 4 mil quinajari. Jipamanaha jicadsapa Jeso dosse inanibaqquijari nade. <sup>10</sup> Nadsapa Jeso pohua huatimadedeni tedseje canoadsa jai tojedsajari. Coridsa jippehuaji tohuaccamanadsapa dsama Daomanotahuajina bacco toquinajari.

*Pariseodeni: —Jeso canahatori canahi qqui inana* —quinajari

*Mateo 16.1-4; Roca 12.54-56*

<sup>11</sup> Jesopa coridsa jippehuaji bacco nanipomadsa nahicca Isaraeri potemahi jodiodeni mota marinaja

pariseodsa jehe quinajaridenipa pohua qquide jahijonajari. Jesodsa bacco quinadsapa pohua tedseje ahuaji huati ahuaji huati quinajari. Pohuadeni bodipa: —Jeso nattome inana, pocca ima tossamonijine —quinadsapa Jesodsa huati toquinajari: —Jeso, pajissa Diocca dacorehe ticajidsapi memehujicca nahatohue bicabote ahuateo tinanaji. Qqui inana, inajaro —quinahi nade. <sup>12</sup> Nadsapa Jeso pohua bodi tonacasserahi nadsa jadsirema pohua ssa tocanacossadsa huati tajari: —¿Nejecotohui aja jidapana madija madimanajaridenipa ocanahatoriri cananijine tohuira huati toquinajari? Pajissara tiadenidsa huati onajaro: Jidapana madimanajaridenidsa occa nahatohue onahatona onejerani —nahi nade Jeso. <sup>13</sup> Nadsapa inebobaquidsa canoadsa toqquedsanipomadsapa pocca dodosse tabaqqui tedseje jippehuaji jai tojajari nade.

—*Paji, jodiodenicca marinaja onini pariseo, tamine Herodecca ima naqui tiadenidsa toja-jerana* —najari Jeso  
*Mateo 16.5-12; Roca 12.1*

<sup>14</sup> Coridsa jippehuaji jai tojaraha jipamanahijine poccadeni dsamatapa huatideni ajamamanadsapa dsojo quinarahi. Pohuadenipa pan ojarahi nahi canoadsa caji-manaraha huapimadsa pajira-jarahi. <sup>15</sup> Nadsama nahi canoadsa jassi dsadsa Jeso pohuadenidsa huati tajari: —Tetideni huatoji. Jodiodenicca marinaja onini pariseo, aji tamine Herodecca ima naqui pina pan ssaja tahijine quequejema tahimarissa najaro. Paji, najaro tiadenidsa toja-jeranijine tiadenipi dacoco tijiraji, onajaro —nahi nade Jeso. <sup>16</sup> Pohua atti nama nadsapa pohua huatimadeni pohuadenira ojidsa huati tocanirere canajari: —¿Nejecotohui pohua atti nama najari? Aji ijipanijine pan icappirajarocca huati tajarirana —quinajari. <sup>17</sup> Naraha Jesopa pohuadeni bodi nahato tajari: —¿Nejecotohui

pan ticappiramananicca imadsara imahaha ticanajaro? ¿Nejecoma nadsa ticahatteranijine? ¿Nejecoma nadsa occa marinaja timittamananijine? ¿Tibodideni najoqqiri najarorane? <sup>18</sup> Tinoccodeni ticajimanaraha ¿qqui tiquinejerajaroqui? Teribodeni naqui ticajimanaraha ¿timittamana-jerajaroqui? Tinoccodenidsa qqui tiquinaporaha ¿tetideni ajimama canajarorane? <sup>19</sup> Madija 5 mil quinaraha pan 5 naha dside onariridsadsa jiparidsamanajari. Motapa quiqui ijiridsahi ¿nejecoma naha tidiridsamanatta? —najari. Nadsapa: —Quiqui 12 nade —quinajari. <sup>20</sup> Nadsapa Jeso: —Aja madija 4 mil quinaraha pan 7 naha dside onariridsadsa jiparidsamanajari. Motapa quiqui ijiridsahi ¿nejecoma naha tidiridsamanatta? —najari. Nadsapa: —Quiqui 7 nade —quinajari pohua huatimadedeni. <sup>21</sup> Nadsapa pohuadenidsa Jeso attipa: —Pan ijipanijine ocanahatoriri canani opajirani. Naraha pan ticappiramananicca ima huati onejerapa. ¿Ticahatterajeraccajaroqui? —nahi nade Jeso.

*Nocco siri Jesodsa eccajonamanadsa nocco ssire inanajari*

<sup>22</sup> Nadsapa Jeso pohua huatimadedeni tedseje odsa panani Besaidahuaji bacco toquinajari. Nahicca madijapa Jesodsa nocco siri eccajonamanadsa attidenipa: —Jeso ¿ettidsa jipa tinaqui? Itesse nocco bara tajo, inajaro —quinahi nade. <sup>23</sup> Nadsapa Jeso nocco siri dsepedsa dama inadsa odsa panani huapihuaji iaccajari. Nadsapa pohua nassopedsa nocco siri nocco ppaja inanajari. Nadsana bara inadsa pohuadsa huati tajari: —¿Nija, tinocco tohua-toqui? —nahi nade. <sup>24</sup> Nadsapa pohua nocco ssire-re nadsapa: —Jehe, madija qqui onabaqquiraha pohuadenipa pina ahua domoni ccaridsajarossa quinahi —nahi nade nocco siri.

<sup>25</sup> Nadsapa nocco bara inapomadsapa nocco tohuatonissa tajaro. Huapima qqui taridsahissa tajari.  
<sup>26</sup> Nadsapa dosse inanijari pocca odsahuaji: —Jehe, ticca odsahuaji ticcaniji. Naraha odsa pananihuajipi tiqquedsimani-jeraccaji —nahi nade Jeso.

—*Jesopa Cristo-Mesia* — najari Pedro  
*Mateo 16.13-20; Roca 9.18-21*

<sup>27</sup> Nocco siri tonomihi dsotodepa Jeso pohua huatimadedeni tedseje jai tojjari. Odsa panani Sesarea de Piripo jahuihuaji jai tojjadsapa nanihuajicca odsa capamema najaro onihidsa onihidsa jahiridsajari. Nadsa jahui jai tojjadsa Jesopa pohua huatimadedenidsa huati tajari: —Madija otahimari huati huati nanaridsamana nadsapa ohuadsa attideni ¿nejecoma nejecoma quiquinanahi? —najari Jeso.

<sup>28</sup> Naraha pohuadeni attipa: —Tiadsa madija motapa: “Huano Baotista tijani” quiquinanajari. Ohuahadenipa: “Maittaccadsamacca Dio Atti cacomerabote Eria tijani” quiquinanajari. Ohuahadeni naco: “Maittaccadsamacca Dio Atti cacomerabote ohuaha tijani” quiquinanajari —quinahi nade Jeso huatimadedeni attidenipa.

<sup>29</sup> Nadsapa Jeso pohuadenidsa huati tapomajari: —Naraha tiadenidsapi ¿nejecojari ojani? —nahi nade. Nadsapa manaco Pedro huati tajari: —Tiapi Cristo-Mesia tijani —najari.

<sup>30</sup> Nadsapa Jeso pohua attipa: —Jehe, bica tani. Naraha occa imapi madija ohuahadenidsa tecomamanaccana —nahi nade.

*Jesopa pohua dsoqquehicca ima huati tapojari*  
*Mateo 16.21-28; Roca 9.22-27*

<sup>31</sup> Jesopa pohua huatimadedeni mari icanabaqquid-sapa ajama najari: —Aji ohuapi Madija Bedi ojajaroa nidsa dsotode najidsohue imeni ocasserani ohuanitohui.

Jodiodeni ime jocohuideni, dada toqquimade tamine-deni, jodiodenicca marinaja maridedeni quinajaridenipa ohua ettajomananitohui. Nadsapi ohua inanadsoqqe-mananitohui. Naraha ohua ppa idsamanaraha huada huatinimade tojari nadsapi Abi Dio ohua nahatonihitohui —nahi nade Jeso.

<sup>32</sup> Jeso pohua tedsejemacca ima huati tadsa ahuato tajaro. Naraha Pedroa Jeso iacca-cca nadsa huati tajari: —Jidacca ima huati tinajaro ticca ima nema najaro imapi huati tina tejeraji —nahi nade Pedro. <sup>33</sup> Naraha Jeso tahide huajanidsa pohua huatimadedeni icattabaqqi nadsa Pedrodsa huati tajari: —¡Paji, otedsejemapi! Ohua teccocco tejeraji, onajaro. Tettipi pina maidsehe jinede Satana attissa nani. Tiapi Dio jipa tahicca ssamo tinani. Madija tohuini quinajariccana nahato tinajaro —nahi nade Jeso.

<sup>34</sup> Nadsapa Jeso denima mari icanabaqqihijine madija huapima, pohua huatimadedenima huahua inabaqqijari. Pohua attipa: —Aji “Jesocca madija iquejenana” tiquinadsapi tiadeni tohuini tiquinanicca tohui tetideni ajimamanaji. Ohuadsara disseraqqiri tiquinaji. Madija tiadenidsa: “Ahua porimacossanidsa tidsoqqeji” quinadsa naco: “Jehe, odsoqqeni bica tani. Jeso onebo-jarahi” titidsanapomana nana, onajaro. <sup>35</sup> Tiadenipi ticcadeni madie ohuadsa teccoramanadsapi otahimari madija tocassiejerahijinecca maride tiquejenadsa naqui madija tiadeni tonajicabaqqi-manaraha camittehe jiquejeranicca ticajimana-dsanapohitohui. Naraha madija ohuaha pocca madie ohuadsa acco tadsa ajijaro namidsa madi-dsanapohuijine tohuinira nadsapa dsoqqehitohui. Dsoqqedsapa camittehe jiquejeranicca caji-jarahitohui —nahi nade Jeso atti. <sup>36</sup> —Madija naco ajijaro namicca biquehe

tohuini madidsa, ajijaro dsamacca ima deni tojanicca tohuini madidsa naco huapima pohuadsa tojaraha Diotohui najaradsapa nidsa pohua dsoqquedsa jororoni jiquejeranihuaji dsori tajarahitohui. Nadsapa pohua cajjaricca huapima ponima tojanitohui. <sup>37</sup> Pohuapa pohua cajjariccadsa camittehe jiquejeranicca mitta inanijine ssamo tani. <sup>38</sup> Aja jidapana madimanajarideni Dio Atti inebomanadsa imasiri ihinanamana najaro. Najarideni noppine madija cappinamanadsapa: “Jesocca madija ojajerani” quina tahi. Occa marinajadsa naco: “Omittana onejerani” quina tahi. Nama quinadsapa manaco ohuatti pohuadenidsa: “Occa madija tiquejena-jerani” onanitohui. Ohuapi Madija Bedi ojajaroa nidsaranibote ajijaro namidsa occaronapomadsapi occa Abi Dio ssiejenema, pocca dodosse tabaqqi memehuajicca tedseje occaronapomanitohui. Nadsana: “Onocco jidsa tani pohuadenidsa” onanitohui –nahi nade Jeso.

## 9

*Jeso assire tojidsa, jidseremani najari*

*Mateo 17.1-13; Roca 9.28-36*

<sup>1</sup> Jesopa pohuadsa queriequimanajaridenidsa denima huati tajari: —Ohuapi pajissara tiadenidsa huati onajaro. Ajidsa tidomodeni huajaro motadenipi tidsoqquemana-jeraccadsama Diocca cacahuehe dacorehema ccajonani qqii tiquinanitohui —nahi nade.

<sup>2</sup> Nadsapa Jeso najaro ima huati tahi nattini huada 6 nadsa ssonohuaji toqquemoradsapa Pedro, Satiaco, Huano quinajaridenira iaqquemorabaqqijari. Jai to-jemoradsapa ssono tetepihuaji bacco tomoramanajari. Nahidsa qqii toquinanaja Jeso pano todsibehijaro. <sup>3</sup> Pocca etero naqui amadsati todsibehijaro, nopo tajaro. Najaro



noponipi madija ssamoquuri nahi. Madija iapi etero ssabo ssabo inaraha ijine najarossa nanijine pajira-jerani. <sup>4</sup> Nadsapa qqui toquinanaja Eria, Moisesi tedseje Jesodsa ahuatomanadsa imahaha canajari. Pohnadenipa maittaccadsamacca Dio Atti cacomeraquuri najarideni Jesohuaji ahuatoma-manajari.

<sup>5-6</sup> Nadsapa Pedrodeni cappinamanajari. Naraha Pedro pohua bodidsa: —¿Nejecora huati onanijine? —nanaja pohuama pohua atti Jesodsa: —Ia Maride, iapi ajidsa iquejenadsa bica tani. Ticcadeni odsa huahuaqquide 3 canehe inahatona. Nadsapi tiadsa, Moisesidsa, Eriadsa cananijine —nahi nade Pedro. <sup>7</sup> Naraha amadsati pohuadeni tetepihuaji essen ccaronajaro. Ccaronadsapi pohuadenidsa ijihuajanijaro. Nadsapa nahi essen bodidsa atti qquenajaro: —Ajaripa occa Ejedeni. Pohnadsa ohuati huana tajaro. Pohua atti timittamananissa taji —nahi nade Dio. <sup>8</sup> Nanaja qqui toquinaraha Jesodsa madija ohuahapa domo huarajahi. Pohua motta hua canajari.

<sup>9</sup> Nadsapa ssonohuaji jahidsippanidsa Jeso pohuadenidsa huati tajari: —Aji ssono tetepidsa qqui tiquinajarocca imapi tecomamanaccana. Ohuapi Madija Bedi oजारopi nidsa odsoqueni nattini onahatonidsana najaro ima tecomeramananijine bica tani —nahi nade Jeso. <sup>10</sup> Pohua atti nama nadsapa madija ohuahadsa huati toquina-jararaha pohuadenira imahaha canajari: —¿Nejeco imara huati tajari? Pohua attipa: “Onahatoninitohui” naha —quinahi nade.

<sup>11</sup> Nadsapa Jesodsa huati toquinajari: —¿Nejecotohui jodiodenicca marinaja maridedeni attipa: “Cristo-Mesia ccajona-jaraccadsama Dio Atti cacomerabote Eriana tahide ccanipohuitohui” quiquinanajari? —quinahi nade pohua huatimadedeni.

<sup>12</sup> Nama quinadsapa manaco Jeso pohuadenidsa: — Pajissa, tahidepa Eria ccanipohuitohui, ima huapima icattemaridsaponijine. Naraha ohua Madija Bedi otahimaripi Djojine Pohua Atti cacomeraquuri najarideni dsodo quinapojaro. Najaroa aji nanajidso ojadssapi ocasserani ohuanitohui. Madija naco ohua jaja icanamananitohui —nahi nade Jeso. <sup>13</sup> —Naraha ohuattipi: Eriapa ccanipode, onajaro. Aja Eria dsoqquejari ccanipo-jararaha madija ohuaha pina pohuassa najari ccajonadsa ima icattemaridsapode. Naraha nacasserehe pohuadsa inamanade. Najaro ima pohuadsa tojajaropi maittaccadsama Dio Atti dsodo napojarossa najaro —nahi nade Jeso.

*Ejedeni bodidsa tocorime madidsaraha Jeso dosse ininejari  
Mateo 17.14-20; Roca 9.37-43*

<sup>14</sup> Nadsapa Jeso, Huano, Satiaco, Pedro quinajari-deni Jeso pohua huatimade mota madimanahiuaji bacco dsippanimanabote nadsa qqui toquinajari. Pohuadeni tesse madimanahidsa madija huapi taha toqueriqqui najari. Nahidsapa jodiodenicca marinaja maridedeni Jessocca madija tedseje ahuaji huati ahuaji huati quina-jari. <sup>15</sup> Naraha Jeso bacco nanihi qqui toquinadsa huatidsemanajari: —A, Jeso bacco nanihi —quinadsapa pohuadsa nija quinahijine pohuahuaaji domo toqquejidsajari. <sup>16</sup> Nadsapa Jeso pohuadenidsa huati tajari: —¿Nija, nejecotohui ahuaji huati ahuaji huati tiquinajaroneje? —nahi nade. <sup>17</sup> Nahidsa madija ojaría Jesodsa huati tajari: —Ohua Maride, occa ejedeni tiadsa ohuaccajonajaripa. Pohua bodidsa tocorime madidsajari. Najarijine atti cappirajari. <sup>18</sup> Pohua dama inadsa jadsirema cco inacossadsapa namidsa edima bohua nadsapa pohua ajari ssabojene tocca tocca najari, ino ccado-do-do najari, assirema ccara-ra ccara-ra najari. Occa ejedeni nama

nama nadsa tetimadedenidsa huati onajaropa: “Occa ejedeni pohua bodicca dosse tininemanajo” onaraha ssamoqqiri napaja —nahi nade imehi atti. <sup>19</sup> Nadsapa Jesoa: —Jaho, madija huapima Diodsa jehe tiquinanissa tejerani. Tiadeni mari mari ohocanabaqqi naraha ¿nejecoma nadsa ticahatterapadseje? Ticcadeni jeheniji pajiranissa tejeradsapi ohuadsa ocassera taraha ¿nema nehe onahana-dsanaponijinequi? —nanaja: —¡Jari, ticca ejedeni ohuadsa teccajonajo! —nahi nade Jeso.

<sup>20</sup> Nama nadsapa pohuahuaaji ejedeni eccajonamajari. Naraha tocorime Jeso qqui tadsapa ejedeni quidsa inanajari. Namidsa tohuedimajari. Dehue naridsadsapa ajari ssabojene toccajari. <sup>21</sup> Nadsapa coma tajari imehidsa Jeso huati tajari: —¿Pohua coma tahicca abadsico nejecoma canahi? —najari. Naraha imehi attipa: —Badsira tadsamade —nahi nade. <sup>22</sup> —Huajjiradsa quidsa inanadsapa dsippodsa naco ihinassonidsana najari. Passodsa naco ihinassonippa nanaja najari, inanadsoqquehijine. Nadsapi Jeso tiana nahato tinanitide. Iadsa teti huana taji, ia acco ticamabaqqinijine —nahi nade Jesodsa. <sup>23</sup> Naraha Jesopa: —Jaho, tettihi ohuadsa: “Tiana nahato tinanitide” tajaro nema tejeraji. Madijapa pohua bodi Diodsa jehe nahissa tadsapa nahato tajari: “Diopa ima huapima inananiijine pajirahi” najari —nahi nade Jeso. <sup>24</sup> Nadsapa imehia atti mohui tadsa huati tajari: —¡Jehe, Diopa pajirahi! onajaro. Naraha obodi acco ticamaji, occa jeheniji todacorani nanijine —nahi nade.

<sup>25</sup> Nadsapa Jeso qqui tanaja madija pohuadsa queriqquijonahi tohuapihi nahi qqui tadsapa tocorime dosse ininejari. Pohua attipa: —Tocorime, tohuaribo sibehe totonanade, tohuebeno totonassamode, tia dosse omajaro. ¡Ejedeni tinebojo! ¡Tiqquenadsapi tiqquedsimanipoma-jeraji, onajaro! —nahi nade Jeso.

<sup>26</sup> Nadsapa tocorime johua najari. Pohuajine ejedeni huatiacossadsa dari-ri-ri nadsapa qquenajari. Nadsapa ejedeni pina huatiajarissa naha ponajari. Nama nadsapa: —Huatiahi —quinajari nade. <sup>27</sup> Naraha Jeso ejedeni dsepedsa dama inadsapa nomi taha inatehema najari.

<sup>28</sup> Nadsa dsotode Jeso odsahuaji toqquedsimanidsapa pohua huatimadedeni motaha: —¿Nejecotohui iaha ajari ejedeni bodicca dosse ininehijine ipajira-jerapa? —quinajari. <sup>29</sup> Nadsapa Jeso attia: —Nama nahicca dosse tinine-manahijinepa Diodsa huati tiquinadsana toqquena tahi —nahi nade Jeso.

*Jesopa pohua dsoqquehicca ima huati tapomajari*

*Mateo 17.22-23; Roca 9.43-45*

<sup>30</sup> Nadsama nahidsa nebomanadsapa jai tojanijari. Dsama arobeni Carireahuaji jai tojeqqumajari. Naraha Jesopa pohua toqqueqqumahi madija nahatoqquri nahijine jipera tadsa pohua cacomadsa toqqueqqumajari. <sup>31</sup> Aja Jeso nema najaripa pohua huatimadedeni pohuadenira maride dsepe ijihijine. Pohua attipa: —Ohuapi Madija Bedi ojararoa nidsa dsotode madija ojaria ohua ccaccoradsapa madija dsepedenidsa ojadsapo ohua inanadsoqque-mananitohui. Ohua ppa idsamanaraha huada huatinimade tojari nadsapi Abi Dio ohua nahatonihitohui —nahi nade Jeso.

<sup>32</sup> Naraha pohuadenipa pocca marinaja mittamanahissa tajarajari. —¿Nejecoma tajaro? —quinahitohuiraha cappinamanadsapa Jesodsa huati toquina-jarajari.

*—¿Nejecojarina deni tojjajari? —quinajari*

*Mateo 18.1-5; Roca 9.46-48*

<sup>33-34</sup> Nadsapa Jeso pohua huatimadedeni tedseje odsapanani Capernaohuajicca jahui jai tojanidsa Jeso huatimade pohuadenira imahaha tocananijari: —Aji ia

huapimapi ¿nejecojarina deni tojajari? —tanimanajari. Odsadsa bacco tanimanadsapa jai tojedsimanijari. Nadsapa Jeso pohua huatimadedeni huati icanabaquijari: —¿Nejeco imara jahuidsa imahaha ticananijaroneje? —nahi nade. Naraha pohuadeni bodipa: —Jeso icca imadsa jipera tahitide —quinadsapa ecomeramana-jerani. Tocadidire najari. <sup>35</sup> Nadsapa Jeso huittaridsa pohua huatimade 12 quinajarideni huahua inabaquidsapa pohuadenidsa huati tajari. Pohua attipa: —Madijapa: “Ohuana deni ojani” najaripa Diodsa bica tajarahi. Madijapa: “Ohuapi ajimani ojani” najarina Diodsa bica tajari. Najaripa madija huapimadsa acco camade dissera tadsapa najarina Diodsa bica tajari. Aji pocca ima bica tadsapi pocca deni tojehe pajissacca ahuato tajaropaji —nahi nade Jeso.

<sup>36</sup> Ejedeni huahua inadsa pohua huatimadedeni jassi nahuajanihi nocconidsa inahua najari. Nadsapa idi, dsojo ijidsadsa pohua huatimadedeni mari icanabaquijari. <sup>37</sup> Pohua attipa: —Ajajari ejedenissa najaridsa tetideni huanaquiri nadsapi ohuadsa naqui tetideni huanaquiri najaro. Ohuadsa tetideni huanaquiri nadsapi ohua Cadossede Abi Diodsa naqui tetideni huanaquiri najaro —nahi nade Jeso.

—*Madija iadsa huadi tajaradsapa ia acco camajari* —najari Jeso

*Mateo 10.42; Roca 9.49-50*

<sup>38</sup> Nadsapa Huano Jesodsapa huati tajari: —Ohua Maride, madija ohuaha tia oni hua nadsa madija bodicca tocorime dosse ininehi qqui inade. Naraha pohuapa iadsa ccaridsa-jaradsa pohuadsa: “Epeje taji. Poni” inade —nahi nade Huano. <sup>39</sup> Naraha Jeso attipa: —Pohuadsa poni tiquinejeraji. Madija ohua oni hua nadsa canahatoriri canadsapa nidsa dsotode ohuadsa atti tabaccora

tजारहितohui. <sup>40</sup> Madija nama najaripa iadsa huadi tajaradsa ia acco camade tojajari —nahi nade Jeso. <sup>41</sup> — Pajissara tiadenidsa huati onajaro: Aji ohuadsa tiquejenadsapi madijadenipa: “Jehe, pohuadenipa Cristo-Mesiacca madija, pohuadenidsa accora onana” quinadsa tiadenidsa da quinadsa bica tani. Passo dse tiquinanijine da icanamanadsa naqui manaco nidsaranibote Dio pocca biquehe pohuadenidsa inananitohui —nahi nade Jeso.

*Imasiri tinanadsapi oppina tanihuaji ticcanitohui*

*Mateo 5.29-30; 18.6-9; Roca 17.1-2*

<sup>42</sup> Jesopa denima huati huati tajari: —Nadsama madija ojarajine ohuadsa jehe quinajari imasiri inanamanadsapi pohuadsa najidsohue oppina tanicca ssonarinitohui. Ejedeni ohuadsa jehe quinajarideni naco madija imasiri mamaridejine imasiri tocahatteradsapa aja imasiri mamaride pohuadsa najidsohue oppina tanicca ssonarinitohui. Pina ajijaro imassa najaro: Siba ccanajabote pohua mattodsa ssoque dsanadsa passo imenihuaji je tahijine cco todsippadsapa oppina taraha najidsohue denima oppina tanicca pohuadsa ssonarinitohui.

<sup>43-44</sup> —Nadsama imasiri tinana-jezanijinepi tibodi daco tijiradsa poni taji. Poni tejeradsapi ima oppina tanicca tiadsa ssonarinitohui. Pina tidsepedsa imasiri tinanabote naraha daco tijiradsa poni taji. Nema tadsapi pina tidsepe ca ticajidsajarossa najaro. Tidsepe cajarie amossi canaraha Diocca cacahuehedsa timadidsapi tetidsenitohui. Naraha imasiridsa dissera tinadsapi pina tidsepe capamehe ticajijarossa naraha jororoni jiquejezanihuaji ticcanitohui. Najaro jororonipi ohuihuira tani.

<sup>45-46</sup> —Nadsama imasiri caji tanihuaji ticcanijine naqui tohuini taraha poni taji. Nema tadsapi pina temori ca ticajidsajarossa najaro. Temori cajariraha Diocca cacahuehedsa timadidsapi tetidsenitohui. Naraha imasiridsa dis-

sera tinadsapi pina temori capamehe ticajjarossa naraha jororoni jiquejeranihuaji tia coro todsimahitohui.

<sup>47</sup> —Nadsama tinocodsa naqui tohuini tanicca qqui tinadsa imasiri tinananijine tohuini taraha daco tji-radsa poni taji. Nema tadsapi pina tinocco huari, joca, jeo, coro tinajarossa najaro. Tinocco ojariraha Diocca cacahueheda timadidsapi tetidsenitohui. Naraha imasiridsa dissera tinadsapi pina tinocco pamehe ticajjarossa naraha jororoni jiquejeranihuaji tia coro todsimahitohui. <sup>48</sup> Nanihuaji ocasserani tedsanaponitohui. Timeqquene ssari-ri cadsanaponitohui. Jororoni ohuihuira taniccadsa time ca dsanaponitohui.

<sup>49</sup> —Aji tiadeni huapima Diojine tibodideni tohuirenijinepi pina sahojine bani jadsijarajarissa nanitohui. Pina dsippo jororonijine bani cadsapa jadsijarajarissa nanitohui. <sup>50</sup> Sahopi bica tani. Banidsa huira nadsapi jadsijaraji. Naraha saho ajiboni tomossidsapi tomajidera tani, icca bani naco totabaccora tahi. Ajibo tapomanijine ssamo tani. Tiadenidsa ohuatti pina sahossa onanajaro. Ohuatti ticajimanana, imasiri tinanamana-jeranjine, madija ohuahadeni tinanabicabaqqui-manahijine. Titessedeni tedseje ticajonerara canaji, onajaro —nahi nade Jeso.

## 10

*Jesopa amoneje nebo nebocca ima mari icanabaqqujari*  
*Mateo 19.1-12; Roca 16.18*

<sup>1</sup> Jeso odsa panani Capernaodsa nebodsa dsama arobeni Jodeahuaji toccajari. Hueni Jordao jippehuaji toccadsapa dsama arobeni Pereaahuaji bacco tajari. Nahidsapa madija sibema pohuadsa queriquipomadsapa mari icanabaqqujari. Jesopa nama nanaridsa najari.

<sup>2</sup> Nahidsapa jodiodeni mota marinaja pariseodsa jehe

quinajarideni Jesodsa jiperaquuri nadsa pocca marinaja inassamomananijine ima najoramanajari. Jesodsa tohuajiressimanadsapa pohuadsa huati toquinajari: —Aja ¿maquideje pocca amoneje inebodsapi pohuadsa ima nohueraqui? —quinahi nade.

<sup>3</sup> Nadsapa Jeso attia: —Jari, tecomeramanaji: Maittaccadsama Moisesipa najaro ima mari icanabaquipojaride. Pocca marinaja ¿nejecoma natte? —nahi nade. <sup>4</sup> Nadsapa pariseodeni attidenipa: —Jehe Moisesicca marinajapi ajima nade: “Maquidejepa pocca amoneje inebonijinepi nebohucca papeo dsodo inadsa ponidsa da inadsa inebodsapi pohuadsa ima nohuerani” nadija —quinahi nade.

<sup>5</sup> Nadsapa Jeso huati tajari: —Jehe naraha najaropi maittaccadsama ticcadeni idideni huaribodeni sibaquuri nadsa nebohue tohui quinadsapa Moisesi najaro marinaja pohuadenidsa dsodo inajarode. <sup>6</sup> Naraha Dio dsama inahatoponipi amoneje nebo neocca ima nohueraccade. Djojine madija toquejenapodsapa ima ajima najaro:

“Maquideje amoneje tadsajani inahatobaquijari.

<sup>7</sup> Nema najarojinea maquideje pohua bedimenidsa tojadsapa imehi imenidenidsa nebo, pohuadenira madimanajari. <sup>8</sup> Nadsapa pamaraha pina ojarjarissa quinajari”

najaro Dio Atti dsodo nanidsa. Nadsapa pajissa asiredeni pamaraha cacajiredsapa Djojine pina ojarjarissa dsanapomanahijine. <sup>9</sup> Nadsama Djojine pina ojarjarissa quinaraha caneboredsapa bica tejerani. Madija ohuaha atti noppine caneboredsa naco bica tejerani —nahi nade Jeso.

<sup>10</sup> Nadsapa Jeso pohua huatimadedeni tedseje odsahuaji jahinipomadsa odsa bodihuaaji jassi dsadsapa Jesodsa huati toquinajari: —¿Ticca marinaja nejecoma najaro? —quinahi nade. <sup>11</sup> Nadsapa Jeso pohuadenidsa



ima ecomerajaro: —Jehe maqquideje pocca amoneje inebodsa amoneje onihira icajidsapi pocca amoneje tahide inebojarodsa imasiri inanajaro. Nama nadsapa Diocca dosseniji ecahua-jerajaro. <sup>12</sup> Amoneje naqui ponicca maqqui inebodsa ohuahara icajidsapa ponicca maqqui tahide inebojaridsa imasiri inanajaro. Nema nadsapi Diocca dosseniji ecahua-jerajaro —nahi nade Jeso.

*Jesopa: —Abi, ticca biquehe ejedenidsa tinanaji —najari Mateo 19.13-15; Roca 18.15-17*

<sup>13</sup> Nadsapa madija poccadeni ejedeni Jesodsa eccajonabaqqui-manajari —Jeso tatideni bara inabaqquidsa Diodsa huati tahijine —quinadsa. Naraha Jeso huatimadedeni attidenia: —¡Ejedenipa pohua! ¡Jesohuaji teccajonabaqquimana tajarajo! —quinahi nade. <sup>14</sup> Naraha Jesopa pohua huatimadedeni ejedeni tedsejemadeni huacossamanahi qqui tadsapa huadijari. —¡Poni, nema tiquinejeraji! Pohuadeni jahijonana, onajaro. Eccajonabaqqui-manahijine tecossamana tejeraji. Madijapa pina ajajari ejedenidenissa quinajarina Diocca cacahuehedsa toquejenahitohui. <sup>15</sup> Pajissara tiadenidsa huati onana: Madijapa pohua bodicca jeheniji pina ejedenicca jehenijissa najaradsapa Diocca cacahuehedsa toja-jarahitohui —nahi nade Jeso.

<sup>16</sup> Nadsapa Jeso ejedeni idi, dsojo ijidsadsa tatidsa bara nadsa huati tajari: —Abi Dio, ticca biquehe ajajari ejedenidsa tinanaji, onajaro —nahi nade. Ejedeni ohuahadeni naco nama inanabaqqui-ridsajari.

*Madija dsepe sse tajari Jesodsa huati tajari Mateo 19.16-30; Roca 18.18-30*

<sup>17</sup> Nahi dsotodepa Jeso jahui toccadsa pohuahuaji madija ojaría joppa najonajari. Jeso baccohuaji pohua pitodsa huitta nadsa huati tajari: —Nija, Mamaride bicahi

¿nejecoma onadsa camittehe jiquejeranicca bacco onanijine? —nahi nade. <sup>18</sup> Naraha Jesopa: —¿Nejecotohui ohuadsa: “Mamaride bicahi” tajaro? Madija bicahi no-huerahi. Diona bica tahi ojarahi. <sup>19</sup> Naraha camittehe jiquejeranicca bacco tinanijinepi Diocca dosseniji Moisesi dsodo inajarocca nahato tinani. ¿Najaro huapima tecahuanissa taqui? Diocca dossenijipi ajima najaro: “Madija tinanadsoqqe-jarajo. Madija ohuahacca amoneje tija tejeraji. Tiboti tejeraji. Maidsehedsa naqui madijadsa ponima ima tinahana tejeraji. Madija ticamaidsa tajarajo” nani Diocca dosseniji. Pocca dosseniji onihi naqui: “Ticca abi, ticca amidsa bica tinadsa tinamadibaqquihissa tajo” nani Diocca dosseniji Moisesi dsodo inajaro —nahi nade Jeso.

<sup>20</sup> Naraha Jeso baccodsa huittajari attipa: —Mamaride, najaro marinaja huapimapi dsabisso oapodsama ohuacahuajonajarode —nahi nade. <sup>21</sup> Nadsapa Jeso icattoma nanaja pohuadsa huati tohuanahi nadsa huati tajari: —Naraha ima ojarie tiadsa dsori taccani. Ticcanidsa tidsepetaji nemaneha manaconidsa da tinaridsaji. Nani najaro dsiniropi madija tohuati nahanaqquri najaridenidsa da tinabaqquinijine. Nema tinanadsapi nidsa memehuaji Diocca biquehe tiadsa tojanitohui. “Nema onana” tadsapi ohuadsara dissera tinaji —nahi nade Jeso.

<sup>22</sup> Najaro ima mittadsapa pano todsahi najari. —Jehe, nema onana —najarajari. Pohua dsepetajitohui, pocca dsinirotohui huati huana tajari. Pohuapa dsepe sse taja nadsapa bodi ocassera taha toccanijari.

<sup>23</sup> Nadsapa Jeso cattahuajanihi nadsa pohua huatimadenidsa huati tajari: —¡A, madija dsepedeni ssequiri najaridenipa Diocca cacahuehedsa toquejenahijine najo tani! —nahi nade. <sup>24</sup> Nema najaro ima pohua huatimadedeni mittamanadsa huajo canirejari. Nadsapa Jeso

huati nimanipomajari: —Jaho, otessedeni, madija Diocca cacahueheda toquejenahijine najo tani, onajaro. <sup>25</sup> Pina bani imehibote camellopa etero ssessequi odinidsa toqqequimahijine pajira-jarajarissa najari madija dsepe sse tajaripa Diocca cacahueheda tojahijine ssamo tani —nahi nade.

<sup>26</sup> Nadsapa Jeso pohua huatimadedeni najaro ima mit-tamanadsa bodideni jabojobanadsapa huati tocanirere canajari: —Jaho, madija tocassiejerahijinepa ssamo tani. ¿Nejecojarina tossiapadsaja? —quinahi nade.

<sup>27</sup> Nadsapa Jeso pohuadeni icattabaqqui nadsa huati tajari: —Madijapa ssamoqquri naraha Diodsapi ssamo tejerani. Pohuajinena madija tocassiejerahitohui —nahi nade Jeso.

<sup>28</sup> Naraha Pedropa Jesodsa huati tajari: —Ia Maride, iapi tiadsa jaijaridsanijinepi icca odsa, icca madija, huapima ineboridsabaqquide —nahi nade.

<sup>29</sup> Manaco Jeso atti: —Pajissara tiadenidsa huati onana: Madija ohua acco camahijinepa pocca odsa icanebo, pohua imecote inebobaqqui, pocca ami, abi inebobaqqui, pocca ejedeni inebobaqqui, pocca dsama inebo nadsapa otahimari madija tocassiejerahijinecca tojaridsanijine dsepe ijaridsajari. <sup>30</sup> Nadsapa nidsa dsotode huapima pohua ineboridsajarossa nehe Dio pohuadsa da inaridsadsapi cajipomahitohui. Jidapana ajijaro namidsa pohua madicadsa huemani cajihitohui. Pohuadsa pina pocca odsa tohuapijarossa nanitohui. Pohua imecotedeni naco tohuapiridsahitohui, pohuadsa pocca amissa najaro cajiridsanitohui. Ejedeni ohuahadeni pina pocca ejedeni toquejenajarissa naridsahitohui. Dsama naqui pina pocca dsamassa najaro pohuadsa tojaridsanitohui. Naraha otahimari pohuadsa tojajarojine pohuadsa najidsohue ssonarinitohui. Nema nanitohuiraha nidsa

dsama dsati tojadsapi camittehe jiquejeraniccdsa madi-dsanapohuitohui. Pajissa — nahi nade Jeso.

<sup>31</sup> —Naraha jidapana tiadenipi ajimani tiquejenaraha ajjaro imadsa tibodideni huatomanaji: Madija jidapana madimanajarideni motapa deni toquejenaraha nidsarani-botepa ajamani toquejenahitohui. Jidapana madimana-jarideni mota ajamani toquejenajarideni naco nidsarani-botepa deni toquejenahitohui — nahi nade Jeso.

*Jesopa pohua dsoqquehicca ima huati nimanipomajari  
Mateo 20.17-19; Roca 18.31-34*

<sup>32</sup> Jeso pocca madijama Jerosarecca jahui jai tojadsapa pohuana tahide tojadsanapojari. Pocca dodosse tabaqqupa pohua nattihuai jai tojajari. Jeso dsoqquehijine noppine cappinamanadsa huatideni huatoto cad-sanapojari. Madija ohuahadeni pohuadeni nattihuaicca jai tojamissajari naco cappinamanajari. Nadsapa pocca dodosse tabaqqi 12 quinajari pohuadenira huahua inabaqqidsa pohuadsa queriqquijari. Nadsapa jahui jai tojadsa pohuadsa ima tojanijinecca huati huati dsanapojari. <sup>33</sup> Jeso attipa: —Jerosarehuaji jaijemorajaropi nahatoqquiri tiquinani. Ohuapi Madija Bedi ojararoa nidsa Jerosare bacco inadsapi dada toqquimade tamine-deni, jodiodenicca marinaja maridedeni quinajarideni dsepedenidsa ojanitohui. Ohuadsa: “Dsoqquena, dsoqquena” quinahitohui. Dsotodepi madija ohuaha jodio quejena-jarajaridenidsa ohua da quinanitohui, onajaro. <sup>34</sup> Najaridenina ohua jaja icanaqquimanajaro, ohua ppito inaqquimanajaro, ohua cossi inaqquimanajaro nanitohui. Nadsapi ahua porimacossanidsa ohua inanadsoqque-manadsa ohua ppa idsamananitohui. Naraha huada huatinimade tojari nadsa onahatoninitohui — nahi nade Jeso.

*Satiaco, Huano tedseje Jesodsa huati toquinajari*  
*Mateo 20.20-28; Roca 22.24-27*

<sup>35</sup> Nadsapa Sebedeo bedideni Satiaco, Huano tedsejepa Jesohuaji tohuajiressimanadsa huati toquinajari: — Ia Maride ¿ettidsa jehe taqui? Icca huatinajassa tinanaji, inajaro —quinahi nade. <sup>36</sup> Manaco pohuadenidsa: — ¿Nejeco imara tiadenidsa onananijine? — nahi nade Jeso. <sup>37</sup> Nadsapa pohuadenia: —Ticca cacahuehe bicanihuaji madija cacahuade tittaridsapi tinoridsa ipahimarinijine ohuapi tinori nahatonihuaji ohuittari, ocotepa tinori ssamohuaji huittari inanijine ¿jehe taqui? —quinahi nade Jesodsa.

<sup>38</sup> Naraha pohuadenidsa Jesoa: —A, najaro imapi ssamomo tinani. Ohuapi ocasserani ohuabote nani. Ohuadsa najidsohue ssonarinitohui. Aji tiadenipi najidsohue tinahanamananijine ¿tipajiramaquai? —nahi nade. <sup>39</sup> —Jehe, ia naqui ipajirani —quinahi nade. Nadsapa pohuadenidsa Jesoa: —Jehe, pajissa ocasserani tinahanamananitohui. Aji ohua najidsohue onahanadsapi tiadeni naqui nidsa dsotode najidsohue tinahanamananitohui. <sup>40</sup> Naraha memehuaji occa cacahueheda madija cacahuade ohuadsama pahimarihijinepa ohua dosse dosse onejerani. Abi Dio icattejidsa-baqquijaridenina ohuinoridsa pahimarihijine —nahi nade Jeso.

<sup>41</sup> Naraha Jeso huatimade mota 10 quinajaridenipa najaro ima imahaha canahi mittamanadsapa Satiaco Huanodenidsa huadimanajari. <sup>42</sup> Nadsapa Jeso huahua inabaquidsa pohuadsa toqueriqquidsa pohuadenidsa huati tajari: —Tiadenipi madija ohuaha jodio quejenajarajaridenicca madie nahatoqqiri tiquinani. Pocca-deni taminedenipa dossede dacoraqqiri nadsa pocca-deni madija dosse dosse quiquinanajari. Deni toqueje-

najari ohuahadeni naco poccadeni madija dacorehedsa ehecahuabaquimana najari. <sup>43</sup> Naraha aji ohuadsa tique-jenjaropi nema tiquinanijine bica tejerani. Naraha titessedeni ojariapa: “Ohuana deni ojana” nadsapa pohuana huapima bijideni acco icamaridsabaquihijinena bica tani. <sup>44</sup> Diocca cacahuehedsa deni tijanijinepi titesse bijideni acco ticamaridsajo, pina poccadeni medse tija-jarossa tanijine. <sup>45</sup> Aji ohua Madija Bedi ojararopi madija dosse dosse onanijine occajona-jerajaro. Madija acco ocamabaquihijinena occajonajaro. Madija poccadeni imasiri manaconi pohuadenidsa ssonari-jeranijine poccadeni imasiri manaconipi ohuana ohua ohuaccoranitohui —nahi nade Jeso.

*Jesopa Bartimeo nocco ssire inanajari*

*Mateo 20.29-34; Roca 18.35-43*

<sup>46</sup> Nadsapa Jeso pohua huatimadedeni tedseje odsa Jericodsa bacco toquinajari. Nahidsa toqqeequimadsapa pohua huatimadedeni, madija ohuahadeni naco huapi taha pohuadsa jai tojjajari. Nani jahui inididsapa nocco siri huihuitta najari. Pohuapa Timeo bedi, onipa Bartimeo. Pohua dsepe da nadsa: —Ohuadsa dsiniro da tiquinaji —tatacossa najari. <sup>47</sup> Najaria —Jeso Nasaretihuajicca toqqeequimahi —quinahi ima mittadsapa Jesodsa huahua najari: —¡Jeso, Dabi Potemahi! ¡Ohuadsa teti huana taji onaha! —najari.

<sup>48</sup> Naraha madija motadenipa: —¡Poni! ¡Joma taji! —quinahi nade. Nama quinaraha denima paja huahua tarihi huahua tarihi najari: —¡Tamine Dabi Potemahi! ¡Ohuadsa teti huana taji! —napomahi nade.

<sup>49</sup> Nama nadsapa Jeso huaha tahi nadsa —Jari, huahua tajonamanajo. Ccajonana —nahi nade. Nadsapa nocco siridsa huahua quinajari: —¡Jehe, bica tani! Titehemaji,

tiadsa huahua nahi —quinahi nade. <sup>50</sup> Nanaja pohua teteppe ssiti, totehemahi, Jesohuaji toqquessijari.

<sup>51</sup> Nadsapa Jesoa: —¿Nejecora tiadsa onananijine? —nahi nade. Nadsapa nocco siripa: —Ohua Maride, onocco ssire tinanaji, onajaro —nahi nade. <sup>52</sup> Nadsapa Jeso: —Epeje. Ticcaniji. Tibodi ohuadsa pajissa tadsapi tinomini —najari. Nadsapa Jesojine amadsati pohua nocco ssire tajari. Jerosarecca jahui Jeso denima toccad-sapa Bartimeo naco pohuadsa toccajari.

## 11

*Jesopa Jerosaredsa bacco todsimajari*

*Mateo 21.1-11; Roca 19.28-40; Huano 12.12-19*

<sup>1</sup> Nadsapa Jeso, pohua huatimadedeni, madija huapima tedsejedeni jai tojjari. Odsa panani Jerosarehuaji tohuajiramanadsapa ssono onini Oribodsa jai tojemorajari. Najaro ssonodsa odsa capamema najaro pamehe anijaro, oninidenipi Betapaque, Betania najaro. Najaro odsa pamehedsa bacco toquinabote nadsa Jeso pohua huatimade pamahadsa huati tajari: <sup>2</sup> —Jari, ajicca odsa capamema nanihuaji ticadapoji. Nanihuajipi bojo namidsadsa napidsati ssoque dsanaha huahi. Najari bojopa idedsa madija huittari-jaraccahi. Najari dicca tiquinadsa teccanimanajo —nahi nade. <sup>3</sup> —Naraha tiadenidsa madija attipa: “¿Nejecotohui bojo dicca tiquinajari?” nadsapa pohuadsa huati tiquinana: “Ia Medsede ajajari bojo tohui nadsapaja. Nidsa eccanihitohui” tiquinana —nahi nade Jeso.

<sup>4</sup> Nadsapa tohuedanaja, jahuidsas bojopa ssoque dsanahi bacco quinajari, odsa huajira tanidsa. Nadsapa bojo dicca quinajari. <sup>5</sup> Nanaja nahicca madija domodeni huajari attideni: —¿Nejecotohui bojo dicca tiquinajari? —quinahi

nade. <sup>6</sup> Naraha manaco pohuadeni cacomeramanajari: — Ia Medsede tohui nadsapaja — quinahi nade. Nadsapa jehe quinadsa eccanimanajari.

<sup>7</sup> Nadsapa bojo eccanimanajari... Jesohuaji bacco nan-  
 imanadsapa poccadeni etero huapicca motarajaro ssiti  
 quinadsa bojo idedsa bina quinadsa nahidsa Jeso huit-  
 tarijari. <sup>8</sup> Nadsapa madija huapi taha Jesodsa huatidse-  
 manadsa pohua tedsejema jahui bina idsanapomanajaro,  
 pohuadsa: —Deni tijani —quinahijine. Nadsapa jahuidsa  
 pohuadeni teteppe namidsa hua idsanapomanani nade.  
 Madija ohuahadenipa birijari eppe huamonicca ca ippi-  
 manadsa hua idsanapomanahi nade. Nadsapa Jeso jahui  
 bina tani motta toccadsanapojari. <sup>9</sup> Madija huapima  
 pohua tedsejema jai tojaja, pohua nattihuaji jahijonaja  
 dsanapomanajari. Pohuadsa huatidsemanadsa huahua  
 huahua dsanapomanajari: —¡Diopa deni tojahi, deni to-  
 jahi! ¡Ia Medsede onima ccajonajaridsa biquehera to-  
 jana, tojana! —dsanapomanajari. <sup>10</sup> —¡Pohuapa icca idi  
 tamine Dabi Potemahi bicabote! ¡Ia Cacahuade tojahijine  
 ccajonahi! ¡Bica tahi, bica tahi! ¡Memehuaji Diodsa  
 madimanajarideni pohuadsa: “¡Deni tijani!” quinana,  
 quinana! —dsanapomanahi nade.

<sup>11</sup> Nadsapa Jeso Jerosaredsa bacco todsimadsa Diodsa  
 dada toqquimahuaji toccajari. Nahihuaji toqquedsimad-  
 sapa qqui naridsahissa tajari. Qqui naridsaha jicadsapa  
 maji toccajari. Nadsapa Jeso pocca dodosse tabaqqui <sup>12</sup>  
 quinajari tedseje Betaniahuaji jai tojanijari, bacco tani-  
 manahi nade.

*Jesopa ahua iquiera bono-jarajaridsa atti ocassera tadsa  
 huati tajari*

*Mateo 21.18-19*

<sup>12</sup> Huada ssiaja nahi Betaniadsa Jeso toccapomadsapa  
 pemijari. <sup>13</sup> Nadsapa huaji tanidsa ahua iquiera eppe



cajipomahi qqui tadsa: —Bono naco cajihitide —nahi nade. Naraha nahi bacco tadsapa eppe pohuara qqui tajari. Iquiera eppe cajidsapa bobono najariraha bono-jaraccahi. Pohua bonohuicca abadsico bacco tocana-jaraccajari. <sup>14</sup> Nadsapa Jeso ahua iquieradsa huati tajari: —¡A, apaja! Jidapapi tibono madija jipamanapomajarahitohui. ¡Nohuerahitohui! —nahi nade. Nahidsa pohua huatimadedeni mittamanajari.

*Diodsa dada toqquimacca odsadsa manaconitohui dadadedeni mohua ininebaqqijari*

*Mateo 21.12-17; Roca 19.45-48; Huano 2.13-22*

<sup>15</sup> Nadsapa Jeso Jerosarehuaji tocanajoranipomadsa Diodsa dada toqquimahuaji toqquedsimani-pomajari. Najaro odsacca boronidsa madija bani bedi Diodsa da tahijinecca dade toquejenahi qqui tajari. Manaconitohui dadadedeni qqui inabaquidsapa huapima mohua ininebaqqijari. Mimittadedeni naco mohua ininebaqqijari. Dsiniro cacacajiquimeradedenicca huahuanari naqui hua inaridsajaro. Midsori dadadedenicca huihuittari naqui hua inaridsajaro.

<sup>16</sup> Madija ohuahadeni naco najaro odsacca boroni motta todsepetaji dsojo dsojo ihiquimamana nejeranijine Jeso ecossajaro nade. <sup>17</sup> Nadsapa Jeso huapima mari icanabaqqijari: —Dio Atti dsodo nanidsa ajima najaro: “Occa odsapi ohuadsa huati huati toquinahijinecca odsa tocajanitohui. Dsama huapimacca madija ohuadsa huatide jajahidsima nahijine” naponi nade Dio Atti dsodo nanidsa. Naraha tiadenipi madija titicamaidsa-baqquimana nadsa tijinedenia pina bobotidedenicca quequeriqqui odsassa ticananamanajaro —nahi nade Jeso.

<sup>18</sup> Naraha dada toqquimade taminedeni, jodiodenicca marinaja maridedeni tedseje najaro ima mittamanadsapa

Jesodsa jiperaquuri najari. Madija huapimapa Jesocca marinajatohui disseraquuri nadsapa tamededeni, maridedeni tedseje Jeso deni tojahi noppine cappinamanajari. —Jesopa deni tojadsa ajimani iquejenarana —quinadsa Jeso dsoqquehijine jara jara quinajari: —¿Nejecoma inanadsa Jeso inanadsoqquehijine? —quinajari nade. <sup>19</sup> Naraha todsidsidsa Jesopa pocca dodosse tabaqqi tedseje Jerosaredsa jai tojenajari.

*Ahua iquiera bono-jarajari Jeso attijine botejari*

*Mateo 21.20-22*

<sup>20</sup> Nadsapa huada ssiaja dsidsidsamassa ahua iquiera huahihuaaji jai tojapomajari. Qqui toquinapomadsapa jaboma botejari. <sup>21</sup> Nadsapa Pedro bodi huatomadsa Jesodsa huati tajari: —¡Ohua Maride, qqui tanaja! Maitta iquiera tettidsa tinajidsojaripa botea —nahi nade.

<sup>22</sup> Naraha Jeso pohuadenidsa huati tajari: —Tibodidenidsa: “Diopa occa huatinajassa inananijine pajirahi” tiquinaji. <sup>23</sup> Pajissara tiadenidsa huati onajaro: Madijapa ajijaro ssonodsa huati tadsa: “Ssono, titehemadsa passo imenidsa jaro tidsanaji” nadsapa ssono nema nanitohui. Pohuapa jehe nahissa tadsa pohua bodi: “¿Pajissa tojapadseje? Nohueranitide” najaradsapa Diojine ssono jaro dsananitohui, onajaro. <sup>24</sup> Najaroa ohuatti: Diodsa huati tiquinadsapi tibodidenidsa: “Jehe, Diopa nema inananijine pajirahi” tiquinadsapi ticcadeni huatinaja Diojine najarossa inananitohui, onajaro —nahi nade Jeso.

<sup>25</sup> —Diodsa huatide tiquejenadsa naqui madija tiadenidsa ima inanapjarotohui tibodideni huatodsapi: “Najaro imadsa ohuati ajimana. Pohuadsa ohuadijerana” tiquinaji, onajaro. Nema tiquinadsana ticcadeni Abi Dio memehuaji madijaripa ticcadeni imasiridsa huati ajamahitohui. [ <sup>26</sup> Naraha tibodideni najaridsa epeje

tiquinejeradsapi ticcadeni Abi Dio memehuaji madijaripa ticcadeni imasiri epeje inana-jeranitohui, onajaro –nahi nade Jeso. ]

—¿Nejecojaricca dacorehe ticajijaro? —quinajari Jesodsa *Mateo 21.23-27; Roca 20.1-8*

<sup>27</sup> Nahi dsotodepa Jerosarehuaji bacco tanimanapomajari. Nadsapa Diodsa dada toqquimahuaji Jeso toqquedsimadsapa pohuadsa jiperaqquri najarideni aja dada toqquimade taminedeni, jodiodenicca marinaja maridedeni, jodiodeni ime jocohuideni quinadsa Jesodsa tohuajiressimanajari. <sup>28</sup> Nadsapa pohuadsa huati toquinajari: —Iadsa ticca ima tecomeraji. ¿Nejecojaricca dacorehe ticajijaro? ¿Nejecojari attidsa dadadedeni mohua tininebaqquijari? —quinahi nade.

<sup>29</sup> Naraha manaco Jeso pohuadenidsa huati tajari: —Ohua naqui tiadenidsa huati onana, tecomeramananjine. Ohuadsa tecomeramanadsapi ohua dossede oni, occa dacorehe tahimarini tiadenidsa huati onanijine. <sup>30</sup> Jari, Huanopa ¿nejecojari icadossedsa topa idsanabaqquijaritta? ¿Diojine ttarana, madijajine ttarana? Jari, ohuadsa tecomeramanaji —nahi nade Jeso.

<sup>31</sup> Naraha taminedenipa pohuadenira huati tocanirere canajari: —Jaho “Huanocca topanijipi Diocca dosseniji” inadsapi Jesopa: “¿Nejecotohui pohuadsa jehe tiquinejerajarotte?” nahitohui iadsa —quinahi nade. <sup>32</sup> —Naraha “Huanocca topanijipi madijacca dosseniji” inadsapi madija iadsa huadimanarana. Aja madija huapima attidenipa: “Huanopa Dio icadossejari. Pajissa Dio Atti cacomerabote” quiquinanade —quinajari taminedeni, madijadeni noppine cappinamanadsa. <sup>33</sup> Nama quinanjaja Jesodsa: —Ssamoqquri inani —quinahi nade.

Nadsapa Jesoa: —Ohua naqui ohua dossede onipa tiadenidsa ohuacomera-jarahi —nahi nade pohuadenidsa.

## 12

*Huidsaja cacahuade tabaccoraquiri najaridenicca ima Mateo 21.33-44; Roca 20.9-19*

<sup>1</sup> Nadsapa Jeso pocca marinaja ajijaro namidsa imadinicca ima tadsajani mari icanabaquijari: —Madijapa pocca huidsajadsa ppa nahi uva pohuara ppa inajari. Nadsapi huidsaja inidi siba hua inahuajanijaro. Uva bono ttai nadsa ppejene tojahijine naqui sibadsa odi inahatojaro. Huidsaja cacahuade huittarihijine siba hua tamaroni naqui hua inamarojaro. Najaro huapima jicadsapi huidsaja jinede pocca huidsaja ecahuamananijine madijatohui qqui naridsajari, nahi pocca huidsajadsa tarabadsa quinahijine, ppa nahi uva ecahuamanahijine. Uva bono jadadsapa motapa huidsaja jinededsa tojahijine. Motapa huidsaja cacahuadedeni pohuadenidsa tojahijine. Nadsapa pocca huidsaja ecahuamananijine madija qqui inabaquidsapa pocca huidsaja pohuadenidsa inebojaro. Nadsapa jinede dsama huaji tanihuaji toccajari. <sup>2</sup> Uva bono jadahicca abadsico bacco tadsapa huidsaja jinede huaji tanidsa madiraha pocca dodosse ojaría pocca huidsajahuaji dosse inanijari, uva bonotohui huidsaja cacahuadedenidsa huati tahijine. <sup>3</sup> Naraha pocca dodosse huidsajahuaji bacco nanidsapa huidsaja cacahuadedeni dama quinadsa idaquimanajari. Uva bono jiraha dosse inanimanajari. <sup>4</sup> Nadsapa huidsaja jinede pocca dodosse ohuaha dosse inanijari. Huidsaja cacahuadedeni-huaji bacco naniraha najari naco inajidsomanadsa tati biquerajari. Itamassomanadsa uva bono jiraha dosse inanimanajari. <sup>5</sup> Nadsapa pocca dodosse ohuaha dosse

inanijari. Naraha najaripa inanadsoqqe-manajari. Dso-tode naco pocca dodosse tabaqqi dosse inanibaqqiui huapi taraha motadenipa itabaromanajari. Motadenipa inanadsoqqe-ridsamanajari.

<sup>6</sup> —Nadsapa pohuadsa ojaría madiccahi, najaripa huidsaja jinede pohua pocca ejedeni. Najaridsapa huati huana tajari. Pohua bodipa: “Occa ejedenidsana cap-pinamanahitohui” najari. Nadsapa pocca huidsaja cacahuadedenidsa pocca ejedeni dosse inanijari. <sup>7</sup> Naraha huidsajahuaji bacco nanidsapa huidsaja cacahuadedeni pohuadenira huati tocanirejari: “Ajaripa huidsaja jinede bedi. Nidsaranibote imehi dsoqquedsa huidsajapi pohuadsa tojanitohui. Jari, inanadsoqqeua, huidsajapi icca tojanijine” quinajari. <sup>8</sup> Nama quinadsapa huidsaja jinede bedi dama quinadsa inanadsoqqe-manadsapa huidsaja idenihuaji coro quinajari —nahi nade Jeso.

<sup>9</sup> Nadsapa Jeso pohuadsa queriqquimanajaridenidsa huati tajari: —Jari, tibodideni huatoji. Huidsaja jinede pohuadenidsa ¿nejecoma napadsaja? Pohuapa bacco nanidsa huidsaja cacahuadedeni inajicadsapa huidsajapi madija ohuahadenidsana da inanitohui —nahi nade Jeso.

<sup>10</sup> Nadsapa Jeso pohua tahimari pohuadenidsa ahuaato tanijine Dio Atti dsodo nanicca huati tajari: —Tiadenipi Dio Atti dsodo nanicca hua hua titiquina naraha siba huahuattajo tojajaro tahimarini ¿tetideni ajimamanajaroqui? Imapi ajima najaro:

“Odsa sibadsa icanahatomananijinepi nanahatodedenipa siba ojariepi ettajomanani nade.

Naraha dsotodepi najaro sibana odsa daco cajiranijine tojajaro.

<sup>11</sup> Aji siba huahuattajo tojajaropi ia Medsede Djojine deni tojajaro. Najaro imajine Diodsa etidsejaro” nani Dio Atti dsodo nanicca

—nahi nade Jeso. <sup>12</sup> Nadsapa dada toqquimade tamine-  
deni, jodiodenicca marinaja maridedeni quinadsa Jesocca  
marinaja mittamanadsapa bodideni nahatoqquri najari:  
—Jesopa icca ima huati huati tajari, iapi pohua ettajo-  
jarijine —quinahi nade. Nadsapa Jesodsa huadimanadsa:  
—Jeso todsepe inanana —quinaraha madija noppinedeni  
cappinamanadsapa apaja quinadsa jai tojanijari.

—¿Romanodenicca tamedsa icca dsinero mota da inani-  
jine bica taqui? —quinajari

*Mateo 22.15-22; Roca 20.20-26*

<sup>13</sup> Nadsapa jodiodenicca tamedenedipa marinaja  
pariseodsa jehe quinajarideni pama, tamine Herodecca  
madija pama quinaha dosse inajonabaqqi-manajari,  
Jesocca ima inassamomanadsa pohuadsa ima  
inassonarimananjine. <sup>14</sup> Bacco najonamanadsapa  
huati toquinajari: —Mamaride, ticca ima iadsa ahuato  
tani. Pajissara huati huati tinajaro. Madija attideni  
noppine ticappina-jeradsapi ticca ima onihi toja-  
jerajaro. Madija deni tojajari, madija dsepe sse tajari,  
madija ajamani tojajari tedsejepa tiadsa najarissa  
caniqqumerajari. Pajissehera Diocca marinajadsa madija  
madimanahissa tahijine mari mari titicanabaqqi najari  
—quinahi nade. —Nadsama iapi romanodenicca tamine  
deni tojahicca pocca dossenijidsa icca dsinero mota  
pohuadsa da inanijine ¿bica taqui? ¿Bica tejerarane?  
Moisesicca marinajadsa ¿oppina taqui? ¿Oppinera  
tarane? ¿Tetti nejecoma tani? ¿Paca inanijinequi?  
¿Paca inejeranijinerane? —quinahi nade. <sup>15</sup> Jesodsa  
attideni bica tadsa huati huati toquinaraha poccadeni  
maidsehe pohuadsa ahuato tadsa pohuadenidsa huati  
tajari: —¿Nejecotohui occa ima tossamonijine ohuadsa  
huati tiquinajaro? Jari, ohuadsa dsinero denario dsojo  
ticanajonamanaji, qqui ocanana —nahi nade Jeso. <sup>16</sup> Dsojo

icanajonamanadsapi Jeso attia: —Jari, ajijaro ccararadsapi ¿nejecojari corimena anijaro? ¿Nejecojari oni dsodo najaro? —nahi nade Jeso.

Nadsapa pohuadsa ecomeramanajari: — Romanodenicca taminedija —quinahi nade. <sup>17</sup> Nadsapa pohuadenidsa Jeso attipa: —Romanodenicca tamine pocca dsiniropi pohuadsa da tinanimanaji. Naraha Diocca tiquejenadsapi Pohua jipa tahiccara Pohuadsa da tiquinaji —nahi nade Jeso.

Nadsapa —Jesocca ima tossamona —quinajarideni jabojomanadsa attidenipa: —A, icca ima ecomeraniijine nahato tajaria —quinahi nade.

*Nidsa jicamanajarideni nahatonimanadsapa caji caji cana-jarahitohui*

*Mateo 22.23-33; Roca 20.27-40*

<sup>18</sup> Nadsapa Isaraeri potemahi jodiodeni mota marinaja sadosedsa jehe quinajarideni Jesohuaji bacco quinajari. Poccadeni marinajapi: —Idsoqqedsapi inahatoninijine nohuerani —quiquinanajari. —Najaro imadsa Jeso atti ijine tossamodsa cobara tana —quinadsa Jesodsa najaro ima huati toquinajari: <sup>19</sup> —Mamaride, Moisesicca mari-najadsapi ajima nani: “Maquidejepa amoneje cajiraha ejedeni jiraha dsoqqedsapa pocca amonejepi pohua imecotea icajina, nahi ejedeni cajidsapa pocca ato dsoqqe-jaricca ejedenissa nahijine” nade Dio Atti Moisesi dsodo inajaro. <sup>20</sup> Nadsama tiadsa ima ajima najaro huati inana. Aja pohuadeni imecote pohuadenira 7 quinaha madi-manajari. Tahideccaha amoneje cajipojari, naraha bedi jiraha dsoqqejari. <sup>21</sup> Dsotodecca naco pohua ohuaha bedimeni icajiraha ejedeni jiraha dsoqqejari. Dsotodecca naco najaro amoneje icajiraha najari naco ejedeni jiraha dsoqqejari. <sup>22</sup> Najaro imapi nema dsanapojaro 7 quinaraha ejedeni jiraha jicajari. Najarideni jicadsapa

poni naqui dsoqquejaro. <sup>23</sup> Nadsapi dsama jicadsa madija inahatonidsapi pohua imecote 7 quinajaripa ¿nejecojarina ponicca maqqui tojapadsaja? Huapimapa poni ica-jiquimanaporaha —quinahi nade.

<sup>24</sup> Naraha Jeso attipa: —Ticcadeni marinajapi dsori tajaro. Dio Atti nahatoqquri tiquinaraha pajissa tiquinanissa tejerajaro. Diopa pocca dacorehema madija inahatonibaqquihijine pajirahi naco ssamoqquri tiquinajaro. <sup>25</sup> Jicamanajarideni nahatonimanadsapa caji caji cana-jarahitohui. Diohuaji madimanadsapa pina Diocca dodosse tabaqqui memehujiccassa quinahitohui. Aja pohuadenipa caji caji cana-jaradsa madimanajari.

<sup>26</sup> —Nadsama Diojine madija nahatonimanahicca imapi Pohua Atti cacomerabote Moisesi dsodo inapojaro. Najaro Dio Atti dsodo nani hua hua titiquina naraha ¿najaro imapi tetideni ajimamanajaroqui? Aji ahua diji tanidsa Diopa Moisesidsa huati tajari: “Ohuapi Dio, ticca idideni Abarahao, pohua bedi Isahaca, pohua bedi Jacobo quinajaridenicca Dio ojani” nahi nade. <sup>27</sup> Aja Dio Atti nama nadsapa Abarahadeni nahatonimanadsa madimana-dsanapohuicca ima ahuaato tajaro. Diopa paja dsoqquemanarihi najaridenicca Dio jarahi. Diopa camittaqquri najaridenicca Dio. Puhuapa jidapana naco poccadeni Dio. Najaroa ticcadeni marinajadsa: “Nahatonie nohuerani” titiquina najaropi dsori tajaro. Pajissa jerani —nahi nade Jeso.

*Diocca dosseniji deni tojanicca*

*Mateo 22.34-40; Roca 10.25-29*

<sup>28</sup> Jesopa sadoseodeni tedseje ahuaaji huati ahuaaji huati quinana jodiodenicca marinaja maride ojariaha Jeso pohuadenidsa ecomerani bica tani mittadsapa pohua naco Jesodsapa huati tajari: —Jari, Diocca dosseniji huapi taraha ¿nejecojaro dossenijina pocca dosseniji huapimadsa deni



tojajaro? —nahi nade. <sup>29</sup> Nadsapa pohuadsa Jeso huati tajari: —Aji Diocca dosseniji deni tojaniccapi ajima najarona paji:

“Isaraeri potemahideni, titaharibobo canaji. Ia Medsede Diopa ojarijari. Dio ohuaha nohuerahi.

<sup>30</sup> Tiadeni Medsede Diodsa tetideni huanaqquri naji. Tibodideni huatonissa tadsa, dacoco tijiradsa Pohuadsara disseraqquri tidsanapomanadsapi Pohuadsa tetideni huanaqquri nanijine.”

<sup>31</sup> Diocca dosseniji deni tojanicca onihi pina tahideccassa najaro. Deni tojaniccapi ajima najaro:

“Tinoridenicadsa tetideni huanaqquri naji. Pina tiadenidsa tetideni huanaqquri najarossa naji.”

Najaro Diocca dosseniji pamehena deni toquejenajaro. Pocca dosseniji onihipi najaro pamehessa nejerajaro —nahi nade Jeso.

<sup>32</sup> Nadsapa Jesodsa jodiodenicca marinaja maride attia: —Jehe Mamaride, tettihi pajissa. Ia Medsede Diopa ojar-  
ihi. Ohuaha nohuerajari. <sup>33</sup> Nadsama Diodsara eti huanaqquri nanijine. Ibodi huatonissa tadsa dacoco ijradsa Pohuadsara disseraqquri idsanapodsapi Pohuadsa eti huanaqquri nanijine. Inoriccadsa naqui eti huanaqquri nanijine pina aji iadsa eti huanaqquri najarossa inanijine. Najarona denima bica tajaro. Aji icca bani bedi ono tojahijine Diodsa dada toqqimahuaji da da ihinanajaro, icca daniji onihi naqui dada toqqimahuaji ihinebo najaro huapimapi Diodsa bica taraha aji tohuati huanehe pameheccadsa deni toquejena-jerani —nahi nade jodiodenicca marinaja maride atti.

<sup>34</sup> Pocca cacomeraniji bica tanicca Jeso mittadsapa: —Jehe, Diocca cacahuehedsa tijanijine tipajirabote nani —nahi nade Jeso. Jesopa ecomerannya dsanapodsapa ima

onihi pohuadsa huati toquinahijine huapima cappinamanajari.

—¿Cristo-Mesiapa nejecojari potemahi tiquinajaro? —najari Jeso

*Mateo 22.41-46; Roca 20.41-44*

<sup>35</sup> Nadsapa Diodsa dada toqquimahuaji Jeso mari icanabaquidsapa madija ecomeramananijine huati tajari: —¿Nejecotohui jodiodenicca marinaja maridedeni attidenipa: “Cristo-Mesiapa Dabi Potemahi” quiquinanajari?

<sup>36</sup> Naraha tamine Dabipa maittaccadsama madidsa Dio Corimejine pohua tedsejemacca ima huati tadsapa pohua attipa:

“Ia Medsede Diopa ohua Medsede Mesiadsa huati tajari: ‘Ohuinori nahatonihuaji tittariji. Ohua tedsejepi tohuatti dacorajaro ticajiji’ najari. ‘Nidsaranibote tia huadidedenipa ajamani onanabaquihitohui. Poccadeni dacorehepi onajicanitohui’ napohui nade Dio.”

<sup>37</sup> Naraha madija attidenipa: “Cristo-Mesiapa tamine Dabi Potemahi” quiquinanadsapa ¿nejecotohui Dabipa pohua potemahidsaraha: “Ohua Medsede” napojaritta? —nahi nade Jeso.

Nahidsa Jeso atti mittade madija huapi taha queriquimanajari. Pocca marinaja mittamanadsa huatidsemanajari.

*Pina jodiodenicca marinaja maridedenicca madiessa tiquinejeraji*

*Mateo 23.1-36; Roca 11.37-54; 20.45-47*

<sup>38</sup> Jesopa madija mari icanabaquidsa ima ajima najaro huati tajari: —¡Paji, tiadenipi! Pina jodiodenicca marinaja maridedenicca madiessa tiquinejeraji. Pohuadenipa etero dequerajarodsa huedsaridsamanadsa attidenipa: “Iapi pina taminessa inani” quiquinanajari. Aji dadahujicca jahuidsas jahiridsadsa naco madija pohuadenidsa:

“¿Nija, bica tinani? Tiapi deni tijani” quinahijine tohuini quiquinanajari. <sup>39</sup> Dio Atti mamarihuaji jassi tarihijinepa deni toquejenajaridenicca huihuittari tohuini quiquinanajari. Jipacque imenidsa naqui deni toquejenajaridenicca huihuittaridsa jassi tarihijine tohuini quiquinanajari. <sup>40</sup> Nadsama tabira tocajamanajaro deni ponideni madimananijineccaraha icamaidsabaquimanandsa pohuadenidsa totoja nadsapi ponidenicca odsa naqui pohuadenidsa totocajaridsa najaro. Naraha poccadeni tabaccorehe ahuatora tanijinepi Diodsa huati huati toquinadsapa poccadeni huatinaja dequerajaro, aja madija pohuadenidsa: “A, Diodsa disseraquiri nahi” quinahijine. Pohuadenipa Dio Attima mamaidsamana nadsapa nidsa Diocca najidsohue denima oppina tanicca pohuadenidsa ssonarinitohui —nahi nade Jeso.

*Amoneje tabira tocajani ponicca dsiniro Diodsa da inanicca ima*

*Roca 21.1-4*

<sup>41</sup> Nadsapa Jeso Diodsa dada toqquimahuaji madicajari. Pohuapa nahi bodidsa madijacca da naqqinaja dsiniro cocoro todsa cahittarini tadsajanima huittaritari. Madija poccadeni dsiniro coro coro icadsamanani cattoma canajari. Dsiniro ssequiri najarideni huemani coro icadsamanani qqui tajari. <sup>42</sup> Nadsapi nanidsa tabira tocajani tohuati nahana tajaro ccajonajaro. Poni madinjinecca dsiniro bedeniraha ponicca danijijine capamehe cororo icadsajaro. <sup>43</sup> Nadsama najaro qqui tadsapa pohua huatimadedeni huahua inabaquijari: —Pajissara tiadenidsa huati onajaro: Ajijaro tabira tocajani cappiradsa tohuati nahana taraha ponicca daniji dsiniro bedeniraha deni tojani. Pina Diodsa denima da inajarossa najaro. Madija ohuahadenipa poccadeni daniji toqueriquini huapi taraha Diodsapi ajimani tojarossa

najaro. <sup>44</sup> Pohuadenipa sseqquiri nadsa poccadeni dsiniro mota arobeni da quinaraha ajjaro tabira tocajanipi cappiraraha nemaneha da inajaro. Tohuati nahana tani, poni madinijineccaraha da inehe jicajaro —nahi nade Jeso.

## 13

—*Diodsa dada toqqimahuajicca odsa taboridsanitohui*  
—najari Jeso

*Mateo 24.1-2*

<sup>1</sup> Nadsapa Diodsa dada toqqimadsa Jeso qquenadsapa pohua huatimade ojaría attia: —¡Ohua Maride, qqui taneje! Diodsa dada toqqimahuajicca odsa huapimapi siba bicanidsa nahatoridsani bicaqquiri naha —nahi nade pohua huatimade. <sup>2</sup> Nadsapa Jesoa: —Aji odsa imeni sibadsa nahatoridsani bicabote jidapana qqui tinaraha nidsa dsotodepi taboridsehe jicanissa tanitohui —nahi nade Jeso.

*Dsama jicani tohuajiradsa nahatoqquiri inanijinecca ima*  
*Mateo 24.3-28; Roca 21.7-24; 17.22-24*

<sup>3</sup> Nadsapa ssono Oribohuaji Jeso pohua huatimadedeni tedseje jai tojemorajari. Najaro ssonopi Diodsa dada toqqimahuaji ahuaato tajaro. Nahidsa Jeso huittadsa Pedro, Satiaco, Huano, Adiri quinajarideni pohuadenira Jesodsa huati toquinajari: <sup>4</sup> —Ia Maride, jidacca ima huati tinajaropi ¿nejecoma nadsa tojapadseje? Najaro ima tohuajiradsa nahatoqquiri inanijinepi ¿nejecora qqui inapopadseje? —quinahi nade.

<sup>5</sup> Nadsapa Jesoa: —Paji, madija tiadeni tocamaid-sabaqquirana. <sup>6</sup> Nidsa madija huapi taha pohuama ohua onidsa maidsamanadsapa: “Ohuapi Cristo-Mesia ojani” quiquinanahitohui. Nadsapa madija huapi taha

icamaidsabaqqui-manahitohui. <sup>7</sup> Ima onihi naqui: “Jadsire tojaridsani” timittamananitohui. Naraha ticappinamana tejerana. Jadsirepi epeje tojaponitohui. Naraha dsamapi jiquejeraccanitohui. <sup>8</sup> Nadsama madija dsama onihicca, dsama onihicca tedseje jadsire inanamanaridsanitohui. Tamine ohuahacca madija, tamine ohuahacca madija tedseje cahadire-ridserahitohui. Namidsadsa naqui tojaridsanitohui. Pemi naqui cajiridsanitohui. Najaro ocasserehe tahide tojaporaha denima ocasserehe tojadsanaponitohui – nahi nade.

<sup>9</sup> –Paji, ¡tetideni huatomanaji! Madija huadiqquri najari cajiridsahi. Najaridenipa tiadeni tadamanadsapa jodiodenicca taminedenihuaji ticcadeni ima mittamanahijine tiadeni tohuaqquedsimabaqqui-manahitohui. Jodiodenicca Dio Atti mamarihuaji naqui tiadeni itabaromananitohui. Otahimari tiadenidsa tojajaro acconi huadimanadsa dsama cacahuadedeni baccodenidsa tidomo huanijine tiadeni tohuaqquedsimabaqqui-manahitohui. Dsama onihicca dsama onihicca madija tamine deni toquejenajari baccodenihuaji naqui tidomo huanijine tiadeni tohuaqquedsimabaqqui-manahitohui. Nanidsana ticcadeni ima tecomeramanadsapi taminedenipa otahimari mittamanahijine. <sup>10</sup> Dsama jiquejeraccadsama otahimari madija tocassiejerahijinecca dsama huapimadsa ecomeraridsa-manaccanitohui. <sup>11</sup> Nadsapa taminedenihuaji tiadeni tohuaqquedsimabaqquimanadsapa pohuadenidsa ticcadeni ima tecomeramananijinepi ¿nejecoma onapadseje? tiquinejerana. Ticappinamana tejerana, onajaro. Taminedenidsa ima huatide nahatoqquri tiquinanijine Dio Pohua Corimena tiadeni acco tocamabaqquihitohui. Dio Corimejine tiadenidsa ima ahuato tadsapi najaro

imara huati tiquinaji. Huati tiquinadsapi tettideniraha Dio Corimejinena huati tiquinajaro. <sup>12</sup> Naraha najidsohuepi tiadenidsaha ssonarini ojari nejeranitohui. Aja ohuadsa jehe quinajaridenipa otahimaridsa toquejenajarijine pohua ohuahadeniraha pohuadenidsa huadiqquri nadsapa eheccora-baqquimana nahitohui, inajicabaqqui-manahijine. Imehideni naco pohua bedideni otahimaridsa toquejenajarijine bedidenidsa huadiqquri nadsapa pohuadeni bedideni eheccora-baqquimana nahitohui, inajicabaqqui-manahijine. Bedideni naco imehideni otahimaridsa toquejenajarijine pohuadeni imehidenidsa huadiqquri nadsapa imehideni ihinajicabaqquimana nahitohui. <sup>13</sup> Occa madija tiquejenarajinepi madija huapima tiadenidsa jiperaqquri nahitohui. ¡Naraha tiadenipi dacoco tijiraji! Najaro huadie tinahanamana-dsanapodsapi tijicaraha ticassiejeranitohui. Timadimanaccadsa dsama jicani bacco tiquinadsa naqui ticassiejeranitohui –nahi nade Jeso.

<sup>14</sup> Jesopa dsama jicanicca ima denima mari icanabaqqujari. (Pocca marinaja hua tiquinadsapi timittamananissa taji.) Pohua attipa: —Nidsa jodio quejena-jarajaridenijine Diodsa dada toqqumahuaji oppinabote corime huedsadsapa toppinanitohui. Nahidsa huedsahipa bica tejerani. Nadsapi pohuadenijine icca madija jodiodenipa icappinaquimanadsa Diodsa dada toqquma paji inebomanarinitohui. Najaro ima tojani qqui tiquinadsapi tiadeni huapima dsama Jodeahuaji timadiridsa-manajaropi ssonohuaji tidomo toqqemorana. <sup>15</sup> Madija pocca odsa amossinihuaji ccaridsadsapa pohua dsepetajitohui pocca odsahuaji toqquedsimani-jarana. <sup>16</sup> Madija pocca huidsajahuaji dsepe ijijari naco paja joppa tarina. Pocca eterotohui

odsahuaji ccani-jarana. ¡Poni! <sup>17</sup> Jaho, amoneje jiamanajarodeni, bacconideni ijimanajarodeni naqui joppa toquinanijine tohuati nahanaqquri nanitohui. <sup>18</sup> Najaro ima oppinabote tojadsa tidomo toccadsapi ssirini nohueranijine Diodsa huati huati tidsanapomanapoji, onajaro. <sup>19</sup> Najaro ima oppina tanicca bacco nadsapi madija huapima ocasserani imeni inahanamananitohui. Maittaccadsama Dio dsama inahatoponipi nema nanicca ocasserehe qqui quinapo-gerani. Nohuerani. Ia naqui qqui inejerani paji nani. Nidsa dsotode naqui nema napoma-geranitohui. Nohueranitohui. <sup>20</sup> Najaro ocasserehe nema dsanapodsapi madija tossijaja cama-jarahitohuiraha najaro ocasserehecca huada Dio ajimani inananitohui. Dio pocca madija pohua icattejidsa-baqquijaridenidsa huati huana tadsapa: “Nanidsa epejena,jicana” nahitohui Dio —nahi nade Jeso.

<sup>21</sup> —Nadsapa madija tiadenidsa pohuama: “Qqui, ajaripaja ia Idinide Cristo-Mesia” quinadsa, madija ohuaha attideni naco: “Qqui, ajaccajarina Cristopaja” quinadsapa pajissa tiquinejerana, onajaro. <sup>22</sup> Madija mamaidsadedeni naco tiadenidsa jahijonahitohui. Pohuadenipa: “Ohuapi Cristo-Mesia ojani” quinahitohui. Ohuahadeni naco: “Ohuapi Diocca dosseniji ojani, Pohua Atti ohuacomeranijine” quinaraha maidsamanajari. Pohuadeni bodipa: “Dio icattejidsa-baqquijarideni icamaidsabaqquina” quinadsa poccadeni maidsehe canahatorimana canaridsahitohui. Madija pohuadenidsa: “Pajissa Diocca dosseniji” quinahijine tohuini quinaraha Dio Pohua icattejidsa-baqquijarideni motapa pohuadenidsa pajissa quina-jarahitohui. <sup>23</sup> Nadsapa ¡paji! Ajijaro ima huati huati onajaropi tetideni ajima-gerana. Najaro huapimapi nidsaranibote tojanijineraha jidapana tiadenidsa huati

onajaropajipa — nahi nade Jeso.

*Jeso ccaronapomahicca ima*

*Mateo 24.29-35, 42-44; Roca 21.25-33; 17.26-30, 34-36*

<sup>24</sup> Jesopa ima denima huati huati tajari: — Naraha ocasserehe inahanamanani nattinipi maji ohuihitohui. Abadsico naco cahuihitohui. <sup>25</sup> Memecca abadsico bedi naco catojahitohui. Jidapapa memecca huapima dacoraquuri naccahi naraha dsotodepa meme dsadsa nadsapi huenene huenene canahitohui. <sup>26</sup> Nadsana ohuapi Madija Bedi ojararoa nidsa meme essenima oquejemeha occaronapomani madija huapima qqui toquinahitohui. Occa dacorehe, occa deni tojehe ahuato tanitohui. <sup>27</sup> Nadsapa occa dodosse tabaqqi memehujicca dosse onaridsabaqqidsapa Dio icattejidsa-baqqipojarideni inequeriqquini-baqqimanahitohui. Dsama nemanehedsa madiridsamanajarideni huapima ahujicca, ahujicca inequeriqquini-baqqimanahitohui — nahi nade Jeso.

<sup>28</sup> —Jari, ahua iquiera tahimaridsa ticahatteraji. Eppe moro nimanihi qqui tiquinadsapi: “Jehe, dsadsajade tojemanini” titiquina najaro. <sup>29</sup> Pina najaro imassa najaro aji dsama jicani tahimarini huati huati onajaro qqui tiquinadsapi: “Jehe, Jeso ccanihi. Pina icca noccobijidsa huajarissa najari” tiquinana, onajaro. <sup>30</sup> Pajissara tiadenidsa huati onajaro: Aji dsama jicani tahimarini huati huati onajarocca madija dsoqquemana-jaraccadsama najaro ima huapima tojanissa tani qqui toquinacahitohui. <sup>31</sup> Meme, nami naqui jicaridsanissa tanitohui. Naraha ohuattipi jiquejeranitohui. Aji huati huati onajaropi najarossa nanitohui — nahi nade Jeso.

<sup>32</sup> —Occaronapomanicca huada, maji naco madija huapima ssamoquuri nahi. Diocca dodosse tabaqqi memehujicca naco ssamoquuri nahi. Dio Bedi ohua



naqui najaro ima ssamo onani. Naraha Abi Dio Pohuana nahato tahi ojarihi — nahi nade.

<sup>33</sup> —Nema nadsapi tetideni huatonissa taji. Occaronapomanijinecca huada ssamoquiri tiquinaraha otohui tinajoramanehe timadimanaji. <sup>34</sup> Ohuapi Madija Bedi ojajaroa occaronapomanicca imapi pina ajijaro imassa najaro: Madijapa dsama huaji tanihuaji toccahijine joppemadsapa pocca odsa ecahuamananijine pocca medse nahidsa inebobaquijari. Huapimapa dsepedeni ijimanahijine tarabaisa onihi onihi cajiridsamanajari. Jinedepa noccobiji cacahuadedsa: “Otohui ticatoma canana” nadsapa toccajari. <sup>35</sup> Odsa cacahuadedeni huapimapa jinede ccanihicca huada ssamoquiri nadsapa najoramanaha madimanajari. “Maji toccadsa ccanihitide, dsome nocconi itide, tacara huahua nadsa itide, ssiajadsa itide” quinajari. Tiadeni naqui occaronapomanicca huadatohui tinajoramanehe timadimanaji, onajaro. <sup>36</sup> Ajana, odsa cacahuadedeni jinedetohui najoramana-jaradsapa nassa cahadijadsa bacco naninaja. Tiadeni naqui ohua occaronapomadsapi tinajoramanajeradsa bacco onanirana. <sup>37</sup> Nadsapi tiadenidsa ohuattipi ajima onajaro: Occaronapomanicca huadatohui tinajoramanehe timadimanaji. Madija huapima naco nama quinana, onajaro — nahi nade Jeso.

## 14

*Jeso todsepe tojahijine imahaha canajari*  
*Mateo 26.1-5; Roca 22.1-2; Huano 11.45-53*

<sup>1</sup> Jodiodenicca ejete pamehe tohuajirajonajaro. Tahidecca huadadsapi Pascoa tojapojaro. (Ettidsapi: Dio tossoquimajari, inajaro.) Dsotodepi Pan ssaja tajarahi jipamanajaricca ejete tojapomajaro. Najaro ejete tojanijinecca huada pamehe dsori taccadsapi ajijaro ima

tojajaro. Dada toqquimade taminedeni, jodiodenicca marinaja maridedeni quinajaridenipa Jesodsa jiperaquiri najari huapima queriqquidsa: —¿Nejeco maidsehedsa Jeso todsepe tojadsa dsoqquehijine? —quinahi nade. <sup>2</sup> Naraha pohuadeni atti onihipi: —Ejete tojadsapi ima nohueraccanijine. Jesodsa madija jipaquiri najarideni pohua dama inahi qqui toquinadsapa mohua mohua canarana —quinahi nade.

*Jeso tatidsa majojo sso inarजारocca ima  
Mateo 26.6-13; Huano 12.1-8*

<sup>3</sup> Jesopa odsa capamema najaro onini Betaniahuaji madidsa Ssino huapi jadsidsi quiquinanajaricca odsadsa toqquedsimajari. Nahi Ssinocca odsadsa jipade jassi taridsa amoneje Jesodsa tohuajiressijaro, poni dsapanidsa siba onini alabastro nahatoni jojo bicahi dsojo inajonajari. Najari jojodsa majojo bicani oninipi nardo dsojo icadsimajaro. Najaro majojopi passodsa quejemerani, huatini ccara tanicca. Nadsapi jojo bono idejidsadsa Jeso tatidsa nemanehes sso inarजारo. <sup>4</sup> Naraha nahidsa jassi tarijarideni motaha huadimanadsapa pohuadenira imahahacossieri najari: —¿Nejecotohui majojo ponima inajicajaro? —quinahi nade. <sup>5</sup> —Najaro majojo manaconipi dsiniro ccarara 300 denario denima nitide. Iadsa da inadsapi madija cappiramanajaridenidsa da iqquimanitohuiraha —quinahi nade, pohuadenira huati canirere canadsa. Nadsapa ponidsa naco atti atti quinajari nade. <sup>6</sup> Naraha Jesoa: —Epeje tiquinaji. ¿Nejecotohui ponidsa tedimanajaro? Ponijine ohuadsa nema nadsapi bica tani. <sup>7</sup> Cappiramanajaridenina tiadenidsa madimana-dsanapohuitohui. Tohuini tiquinadsapi pohuadeni tinanabica-baqquimanahijine bica taraha ohuapi tiadenidsa omadidsanapojeranitohui. <sup>8</sup> Aji majojo ohuassiredsas sso inarजारopi

pina odsoqquedsa ohua ppa idsamananijinessa najaro najorapojaro —nahi nade. (Jodiodenipa poccadeni madija dsoqquedsapa nama quiquinanajari.)<sup>9</sup> — Pajissara tiadenidsa huati onajaro: Dsama onihi, dsama onihidsa otahimari madija tocassiejerahijinecca ecomeramanadsapi aji otatidsa majojo sso inarजारocca ima naqui madija mittaridsamanahitohui. Nema nadsapi ponicca ima huatideni ajamamana-jarahitohui —nahi nade Jeso.

*Jodapa Jeso eccorahijine najorajari*

*Mateo 26.14-16; Roca 22.3-6*

<sup>10</sup> Jesocca dodosse tabaqqui 12 quinajari ojaria oni Joda Iscariotepa dada toqquimade taminedenidsa Jeso eccorahijine huatide toccajari. <sup>11</sup> Nadsapa Jodacca ima mittamanadsa huatidsemanajari: —Jehe, Jeso teccorajari manaco dsiniro tiadsa da inana —quinahi nade. Nadsapa Joda toccanidsa pohua bodi najorajari. Jeso pohuadenidsa eccorahijine inoccodsaridsajari.

*Ia Medsedecca jipacquie*

*Mateo 26.17-29; Roca 22.7-23; Huano 13.21-30*

<sup>12</sup> Pan ssaja tajarahicca ejete bacco tajaropi huada 7 nehe jicanijine. Najaro ejetecca huada tahideccadsa jodiodeni pohuadeni motta edede bedi Diodsa da da quiquinanajari. Edede bedi inanadsoqqe-manadsa ibanamanadsapa jipamanajari. Najaro ejete oninipi Pascoa quinajari. Nadsapi najaro huada bacco tadsa Jesodsa pohua huatimadedeni huati toquinajari: —¿Nejecohuaji Pascoacca jipacquie tiadsa inajoranijine? —quinahi nade. <sup>13</sup> Nadsapa pohua huatimadedeni pamahadsa huati tajari: —Odsa pananihuaji ticadapoji. Maququideje joridsa passo dsojo tanihi bacco tiquinadsapa pohua natti ticadamissana. <sup>14</sup> Pocca odsadsa toqquedsimanidsapa

nahicca odsa jinededsa huati tiquinana: “Ia Maride at-tipa: ‘¿Nejecohuajicca coba canahuajaninidsa Pascoacca jipacquiedsa ojipanijine ohuatimadedeni tedseje?’ napa-ja” tiquinana. <sup>15</sup> Nadsapa pocca odsa tetepicca coba canahuajanini imeni tiadenidsa nohue inanitohui. Nanidsapi huahuanari, huihuittari najoraponi. Nanidsana jijipa tinajoramanaponijine —nahi nade Jeso. <sup>16</sup> Nadsapa tohuedadsapa pina Jeso pohua huati tajarissa najaro odsa najorani qqui toquinajari. Nanidsa Pascoacca jipacquie dsome jipacquimanahijine najoramanajari.

<sup>17</sup> Jesopa pocca dodosse tabaqqi 12 quinajari tedseje dsomejonadsa jipacquimanahijinecca odsadsa bacco toquinajari. <sup>18</sup> Huahuanaridsa jassi nahujanidsa jipade toquejenadsapa Jeso huati tajari: —Pajissara tiadenidsa huati onana: Ohuadsa jipade tiquejenaraha ojaraha ohua ccaccoradsapa todsepe ojanitohui —nahi nade Jeso. <sup>19</sup> Nama nadsapa pohuadeni bodi qquedsadsa: —¿Aji ohuadsaqi? —naridsamanajari. <sup>20</sup> Nadsapa Jeso attia: —Tiadeni 12 tiquinaraha ojariana icca paratodsapa pohua naco pocca pandsa depo apa, depo apa nahi. Najarina ohua ccaccorahitohui. <sup>21</sup> Jehe ohuapi Madija Bedi ojajaroa nidsa odsoqquenitohui. Pina maittaccadsama otedsejemacca ima Dio Atti cacomeraqqiri najarideni dsodo quinapojarossa onanitohui. Naraha ohua ccaccoradedsa oppina tehe tojanitohui. Jaho, najari maqquideje tossonajaradsapa bica taraha, oppina tanicca dsori tahitohuiraha —nahi nade Jeso.

<sup>22</sup> Nadsapa jipade toquejenadsa Jeso pan idi nadsa Diodsa huati tajari: —Jehe Abi Dio, ticca daniji iadsa bica tahi —nahi nade. Nadsapa pan icanarobedsa dside jai da, dside jai da inaridsajari. Pohua huatimadedenidsa huati tajari: —Aja, apa tiquinajo. Ajijaropi ohuemecca ima —nahi nade Jeso.

<sup>23</sup> Dsotodepa dse quinahijine dsedse equidi nadsa Diodsa huati tajari: —Jehe Abi Dio, ticca daniji iadsa bica tahi —nahi nade. Nadsapa pohuadenidsa da icanadsa dse naridsamanajari. <sup>24</sup> Nadsapa pohuadenidsa huati tajari: —Ajajari dsedsepa ohuemenecca ima. Dio madija tedseje jehe canirehijinecca ima tojanijine. Nidsa ohua odsoqquedsa ohuemene toccadsapi najaro jehe canireniji pajissa tojanitohui. Aji ohuemene toccajaropi madija huapimadsa ima bicani tojanijine. <sup>25</sup> Pajissara tiadenidsa huati onajaro. Aja uva ppejene dse inajaripa dse onapomajaracchitohui. Nidsa memehuaaji Diocca cacahuheidsana uva ppejene ohuaha dsatira dse onahitohui —nahi nade Jeso.

*Pedro pohua namaidshijine Jeso huati tapojari*

*Mateo 26.30-35; Roca 22.31-34; Huano 13.36-38*

<sup>26</sup> Pascoacca jipaquie jicadsapi Diodsa jiri quinajari. Jiri quinaha jicadsapa ssono Oribohuaji jai tojemoranijari. <sup>27</sup> Nahihuaji bacco tomoramanadsana pohuadenidsa Jeso huati tajari: —Tiadeni huapima ohua tinebomananitohui. Pina Dio Atti dsodo napojarodsapi ajima nanitohui: “Nidsa edede cacahuade dsoqquedsapa pocca edede tojaribaqqihitohui.” <sup>28</sup> Naraha ohuapi Diojine onahatoninitohui. Onahatonidsapi titedsejemadeni dsama arobeni Carireahuajina occaninitohui —nahi nade Jeso.

<sup>29</sup> Naraha Pedro attia: —Huapima tia inebomanaraha ohuapi tia onebo-jeranitohui —nahi nade. <sup>30</sup> Nadsapa Jeso Pedrodsa: —Pajissara tiadsa huati onana: Tiapi ajijaro dsome tacara huahua nahi pama najaraccadsa ohuadsa: “Onocco jidsa tani” tanitohui. Dsotode naqui: “Onocco jidsa tani” tapomanitohui. Dsotode naqui nema tapomanitohui —nahi nade Jeso. <sup>31</sup> Naraha Pedroa: —¡Nohuerani! ¡Ohuapi nema onejeranitohui! —nahi nade. —Ima oppina tadsa naqui tiadsa “Onocco jidsa tani” onejeranitohui.

Tiadsama odsoqquenijine bica tani —nahi nade Pedro. Jeso huatimadedeni huapima naco attideni nama quinahi nade.

*Jesemanihuaji Jeso Diodsa huati huati tajari*

*Mateo 26.36-46; Roca 22.39-46*

<sup>32</sup> Nadsapa najaro ssonodsa ahua ppa nahi oni Jesemanihuaji jai tojjajari. Bacco toquinadsapa Jeso attia: —Tiadenipi ajidsa jassi tinaccaji. Ohuapi ajiccadsa Abi Diodsa huati onaccana —nahi nade pohua huatimadedenidsa. <sup>33</sup> Nadsapa Pedro, Satiaco, Huano quinajarideni jina inabaquidsapa najaridenina pohuadsa denima jai tojjajari. Nahidsana Jeso bodi qquedsadsapa ojibote najari.

<sup>34</sup> Nadsapa pohuadenidsa: —Obodi ocassera tajarojine ohuatiabote-te canani. Tiadenipi ajidsa tibomanaccaji. Tinoccodeni bissaccana —nahi nade Jeso.

<sup>35</sup> Nadsapa Jeso tocca-cca nadsa pohua baccohuaji namidsa pona nadsa Imehidsa huati tajari: —Abi, aji ima comabotepi ohuadsa huaji tinanaji. ¿Madija tocassiejerahijinecca ima onihi nohueraqui? Nohueradsapi epeje —nahi nade. <sup>36</sup> Imehidsa huati tapomadsa naco: —Abi, nahato tinani. Madija huapimacca ima manaconi najidsohue ohuadsa tojadsapi ocasserani ohuanitohui. Pina dsedse bidabote dse onanijinessa najaro. Najaro onahananijine jipera onaraha ohua jipa onanicca tohui onejerajaro. Tia jipa tinaniccana paji. Najarodsana ibora onajaro —nahi nade Jeso.

<sup>37</sup> Nadsapa pohua huatimadedenihuaji ccanijari. Bacco nanidsapa cahadijahira qqui tajari. Nadsapa Pedrodsa Jeso huahua najari: —Ssino ¿tedajaroqui? ¿Dsome nocconi ocaja-jeraraha tinoccodeni bissade tipajiramana-jerajaroqui? <sup>38</sup> Ticahadija-jeradsa Diodsa huati tiquinaji, ima oppina tehe tojadsapi tijaparimanadsa

ima tinanamana-jeranijine. Tibodidenipi ibora taraha tessiredenina mijira tajaro —nahi nade Jeso.

<sup>39</sup> Nadsapa toccanipomadsa pina Imehidsa huati tapo-huissa najari huati tapomajari. <sup>40</sup> Nadsapa pohua hu-atimadedenihuaji ccanipomaraha cahadijahira qqui in-abaqqijari, huada comani ahuamanaja nadsa. Jeso ccanidsa nocco toquejenajari. Naraha pohuadsa huati to-quinahijine tossamomanajari. <sup>41</sup> Diodsa huatide tocanajoranipomajari, pohua huatimadedenihuaji ccanipomad-sapa: —¿Tiyadenipi ticahadija dsanaponijinequi? Epeji, ohuapi Madija Bedi ojajaroa jidapapi ohua ccaccoradejine imasiri cajimanajarideni dsepedenidsa ojanitohui —nahi nade. <sup>42</sup> Nadsapa: —Jina, titehemamanaji. Ajana, jidapapa ohua ccaccorade ccajonahi —nahi nade Jeso.

*Jodajine Jeso dama quinajari*

*Mateo 26.47-56; Roca 22.47-53; Huano 18.1-11*

<sup>43</sup> Jeso huati huati naccaraha Joda bacco najonajari. Jodapa Jeso pocca dodosse tabaqqui 12 quinajarideniraha. Pohuana madija huapi taha eccajonabaqqijari. Jad-sirecca massito eccajonamana, huahuacca eccajonamana najaro. Pohuadenipa dada toqqumade taminedenicca dosseniji, jodiodenicca marinaja maridedenicca dosseniji, ime jocohuidenicca dosseniji jahijonajari. <sup>44</sup> Jodapa Jeso todsepe inahijine eccajonabaqqui-jaraccadsama taminedenidsa huati tapojari: —Nidsa pano mose onahitohui. Najarina dama tiquinadsapa biji jore tiquinadsa teccanimanana —napojari nade. <sup>45</sup> Nadsapa huapima jahijonadsa bacco najonamanajari. Nanaja Joda Jesodsa tohuajiressi, pina pajissa pohuadsa bica tajarissa nadsa: —¿Nija ohua Maride? —nanaja pano mose inajari. <sup>46</sup> Nadsapa Jeso dama quinajari. <sup>47</sup> Naraha Jesocca madija ojariana massito dsoppa jeo, dada toqqumadedenicca

tamine deni tojajaricca medse huaribo ca taneje tajo canajaro.

<sup>48</sup> Nadsapa Jeso pohuatohui jahijonaridenidsa huati tajari: —¿Nejecotohui tiadenipi ohua dama tiquinanijine jadsirecca massitoma, huahuaccama jai tijajonajaro? Nema tiquinadsapi pina bobotidetohui jai tijajonajarossa najaro. <sup>49</sup> Nadsa tiadenidsama huajijiradsa Diodsa dada toqquimahuaji mari mari ohonanaraha ohua dama tiquinehe nejerade. Naraha epeje, najaropi pina aji Dio Atti dsodo napojarossa najaro tojanijine —nahi nade Jeso.

<sup>50</sup> Nadsapa pohua huatimade huapimapa Jeso inebo-manadsa domo toccajari. Nadsapa Jeso pohua motta ojari naha iaccanimanjari. <sup>51</sup> Naraha dsabissopa pohua teteppedsara pohua teppe nadsa Jeso iaccanimanahi natti toccamissajari. Nadsapa Jeso tohuaccanidedeni pohua qqui quinadsa dama quinaraha <sup>52</sup> pohua tetepe ssiti, ccoroje joppa tadsapa dsori tajari nade.

*Dada toqquimadedenicca tamine deni tojajaridsa Jeso iaccamanajari*

*Mateo 26.57-68; Roca 22.54-55, 63-71; Huano 18.14*

<sup>53</sup> Jeso dama quinadsapa dada toqquimadedenicca tamine deni tojajarihuaji iaccamanajari. Nadsapa nahidsa dada toqquimade taminedeni queriqquijari, ime joco-huideni, jodiodenicca marinaja maridedeni huapima naco nahidsa toqueriqqui najari. <sup>54</sup> Naraha Pedropa huajima tohuanamissadsa dada toqquimadedenicca tamine deni tojajaricca boronidsa bacco todsimajari. Caipacca dodosse tabaqquidenidsama huittajari. Jassi nahujanidsa dsippodsa pohuadeni dsepe da quinajari.

<sup>55</sup> Nadsapa dada toqquimade taminedeni, jodiodenicca ima cacattemededeni deni toquejenajarideni tedseje Jesodsa ima inassonarimananijine tohuini quinadsa madijadsa huati taridsamanajari. Aja madija attidenipa:



—Jesopa icca marinajadsa oppina tanicca inanapaja —quinadsa tamededeni: —Jehe, najaro imadsa Jeso dsoqquehijine pajirahi —quinaraha ima oppina tanicca bacco quina-jerani. <sup>56</sup> Madija huapi taha maidsaniji onihi onihi huati toquinaraha poccadeni imapi najarossa naridsa-jerani. <sup>57</sup> Nadsapa madija ohuahadeni totehema-manadsa Jesodsa poccadeni maidsaniji inassonarimanajaro. <sup>58</sup> Attidenipa: —Titaharibobo canaji. Jeso atti ajama nahi imittade. Pohua attia: “Aji Diodsa dada toqquimacca odsapi madija icanahatomanaraha ocatabodsapi huada 3 nadsa ocanahatoninitohui. Najaropi madija icanahatomanajerani” nade pohua atti —quinahi nade. Pohuadeni atti nama quinaraha maidsamanajari. Pina Jeso attissa nejerani. <sup>59</sup> Naraha pohuadeni pamahacca ima nemanehapi najarossa nejerani. Najaro imadsa naqui Jeso inanadsoqqe-manahijine pajira-jerani.

<sup>60</sup> Nadsapa dada toqquimadedenicca tamine deni tojajari totehema, hua nadsa Jesodsa huati tajari: —¿Tiapi tia tecomajaroqui? Tiadsa ima inassonarimanajaropi ¿nejecoma naneje? —nahi nade tamine atti. <sup>61</sup> Naraha Jesopa pohua cacoma najari. Nadsapa tamine huati nimanipomajari: —¿Tiapi Cristo-Mesia tijaqui? ¿Dio Bicabote Bedi tijaqui? —nahi nade tamine. <sup>62</sup> Nadsapa Jeso: —Jehe, nema onajaro —nahi nade. —Ohuapi Madija Bedi oजारoa nidsa dsotode Dio Dacorabote ohua deni tonanadsapa Pohua inori nahatonihuaji ohuittarini qqui tiquinanitohui. Nidsa meme essenima occaronapomani ohua qqui tiquinanitohui —nahi nade Jeso atti.

<sup>63</sup> Nanaja dada toqquimadedenicca tamine deni tojaripa Jeso atti mittadsa huati jami nadsa pocca etero joca taneje sseo najaro. Nadsapa huapimadsa huati tajari: —¡Epeje! Jidapapi pocca ima nahatoqquiri inani. Madija ohuahacca imatohui huati inejerana. <sup>64</sup> ¡Dio itamassojar!

“Ohuapi Dio ojani” najarissa naha. Pohua atti tabaccora tani timittamanani. ¿Jari, tettideni nejecoma tiquinani? —nahi nade Caipa. Naraha huapima: —¡Jehe, pohua atti nama nadsapa dsoqquena inajaro! —quinahi nade.

<sup>65</sup> Nadsapa pohuadsa ppito-to ppito-to canajari, nocco ssoque quinadsapa idacquimanajari. Nadsapa attidenia: —Jari ¿nejecojari tia idajari? ¡Tecomerajo! —quinahi nade. Nadsapa dada toqquimahuajicca cacahuadeni Jeso pohuadenidsa tojadsapa pohuadeni naco Jeso idacquimanajari nade.

*Pedropa Jesodsa: —Onocco jidsa tani —najari  
Mateo 26.69-72; Roca 22.56-62; Huano 18.15-29*

<sup>66</sup> Jesopa odsa bodihuaji nanajidso tojaraha Pedropa amossinihuaji boronidsa huittajari. Nadsapi aji dada toqquimadedenicca tamine deni tojajaricca medse dsohuato ccajonajaro. <sup>67</sup> Pedro dsippo jiade tojahi qqui tadsa icattoma nadsapi pohuadsa huati tajaro: —Tiapi Jeso Nasaretihuajicca huatimade tijadija —nani nade. <sup>68</sup> Naraha Pedro pohua namaidsajari: —A, ohuapi onocco jidsa tani. Qqui onajarade. Najaro ima ssamo onani ohuapi —nahi nade. Nadsa Pedropa boroni qqueqqed-simahuaji toccadsa huajari. Nanaja tacara huahua najari. <sup>69</sup> Naraha taminecca medsepi Pedro qqui inapomadsa nahidsa toqueriqquijaridenidsa huati tapomajaro: —Ajajari maqquidejepa Jeso huatimadedija —nani nade. <sup>70</sup> Naraha Pedropa pohua namaidsapomajari: —Onocco jidsa tani —napomahi nade.

Naraha dsotodepa nahidsa toqueriqquijari attidenipa: —¡Pajissade! Tiapi Jesocca tijade. Carireahuajicca madija tijaha —quinahi nade Pedrodsa. <sup>71</sup> Nadsapa Pedro huadijari. —Pajissa huati huati onejeradsapi Dio ohua tinajidsoji, onana. Pajissa tiadenidsa huati onajaroa: Po-

huadsa onocco jidsa tani. Jidacca najari tahimari huati tiquinajaro ohuapi qqui qqui onajaradija —nahi nade Pedro.<sup>72</sup> Nanaja tacara huahua nimanidsapa Jeso atti Pedro bodi huatomanijari: —Tacara huahua najaraccadsapa tetti tinamidsani 3 nanitohui —napojari. Aja Jeso atti Pedro bodi huatomanidsapa bodi qquedsadsa oji idimajari nade.

## 15

*Tamine Piratodsa Jeso iaccamanajari*

*Mateo 27.1-16; Roca 23.1-5; Huano 18.28-40*

<sup>1</sup> Ssajadsapi dada toqqimade taminedeni, ime joco-huideni, jodiodenicca marinaja maridedeni, jodiodenicca ima cacattemededeni huapima queriqquimanadsa pohuadenira imahaha canajari. Jehe caniredsapa Jeso biji jore quinadsa tamine Piratohuaji iaccamanajari, —Jeso dsoquena —quinahijine. Tamine Piratopa romanodeni. Puhuapa jodiodenicca dsama cacahuade tojajari.  
<sup>2</sup> Nadsapa tamine Piratohuaji Jeso iaquedsimamanadsapa Pirato Jesodsa huati tajari: —¿Tiapi jodiodenicca tamine tijaqui? —najari nade. —Jehe, tetti nema taropaji —nahi nade Jeso.

<sup>3</sup> Nadsapa dada toqqimade taminedenipa Piratodsa poccadeni maidsehe huati toquinajari. <sup>4</sup> Nadsapa Pirato Jesodsa huati tapomadsa: —¿Tia tecomera-jerajaroqui? Aja pohuadenipa ticca imapi tabaccora tani huapi tani huati huati toquinaha —najari nade. <sup>5</sup> Naraha Jeso joma najari. Nama nadsapa tamine Pirato jabojo najari. Pohua bodipa: —¿Nejecotohui pohua cacomajari? —najari nade.

*—Baraba qquenana, Jesopa dsoquena* —quinajari

*Mateo 27.15-31; Roca 23.13-25; Huano 18.38—19.16*

<sup>6</sup> Huajano huajijiradsa jodiodenicca ejete Pascoa tojadsa tamine Piratopa toponi cocorodsa madija

huedsamanajari ojaría pohuajine qquequenamana najari. Madija huapima: —Najari qquenana —quinadsapa ihinequena najari. Piratopa najarossa inananijine najorajari. <sup>7</sup> Nadsapa toponi cocorodsa huedsajari ojaría onipa Baraba. Barabapa toponi nanajidsodedeni tedseje toponi cocorodsa domo huedsajari. Pohuapa pohua tessedeni tedseje romanodenicca taminedsa jara jara quiquinanadsa madija ojaría ijinedeni ahuamanajari. <sup>8</sup> Nanaja madija huapima tamine Piratodsa huatide jahijonadsa attidenipa: —Ejete Pascoa tojadsapi toponi cocorodsa huedsajari ojaría tijine qquequena nade. Najarossa tinanapomaji inajaro —quinahi nade. <sup>9</sup> Naraha Piratoa: —Jehe, aja pohuadsa: “Jodiodenicca tamine” quinajari tappa onahijine ¿jipaqquri tiquinaqui? —nahi nade.

<sup>10</sup> Piratopa pohua bodidsa Jesopa ima cappirahi nahato tapojari. Pohua bodipa: —Dada toqqimade taminedenipa Jesocca deni tojehe acconi huadimanadsa ohuadsa eccajonamanajari —najari. <sup>11</sup> Naraha dada toqqimade taminedenipa Jeso tossiajahijine jiperaqquri nadsa madija huapimadsa huati naridsamanapojari: —“Barabana qquenana” tiquinaji —quinahi nade. Nadsapa huapima Barabatohui johuahua johuahua canajaripaja.

<sup>12</sup> Naraha Piratopa domo huajaridenidsa huati tapomajari: —Jehe, naraha pohuadsa “Jodiodenicca tamine” quinajaripa ¿nejecoma onanahijine jipaqquri tiquinani? —nahi nade. <sup>13</sup> Naraha huapima johuahua johuahua canapomadsapa: —¡Ahua porimacossanidsa dsoquena, dsoquena! —quinahi nade. <sup>14</sup> —¿Naraha nejecotohui dsoquehijine? ¿Nejeco imara inajaro? —nahi nade Pirato. Naraha domo huajarideni huapima paja johua toquinarihi nadsa: —¡Ahua porimacossanidsa dsoquena, dsoquena! —quinahi nade.

<sup>15</sup> Nadsapa tamine Pirato pohuadsa madija huapima huatidsemanahijine Baraba ineqquenajari. Nadsapa pocca soldadodeni Jeso cossi inaquimanahijine icadossebaquijari. Cossi inaquimanaha jicadsapa icadossebaquipomajari: —Ahua porimacossanidsa coba tidsanamanahijine tiaccamanajo —nahi nade Pirato.

<sup>16</sup> Nadsapa tamine Piratocca soldadodenipa odsa imeni bodihuajicca boronidsa Jeso iaquedsimamanajari. Nahidsa romanodenicca soldado huapima toqueriqquijari. <sup>17</sup> Pohuadenipa: —Jeso pina taminessa inanana —quinaraha maidsamanajari. Nadsapa etero macconi motaranicca pina taminedeniccassa najarodsa Jeso inehedsamanajari. —Jeso taticca pina tamine tatideniccassa nana —quinaraha cotihi atinema jore nahuajanihira ettarimanajari. <sup>18</sup> Nadsapa jaja icanaquimanahijine pohuadsa: —¡Deni tijani jodiodenicca tamine! —quinahi nade maidsamanadsa. <sup>19</sup> Pohua tatidsa ahua ppahua tajarodsa huacca huacca quinajari. Ppito inaquimanajari. Nadsapa: —Pina taminedsassa inana —quinadsa Jeso baccohuaji pohuadeni pitodsa huittamana, tocattedsamana, huittamana, tocattedsamana naraha maidsamanajari. <sup>20</sup> Nadsapa maidsehedsa pohuadsa jidsa jidsa quinaha jicadsapa etero macconi motaraniccapi ssiti quinadsa pohua pocca eterora inehedsanimanajari. Nadsapa ahua porimacossanidsa Jeso coba idsanamanahijine iaccamanajari.

*Jeso ahua porimacossanidsa coba idsanamanajari*  
*Mateo 27.31-56; Roca 23.26-40; Huano 19.16-30*

<sup>21</sup> Soldadodenipa Jeso iaccamanajaja dsama Sirenecca madija Ssinopa huidsajahuaji ccanidsa soldadodeni bacco ijidsamanajari. Najari Ssinopa Arejadro, Rofodenicca abi. Jeso ahua porimacossani dsojo inaraha ja tojadsa soldadodenipa Ssino icadossemanajari: —Manaco tia ajararicca

ahua porimacossani dsojo tinaji —quinadsapa manaco Ssinona dsojo inajaro. <sup>22</sup> Nadsapa ssono Cocottahuaji Jeso iaquemoramanajari. (Ssono onini Cocotta ettidsapi: Totati Tonanissa nani, quiquinanajari.) <sup>23</sup> Nahidsa bacco toquinadsa uva ppejene, ahua amani onini mirra quejemadsa Jesodsa da icanamanajari, —Pohua comene ojid-sama nanijine —quinadsa. Naraha Jesopa pohua najari nade.

<sup>24</sup> Nadsapa ahua porimacossanidsa coba idsanamana-jari. Coba idsanamanaha jicadsapa acca icanamacossamanajari nade. Nadsapa soldadodeni: —¿Jesocca etero nejecojaridsana tojanijine? —quinadsa siba bedenidsa coro coro quinajari. Najaro sibadsa ittomemanadsapa pocca etero pohuadenidsa ojari ojari naridsajaro nade.

<sup>25</sup> Dsidsidsamassa maji 9'dsa Jeso coba idsanamana-jari. <sup>26</sup> Pohua tati tetepihuaji dsodo nani coba idsanamana-jaro. Najaro dsodo nanipi: —Ajaripa Jodiodenicca Tamine —najaro. <sup>27-28</sup> Bobotide pamaha naco Jesodsama topama-jonahijine ahua porimacossanidsa cobaba idsanamana-jari. Ohuahapa Jeso inori nahatonihuaji que, ohuahapa Jeso inori ssamohuaji que tajari nade.

<sup>29</sup> Madija nahi jai tojeqqumajarideni Jesodsa jiper-aquiri nadsa Jesodsa tatamasso quinajari. Tatideni huide huide quinadsa attidenipa: —Ajina tetti: “Diodsa dada toqquma ocatabodsapi huada 3 nadsa ocanahatoninitohui” teteje nade —quinahi nade. <sup>30</sup> —Jari, tia tinassiajaji. Ahua porimacossanidsa tia tidinidsa ticaronaji —quinahi nade. <sup>31</sup> Nadsapa dada toqqumade tamedeni, jodiodenicca marinaja maridedeni quinajari-denipa Jeso itamassomanajari: —Ajana madija ohuaha inassiajabacquiraha pohua tonassiajadepa ssamo tahi. <sup>32</sup> Pohuapa Cristo-Mesia Isaraeri potemahi jodiodenicca tamine tojadsapa porimacossanidsa ccaronana. Nadsana

qqui inadsa pohuadsa pajissa inanijine —quinajari. Pohua inoricca naco ahua porimacossanidsa cobaba dsanaraha najaro tohuattissa najarodsa Jesodsa atti atti quinahi nade.

*Jeso huatiajari*

*Mateo 27.45-56; Roca 23.44-49; Huano 19.28-30*

<sup>33</sup> Maji itetepi tojadsa dsama nemaneha todsidsini najaro. Dsidsi dsanapojaropi maji 3 bacco tajaro. <sup>34</sup> Najari maji 3'dsa Jesopa pohua attidsa jadsirema huahua najari: —Eroi, Eroi ¿rema sabatani? —nahi nade. (Najaropi: —Abi Dio, Abi Dio ¿nejecotohui ohua tinebojaro? —najari nade.) <sup>35</sup> Naraha nahidsa domodeni huajari mitta-manadsapa: —¡Titaharibobo canaji! Maittaccadsamacca Dio Atti cacomerabote Eriadsa huahua nahi —quinahi nade. <sup>36</sup> Nadsapa nahidsa domo huajari ojaría huassinaja joppa tajari, huassa tajari idi, uva ppejene ssicata bidada najaridsa edsippa, ppaja tojadsa bobadsa oro, da icanamacossajari. Nadsapa najari attia: —¡Maqui, nidsa padseje! Pohua idironahijine Eria ccajonahitidija. Qqui inaccana —nahi nade.

<sup>37</sup> Naraha Jeso jadsirema johua nadsapa huatiajari.

<sup>38</sup> Naneje Diodsa dada toqquima bodihuajicca huahua-cossa etero sibabote naqui Diojine sseo naronajaro, carobe najaro. <sup>39</sup> Nadsapa Jeso baccohuaji soldado tamine Jeso cacahuade huajaripa Jeso huatiahi qqui tadsa: —¡Jaho! Pajissa ajari maqquidejepa Dio Bediraha —nahi nade soldado tamine atti.

<sup>40</sup> Amonejedeni naqui huaji tanidsa cattade domoni huajaro. Ponidenipi huapi taraha mota oninidenina Maria Madarenahuajicca, Jose Satiacodenicca ami Maria, Sarome quinajaro. <sup>41</sup> Mariadenipi Jeso dsama arobeni

Carireadsa ccaridsapodsa pohua accode pohuadsa jahirid-sajaro. Amoneje onihideni naqui huapi tani. Ponidenipi Jerosarehuaji Jesodsa jahijonajardeni.

*Jeso ppa idsamanajari*

*Mateo 27.57-61; Roca 23.50-56; Huano 19.38-42*

<sup>42</sup> Jeso dsoqquehicca huadapi viernes. Jodiodenipa najaro huadadsa poccadeni jassinajacca huadatohui nana-joramana najari. Huada ssiaja sabadopi poccadeni jassinajacca huada tojadsapi dsepedeni ihijimana najarajari. Madija dsoqquedsa ppa idsamanahijine naco oppina tani quiquinanajari. <sup>43</sup> Nadsapa viernes dsomebote nadsa odsa panani Arimateahuajicca madija oni Dsodsepa cappinera tadsa tamine Piratodsa huatide toccajari. Puhuapa jodiodenicca ima cacattemadedeni ojaría. Madija huapimapa pohuadsa nahatoqquri najari. Puhua naco Diocca cacahuehetohui najoraha madijari.

Nadsapa tamine Piratodsa bacco tadsa Jeso assire ppa idsahijine huati tajari. <sup>44</sup> Naraha Dsodse atti mittadsapa Pirato jabojo najari, —Jeso amadsati huatiahi —quinahi mittadsa. Nadsapa huahua najari soldadodeni taminedsa: —Nija ¿pajissa jidaccadsama dsoqquejarico? —nahi nade Pirato. <sup>45</sup> Nadsapa soldadodenicca taminea: —Jehe, pajissa, dsoqquejaripa —nadsapa Pirato Dsodsedsa: —Jehe, Jeso assire dicca tadsa ppa tidsahijine tiaccajo —nahi nade. <sup>46</sup> Nadsapa Dsodse etero dsojorani onini lino, bica tanicca mittade toccajari. Mitta inadsapi Jeso coba dsanaha que tahihuaji tocanajoranijari, Jeso assire dicca inadsa eterodsa jore inaqqujari. Nadsapa Jeso assire tonoccobirihuaji dsojo inajari. Nanidsa tonoccobirijine sibadsa hui todsimani najorapojaro. Nahidsa Jeso assire dsojo idsimadsa ibedsajari. Siba imeni pata inanidsa Jeso noccobiri odinihuaji ecossajaro nade. <sup>47</sup> Nanidsa Maria



Madarenahuajicca, Josecca ami Maria quinajardeni Jeso assire ibedsahi qqui toquinajaro.

## 16

### *Jeso nahatonijari*

*Mateo 28.1-10; Roca 24.1-12; Huano 20.1-10*

<sup>1</sup> Jassinajacca huada jicadsapi Maria Madarenahuajicca, Maria Satiaco imeni, Sarome quinadsa ahua majiconi majoni bica tajaro mittade jai tojajaro, Jeso assire huira inarimanahijine. <sup>2</sup> Semana tojapomanicca huada tahidecca domingo dsidsidsamassa maji ssido najonadsa Jeso noccobirihuaji ahua majiconi majoni bica tajaro iaccamanajaro. <sup>3</sup> Nadsapi Jeso noccobirihuaji jai tojadsa imahaha cadsanapojaro: —¿Nejecojari ia acco camapadsaja, Jeso noccobiricca siba imeni pata inanijine? —quinani nade. <sup>4</sup> Naraha bacco toquinadsa qqui toquinaneje tonoccobiripi tohuabeje najaro. Siba imenipi pajimaranihuajina huitteje najaro. <sup>5</sup> Nadsapi jai tojed-simadsa qqui toquinaneje dsabisso eterori nopo taha nahatonihuaji huittari canajari. Nadsapi jabojo quinajaro nade. <sup>6</sup> Dsabissopa ponidenidsa huati tajari: —¡Ticappinamana tejeraji! Tiadenipi Jeso Nasaretihuajicca qquide jai tijajonajaro. Najaripa ahua porimacossanidsa coba idsanamanadsa dsoqqueraha nahatonijari. Ajadsapa nohuerahi. Jari, pohua ibedsamanahihuaji qqui tiquinajo. <sup>7</sup> Nadsapi jai tijanidsa pohua huatimadedenidsa, Pedrodsa naqui ima huati tinanimanaji. Jesopa titedsejemadeni dsama arobeni Carireahuaji toccanipohuitohui. Nanihuaji jai tijanidsana pohua qqui tiquinahijine, pina pohua dsoqqe-jaraccadsama tiadenidsa huati tapojarissa najaro —nahi nade dsabisso atti. <sup>8</sup> Nadsapi amonejedeni jabojomanadsa tacca-cca-cca quinadsa tonoccobirihuaji domoni qquenadsapi domoni toccanijaro. Nadsapi jahui

domoni ccanidsapi cappinamaneri nadsa Jeso nahatoni-  
hicca ima huati toquina-jeraccani nade.

*Jesopa Maria Madarenahuajicadsa ahuatomajari*  
*Huano 20.11-18*

<sup>9</sup> Jesopa semana tojapomanicca huada tahidecca  
domingodsa dsidsidsamassa nahatonijari. Nahi  
dsotodepa Maria Madarenahuajicadsa ahuatomajari.  
Najaro Mariapi tahide poni bodinidsa tocorime  
7 quinaha cajiporaha Jeso dosse ininebaquijari.  
<sup>10</sup> Maria Madarenahuajicca Jeso qqui tadsapi pohuadsa  
jahiridsapo-jaridenidsa huatide joppa nanijaro.  
Pohuadenipa oji oji camaraha Maria bacco nanidsa  
Jeso nahatonihicca tahimari huati tajaro. <sup>11</sup> Poni attinipi:  
—¡Jesopa camittemanidsa madipa! ¡Pajissa qqui onapa!  
—nani nade. Naraha poni attinidsa pajissa quina-jarajari.

*Jesopa pohuadsa pajissa quinajarideni pamahadsa ahu-  
atomajari*  
*Roca 24.13-35*

<sup>12</sup> Dsotode naco Jeso pohuadsa pajissa quinajarideni  
pamahadsa ahuatomajari. Pohuadenipa odsa capamema  
najarohuaji tohuedadsa jahuidsa Jeso bacco quinaraha  
pohuadenidsa jidsa taccajari. Dsotodena noccodeni jid-  
sera najari. <sup>13</sup> Nadsapa tohuedanijari. Jesodsas toquejena-  
jaridenidsa Jeso nahatonihicca ima huati tanimanaraha  
pohuadeni attidsa naco pajissa quina-jaraha nade.

*Jesocca dosseniji pohua huatimadedenidsa*  
*Mateo 28.16-20; Roca 24.36-49; Huano 20.19-23*

<sup>14</sup> Dsotode naco pohua huatimadedeni 11 quinajari  
jipade toquejenahidsa Jeso ahuatomajari. Pohuadenipa:  
—Jehe, Jeso nahatonihijine pajirahi —quina-jaradsa  
huaribodeni sibaquiri nadsa Jeso huati icanabaquijari:  
—¿Nejecotohui occa madijapa onahatonini qqui

toquinaraha pohuadeni attidsa pajissa tiquinejerajaro? —nahi nade. <sup>15</sup> Nadsapa denima huati tajari: —Dsama huapimadsa jai tijaridsaji. Madija huapimadsa otahimari madija tocassiejerahijinecca teccoraridsa-manaji —nahi nade. <sup>16</sup> —Nadsapa madija otahimaridsa pajissa quinadsa passodsas totopa cajimanadsapa tocassiejerahitohui. Naraha madija ohuadsa pajissa quina-jarajaridenipa Diojine najidsohue jiquejeranihuaji jai tojahitohui. <sup>17</sup> Ohuadsa pajissa quinajaridenipa ohua onidsa dsepedeni ijimanadsa canahatorimana canahitohui. Canahatorimana canadsapa Diocca dacorehe ahuato tanitohui. Jehe, ohua onidsa huati huati toquinadsapa Satanacca dodosse tocorime dosse ininebaqqui-manahitohui. Tohuatti onihidsa naco huatide nahatoqqiri nahitohui. <sup>18</sup> Macca coma tahicca damade pajiramanahitohui. Coma tahicca oni veneno dse quinadsa naco pohuadenidsa comene nohuerahitohui. Madija comaqqiri najarideni naco pohuadeni dsepedsa bara quinadsapa totocanomire nahitohui —nahi nade Jeso.

*Jeso toccamacossanijari*

*Roca 24.50-53; Tahimarideni 1.9-11*

<sup>19</sup> Nadsapa ia Medsede Jeso pohua huatimadedenidsa huati taha jicadsapa memehuaji Dio pohua iaccamacossanijari. Diopa Jeso deni inanadsapa Pohua inori nahatonihuaji inahittarijari, madija ihicadossebaqqui nahijine. <sup>20</sup> Nadsapa Jeso tahimari icassiejeranijinecca pohua huatimadedeni dsama huapimadsa ecomeraridsa-mananijine jai tojaridsajari. Ecomeraridsa-manadsapi ia Medsede acco icamabaqquidsas pocca dacorehema canahatorimana canaridsajari. Nama quinadsapa madijadenidsa Jeso tahimari pajissa ahuato tajaro. Epejeni.

El Nuevo Testamento en el idioma Culina (mádjia) del  
Perú

Kulina: El Nuevo Testamento en el idioma Culina (mádjia) del Perú  
New Testament

copyright © 2014 Wycliffe Bible Translators, Inc.

Language: Culina (Kulina)

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 14 Jun 2022 from source files dated 30 Nov  
2021

4c7c82dd-1f0f-5341-b6e6-26970c27fee2